

Jesocca dodosse tabaqqi tahimarideni

Los Hechos de los Apóstoles

Ajjaro imapi Roca dsodo inajaro. Rocapa doctoro. Pohnuapa Jeso tahimari dsodo inapojaro. Najaro papeopi dsodode onidsa Roca, inajaro. Dsotodena Jesocca dodosse tabaqqi dsepedeni ijridsamanajari tahimari-deni dsodo inajaro. Jesodsa jehe quinajarideni tohuapi-dsanapojari tahimarideni naqui dsodo inajaro.

Rocapa Jesodsa ccaridsa-jararaha Jesocca dodosse Pablodsa ccaridsa-dsa Pablo tahimari, Jesocca dodosse tabaqqi ohuahadeni tahimarideni naqui dsodo inajaro. Pohnuadenidsa huati tadsa pohnuadeni tahimari mittajari. Ajjaro imapi Roca pohnu tesse Teofirodsa dsodo inajaro, Jesocca dodosse tabaqqi tahimarideni nahato tahijine.

Dio Corime madijadsa tojaridsahijine tahimari huati tapojari Jeso

1 ¹⁻³ ¿Nija Teofiro? Ohuapi Roca. Tiadsa Jesocristo tahimari dsodo onapojaro. Aja pohnu dsepe ihiji najaricca ima dsodo, aja madija mari mari ihicanabaqqi najaricca ima dsodo onajonajaroa pohnu toccamacossanihi bacco tajaropaji. Jesopa dsoqquedsa ppa idsamanaraha nahatonidsapa memehuaji toccamacossani-jaraccadsa pocca dodosse tabaqqidsa aja pohnu icattejjidsabaqqipojaridenidsa ahahuatoni najari. Pohnuadenidsa madiridsapomaccajari. Jesodsana Dio Corime madidsa pocca dossenijicca ima pohnuadenidsa huati huati tataja najari. Pocca bejo naqui pohnuadenidsa nohue inadsapi: –Jehe, Jesopa pajissa assire madinipomajari –quinajari. Nadsapa huada 40 nehe

pohnuadenidsa madiridsapomadsa naco Diocca cacahuehecca ima mari mari ihicanabaqqi najari.

⁴Nadsama pocca dodosse tabaqqidsa madiridsapomadsa naco ajjaro ima pohnuadenidsa huati tajari: –Jehe, aji odsa panani Jerosare tinebomana-jeraji. Occa Abi huati tapojaricca *ima bicani pajissa tiadenidsa tojanijine tohuini timadimanaccaji. Najaro imapi tiadenidsa huati onapode. ⁵Tahide-dsama tibodideni cacajiqquimera-dsapi: “Occa imasiri onebona” tiquinadsapi Huanopa passodsa tiadeni topa todsanabaqqiraha nidsa huada onihidsana Dio Pohnu Corime tiadenidsa da inaridsadsapa tibodideni denima cacajiqquimeranitohui. Diopa tibodideni dsati inananitohui –najari Jeso.


⁶Huada onihidsa Jesodsa queriqquipomadsapa pocca dodosse tabaqqi pohnuadsa huati toquinajari:

–Ia Medsede, maittaccadsama icca idideni Isaraeridenicca cacahuehe jicaporaha ¿jidapana tijine tojapomanijinequi? –quinajari. ⁷Naraha Jeso pohuadenidsa huati tajari: –Tettidenipi: “¿Nejecoma nadsa ia Isaraeridenicca cacahuehe tojapomapadseje?” ¿tiqinajaroqui? Naraha najaro imapi ticcadeni jerani. Abi Dio Pohuana nahato tajari. Nidsa Pohua jipa tadsa ticcadeni cacahuehe tojapomanitohui. ⁸Naraha Dio Corime ccajonabote nahi. Tibodidenidsa tojaridsadsana pocca dacorehe ticajimanantohui. Nadsana otahimari maride tiquejenaridsanijine. Aji timadimananicca

odsa panani *Jerosaredsa maride tiquejena, ticcadeni dsama Jodeadsa maride tiquejena, Jodea inorinicca dsama *Samariadsa maride tiquejena naridsanijine, onajaro. Aja dsama huaji tanicca madiridsamanajarideni naco huapima otahimari mittaridsamanahijine teccoraridsa-manana. Aji ohuadsa jai tijaridsadsa qqui tiqinajarocca ima, occa marinaja timittamanajarocca ima naqui mari ticana-baquiridsana, onajaro –najari Jeso.

**Jeso Imehihuaji
toccamacossanjari**

⁹Jeso pocca ima huati huati taha jicadsapa pohua huatimadedeni



cattomama canaraha tocca-macossanijari. Meme essenidsa tohuatorajari. ¹⁰Nadsama Jeso pohua huatimadedeni memehuari to cattamacossassa cananaja pohuadani inoridsa maqquideje pamaha eteroridendi nopoqquri naha ahuatomanajari. ¹¹Pohuadani attipa ajama quinajari: –Aji dsama Carireacca madija ajidsa timadimanajarodeni ¿nejecotohui memehuari ticattamacossassa canajaro? Aja Jesopa tiadenidsa madiraha Dio idinimacossanijari, memehuari madipomahijine. Aja toccamacossanishi qqui tiquinajaripa ccanipomadsa naco najarissa nahitohui. Meme essenima quejemaha namihuari ccaronapomahitohui –quinajari.

¹²Nanaja Jesocca dodosse tabaqquipa ssono Oribodsa queriqquiraha: –Jina, Jerosarehuari jajjedsippanina –quinajari. Aja pohuadani jahidsippanihicca ssonopi Jerosaredda huajira tani, pina *jassinajacca huadadsapi huajira tanidsa ccaridsade oppinera tani, quiquinanajari. ¹³Nadsapa odsahuari bacco nanimanadsapa odsa tetepihuajicca coba canahuajaninidsana jai tojamaronidsapa nahidsa madimanajari. Nahidsa madidepa: Pedro, Huano, Satiaco, Adiri, Feripe, Tomas, Batorome, Mateo, Arapeo bedi Satiaco, Ssino, pohuadsa romanodeni momohuade quiquinanajari, Satiaco bedi Joda quinajari. ¹⁴Odsa tetepiccadsa madimanadsana huajjiradsa Diosda huatide totoqueriqqui najari. Jeso imecotedeni, pohua imeni Maria, amoneje onih naqui nahi pohuadenidsama Diosda huatide totoqueriqqui najari.

Matia Jesocca dodosse tabaqquidsapa tojajari

¹⁵Nadsapa huada onihidsa Diosda huatide queriqquipomajari. Madija 120 quinaha queriqquimanajari. Nadsapa Pedro totehemadsa pohuadenidsa huati tajari: ¹⁶–Jehe ohuemecotedeni, Dio Atti dsodo naponiccapi pajissa tojajaro. Maittaccadsama Dio Corimepa tamine Dabidsa Jodacca ima ahuato inanapodsapa Dabi huati tapojari. Najaria aja Jodajine Jeso todsepe tojajari-paja. Najaroa aji ia qqui inajaropaji. ¹⁷Jodapa Jeso icattadsapa pina aja iassa narahade. Pohua dsepe ijijari naco pina aji iccassa narahade. ¹⁸Naraha Jodapa pocca tabaccorehe manaconi dsiniro cajjaridsa dsama mita inajaro. Nahidsa pohua tatihuari tohuedimadsapa assire sseo tajari, idsone naqui ccodo tadsapi dsoqqejari. ¹⁹Nadsapa odsa panani Jerosarecca madija najaro ima mittamanadsapa pocca dsama icanacanimanajaro: Aseudama, quinajari. (Ettidsapi: Tohuemene pina sso tabaqquini nani, inajaro.) ²⁰Najaroa maittaccadsama tamine Dabi madidsa pocca jijiridsa Dio Atti dsodo inapojaro:

“Pocca dsama, pocca odsa naqui totabaccorana. Nahidsapa madide nohuerana” napohui nade.

Dabicca ijijari onihidsa naqui ajima naponi nade:

“Pohua dsepe ijijaripa madija ohuahana dsepe ijina” napohui nade –najari Pedro.

²¹–Nadsapa aja Joda dsepe ijijariccadsa madija ohuahana dsepe ijijine qqui inana. Aja ia Medsede Jeso iadsa ccaridsadsa iadsama jahiridsajaridendi

ajadsa madimanahi. ²²Najarideni ojaria ¿nejecojarina Huano Jeso passodsa topa idsanapohuidsama qqui najonajaria Jeso pohua toccamaccossanihi qqui tajaritta? Najarina iadsama Jeso nahatonihni tahimari eccoraridsanijine, onajaro –najari Pedro.

²³Nanaja Pedro atti mittamanadsapa madija pamaha onideni hua inabaqqi-manajari: –Aja Dsodse, Matia quinaridenina paja –quinajari. Dsodse oni ohuahapa Barsaba, oni ohuaha naco Justo quiquinanajari. ²⁴⁻²⁵Nadsapa Dios huati toquinadsapa ajama quinarjari: –Ia Medsede Dio, tiapi madija bodideni qquide nahatojide tijirani. Tiapi tetti ¿nejecoma nani? Ajadsa madija pamaha icattejidsa-baqquihi ¿nejecojaridsana jipa tinani? ¿Nejecojarina aja Joda dsepe ijjaricadsa tojahijine? Jodapa imasiri inanadsa ia tonebobaqquidsa Dio Tijine pohua tedsejemacca ima tinanajoraponihuaaji tojahi –quinajari. ²⁶Nadsapa

pohuadeni pamahadsa: –¿Nejecojarina Joda dsepe ijjaricadsa tojahijine?

–quinadsa siba bedeni pamehe idsabamanadsa: –Ajaropi Dsodsecca, ajaropi Matiacca –quinadsa dsaminidsa icodidsamana nadsa qquedse qquedse quinadsa ojarie ssonadsapi: –Matiana paja –quinajari. Nadsapa Matia *Jesocca dodosse tabaqquidsa tojajari. Nadsapa 12 quinapomajari.

Dio Corime madijadsa tojaridsapojari

2 ¹Nadsapi jodiodenicca ejete imenibote bacco tajaro. Ejete oninipi *Pentecostes. Najaro huadadsa Jesodsa jehe quinajarideni queriquimanajari. ²Naraha amadsati memehuaaji mohuini pina jojode dacorajarossa nehe mitteronadsapi nani odsa bodihuaaji queriquihidsa naqui jadsirema mohui tajaro. ³Nadsapi pohuadenidsa pina jororonissa nehe



ahuatomaridsajaro. Tojaribaquidsapi pohnadenidsa cajororori naridsajaro. ⁴Nadsapa pohnadeni bodidsa *Dio Corime tojaridsahissa tadsapa Diocca nahatohue cajimanajari. Ojariapa *tohuatti jidsa tajarodsapa huati, ohuahapa tohuatti jidsa tajaro onihidsa huati, ohuahapa tohuatti onihidsa huati huati naridsamanajari. Dio Corimejine nama naridsamanajari huapima.

⁵Nadsapa *jodiodeni Diodsa disseraquiri najaridendi dsama onihicca, dsama onihicca nahi Jerosaredsa queriquimanajari. ⁶Najaridendi huapima mohuini oppina tani mittamanadsapa domo ccajonajari. Amossinihuaji queriquijonamanajari. Nadsapa queriquimanajaridendi aja odsa bodicca huati huati toquinahi attidendi mittamanajari. Tohuatti onihi, onihi cajiridsamanaraha poccadendi madija attidendi jidsera neje camadsapa huajo canirejari. ⁷⁻⁸Nadsapa aja odsa huapihuaji domo huajari attidendi: –A... ¿Nejecotohui pohnadenipa dsama Carireahuajicaraha tohuatti onihi, onihidsa huati huati toquinajari? Etti imittaridsaha –quinajari. ⁹–Aji iqueriquinidsapa Partohuajicca, Mediahuajicca, Eramihuajicca, Mesopotamiahujicca, Jodeahuajicca, Capadosiahujicca, Ponto-hujicca, Asia arobenihuajicca, ¹⁰Pirijiahujicca, Pafiriahujicca, Ejitohujicca, Libia arobenihuajicca odsapa panani Sirene huajira tanidsa madimanajaridendi naco mittamanajari. Nadsapa odsapa panani Romahuajicca, ¹¹Cretahuajicca, Arabiahuajicca naco mittamanajari. Motadenipa jodio madija pohnara,

naraha motadenipa madija ohuaha *jodio quejena-jararaha jodiodenicca marinajadsa toquejenajari. Iapidsama huapimacca madija tedseje iquejemama canaraha ettidsa huati huati toquinajari: “Diopa bica tahi, canahatori canahi” quinajari. Diocca ima ettidsa huati huati toquinadsa imittapa –quinajari amossinidsa domo huajaridendi attidendi.

¹²Huapima jabojo quinadsapa imahaha canajari: –¿Nejecotohui nama quinajari? Iapi ¿nejecoma inapadseje? –quinajari. ¹³Naraha madija motapa jidsa jidsa quinadsa: –Coma tanicca dse quinadsa noccodendi janoququiri nadsa mohua mohua camajari –quinajari.

Pedro jodiodenidsa huati tajari

¹⁴Nadsapa aja Jesocca dodosse tabaqqi 11 quinajaridenidsa: –Noccodendi janoququiri najari –quinahi ima mittamanadsapa totehemamanadsa Pedrona jadsirema huati huati tajari: –Jehe ohuemecotedeni, Isaraeri potemahi jodio iquejenajarodendi, aji dsama Jodeahuajicca, dsama huaji tanicca madija aji odsa panani Jerosaredsa ejete qquide jai tijajonajarodeni pina ohuatti titaharibobo canaji. ¹⁵Tettidenipi: “Noccodendi janoququiri najari” tiquinaraha iapi inocco janoraququiri nani. Maji huari dsatidsapa jodiodendi iapi inocco jano taniijine dsedse coma tanicca dse dse ihina nejerani –najari Pedro atti. ¹⁶–Naraha aji timittamanajaropi maittaccadsama *Dio Atti cacomerabote Johueo madipodsapa dsodo inaponi nade. Najarao aji timittamanajaropaji. Najarao aji qqi tiquinaropaji. Diona

Johueodsa huati tadsa dsodo inapojaro:

¹⁷“Ohua Dio Ohuattipi: Nidsa dsama jicanicca huada tohuajiradsapi Ocorime naqui madijadsa onanaridsanitohui. Ticcadeni ejedeni dsabisso, dsohuato naqui Ohuatti ecomeraridsa-mananitohui.

Dsabissodeni, jadahideni naco occa ima pajissacca pohuadenidsa nohue onadsapi poccadeni huadassa nadsa qqui qqui toquinahitohui.

¹⁸Nema nadsapi aja ohuadsa iboraquiri najarideni maquidejedeni, amonejedeni naqui pohuadenidsa Ocorime da onaridsadsana otahimari ecomeraridsa-mananitohui. Ohuatti naqui *huati iquima-mananitohui.

¹⁹Nidsa memehuaji ocanahatori canani qqui tiquinadsa naqui tijabojomananitohui. Nami-huaji occa dacorehe onanadsa naqui emenedeni toccaridsanitohui.

Diji tani jororoni naqui jororo canaridsadsapi essení dacorehema toccamacossadsapi meme todsidsini nanitohui.

²⁰Maji ohuihitohui, abadsico naco tocamacohua pina tohuemenessa canahitohui. Ohuapi tiadeni Medsede, occa huada deni tojanicca, denima bica tanicca bacco tejeraccadsapi najaro oppinehe huapima onanaridsapomitohui.

Nadsana ohuadsa iboquiri najarideni onajidsobaquihitohui. Ohuadsa iboraquiri

najaridenina onassiajabaquihitohui.

²¹Naraha aja madijapa: ‘Ohua Medsede, ohua naqui tiadsa ojanijine ohua tidiniji’ quinajaridenina tocassiejerahitohui”

nahi nade Dio Atti Johueo dsodo inapodsa –najari Pedro.

²²⁻²³Nadsapa denima huati huati tajari: –Jehe ohuemecote *Isaraeri potemahi jodio iquejenajarodeni, ohuatti titaharibobo canaji.

Aja Nasaretihuajicca Jesopa Diojine pajissa canahatori canahi qqui tiquinade. “Pohuapa pajissa Dio dosse inaronajari” titiquina nanijineraha tinanadsoquemanajari. Naraha Abi Diopa tahide nahato tapojari: “Ajima nanitohui” napojari: “Occa ejedeni madija tabaccoraquiri najarideni dama quinadsa ahua porimacossandisa inanadsoque-manahitohui” napohui nade. Najaro imaha aji ia imadidsa qqui inajaropaji. Tijinedeni najarossa tinanamanajaropaji.

²⁴Jesopa dsoqqueraha Diojine nahatonijari. *Dsoqqehe comanipi pohuadsa mari dsanaraha Diojinena Jeso tappa inajari. Dsoqqehepi pohuadsa mari dsananijine ssamo tani. ²⁵Maittaccadsama tamine *Dabi naco Jeso tahimari dsodo inapojaro. Pina Jeso attissa inapodsa ima ajima najaro:

“Ohua Medsede Dio, otedsejema tia qqui qqui ohonanajaro. Ohuadsa ticcaridsadsapi ticca dacorehe ocajidsa ocappinajerani.

²⁶Nadsapi obodi huatidsedsa jiri jiri onajaro. Ohueme

ohuassirema odsoqquenijine ocappina-jerani. Odsoqqueni nattinipi ima bicani tojanitohui. Najarotohuira obodi huahuatoma najaro.

²⁷Odsoqquedsa naqui ocorime dsoqquemana-pojaridenihuaji tinebo-jeranitohui. Tijine ohueme naqui namidsa jadsijeranitohui. ‘Ajaripa occa ejedeni bicabote’ tanitohui.

²⁸Aji camittehe imadidsanaponijinecca naqui ohua mari ticanajaro. Tiadsa omadidsapiticca huatidsehe naqui ocajinitohui”

nahi nade Dabi dsodo inapodsa –najari Pedro.

²⁹Nadsapa denima huati huati tajari: –Ohuemecotedeni, pajissara tiadenidsa huati onana. Tamine Dabipa maittaccadsama dsoqquedsapa ppa idsamanajari. Pohua noccobiri naqui jidapana ecahuamanani paji naccani. ³⁰Nadsama Dabipa Dio Atti cacomeraboteja najari nahato tapojari. Pohnadsa Dio huati tapodsapa: “Pajissara tiadsa huati onajaro. Tipotemani ojariapa tamine deni tojahicca tojahitohui” napohui nade Dio. ³¹Najarojine Dabi pina Jeso nahatonihii qqui tapojarissa nadsa huati tapojari. Najaria aja Cristo-Mesia quiquinanajaripa “dsoqquedsa ppa idsamanaraha pohua ime jadsijeranitohui. Pohua corime naco dsoqquemana-pojaridenihuaji inebo-jarahitohui” napohui nade Dabi atti. ³²Najaria aja Jesocristo Diojine nahatonihii qqui inajaripaja. ³³Abi Dio Pohnajinea toccamacossanijaripaja. Najaria Diojine Jesocristo deni inanadsapa pohua

attidsa madija huapima iboraqquri nahijinepa Dio Pohua inori nahatonihuaji inahittaripaja. Diopa pina pohua huati tapojarissa najaro Pohua Corime Jesodsa da inajaropi manaco madijadsa da inaridsahijine. Nadsapa Jeso Dio Corime iahuaji dosse inaronajari. Najarijinena aji mohuini oppina tehe pina jojode dacorajarossa najaro timittamanajaro. Pina jororonissa najaro naqui qqui tiquinajaropaji. Pohua Corimejinea aji tohuatti onihidsa huati huati inadsa timittamanajaropajipa. ³⁴⁻³⁵Naraha Dabipa memehuaij toccamacossa-jararaha ajaro ima dsodo inapojaro:

“Diopa Ohua Medsededsa huati tajari:

‘Ohuinori nahatonihuaji tittariji. Ohua tedsejepi tohuatti dacorajaro ticajiji.

Nidsa tia huadidedenipa ajamani onanabaquihitohui. Poccadeni dacorehe onajicanitohui.

Nidsa ojinepa tiadsa attideni naco: Ohua Medsede, quinahitohui, onajaro”

nahi nade Dio –najari Pedro.

³⁶–Jehe Isaraerideni huapima, tiadenidsa pajissara huati onajaro, tibodideni huatomaridsa-manaji. Jesopa tinanadsoqquemana-rahara Diojine nahatonidsapa aja ia Medsede *Cristo-Mesia tojaripaja –najari Pedro atti.

³⁷Najaro ima mittamanadsapa jadsirema bodideni ocassera tadsa oji quinabote najari. Nadsapa Pedrosda, Jesocca dodosse tabaqqi ohuahadenidsa naco huati toquinajari: –Jaho, imecotedeni, iana ¿nejecoma inapadseje? –quinajari.

³⁸Nadsapa Pedro pohuadenidsa huati tajari: –Ticcadeni imasiri tinebomanaji, Diodsa tiquejenanijine. Nadsana Dio ticcadeni imasiri epeje inanadsapi *totopa ticajimanani bica tani. Jesocristo onidsa totopa ticajimanaji. Nadsana Dio Pohua Corime tibodidenidsa tojaridsahijine. ³⁹Pina Dio Pohua huati tapojarissa najaro: “Ocorime tiadenidsa da onaridsanijine” napohui nade. Nadsapa tiadenidsa, ticcadeni ejedenidsa, tipotemanidenidsa naco Pohua Corime da inaridsahitohui. Aja dsama huaji tanicca madiridsamanajaridenidsa naco Pohua Corime da inaridsahitohui. Ia Medsede Dio huahua inabaquijaridenidsana Pohua Corime da inaridsahitohui –najari Pedro.

⁴⁰Nadsapa Pedro denima huati huati tajari. Pohua attidsa jehe quina-hijine huatide dissera tajari: –Nidsa Diocca huadie tojadsapi pohuadsa iboquiri najarideni dsori tocanire-jarahitohui. Jicahitohui. Najaridenidsa tiajimanani naji –najari Pedro.

⁴¹Pedro atti mittamanadsa jehe quinajaridenipa amadsati totopa cajimanajari. Najaro huadadsa denima Jesodsa toquejenahipa 3 mil quinajari.

⁴²Nadsapa Jesocca dodosse tabaquicca marinaja mittamandsanapojari. Huapima queriquimanadsapa catidserara canajari, jijipacquimana najari, Jesodsa bodideni huatomahijine naco pan dside narihi jijipamana najari. Diodsa naco huati huati dsadsanapomana najari.

Jesodsa toquejenajaridenicca madie

⁴³Nadsapa Jesocca dodosse tabaquidsa Diocca dacorehe bacco

tadsapi nahatoquiri najari. Dio pocca nahatohue pohuadenidsa tojaridsadsapi aja madija coma-quiri najarideni naco ihinanomibaquimana najari. Nadsapa madija huapima Diocca dacorehe qqui toquinadsapa: –A, ima bicani tojaridsani –quinajari. ⁴⁴Nadsama Jesodsa jehe quinajarideni bodideni pina ojariquimanadsapa pohuadeni dsepetaji, pohuadeni tapari naco pohuadeni tessedsa ahuaji da ahuaji da quiquinanajari.

⁴⁵Pohuadeni dsepetaji mota naqui manaconidsa da quinadsapi dsiniro cacajimana najari. Najaro dsiniropi pohuadeni tesse cappiramana-jaridenidsa da da quiquinanajari.

⁴⁶*Diodsa dada toquimahuaji naco jajahi tojedsima najari. Poccadeni odsahuaji naco ahuaji jipa, manaco ahuaji jipa nanaridsamana nadsapa bodideni pajissehema huatidsemaneri nanaja najaripaja.

⁴⁷–Abi Diopa bica tahi –quiquinanajari. Madija ohuahadeni naco aja Jesodsa jehe quinajarideni qqui toquinadsapa: –Bicaquiri nahi –quiquinanajari. Nadsapa ia Medsede Jeso pohuajine pohuadsa jehe quidsati denima tohuapija dsanapohui najari. Huada ssiaja madija ohuahadeni, huada ssiaja madija ohuahadeni dsanapomanajari: –Jesopa ohua tonassijahi –quiquinanajari.

Isso siri tobicahicca ima

3¹Nadsapa huada onihidsa Pedro Huano tedseje Diodsa dada toquimahuaji maji tohuenajonajari pina 3'dsa tohuededsimajari. Najari majidsa jodiodeni Diodsa huatide jajahi tojedsima najari.

²Nahidsa maqquideje isso siri nama naha tossonahipa huittajari. Pocca madija huajjiradsa ihinequemana nadsa noccobiji onini Bicani quiquinanahi inorinidsa ihinahittamana najari. Nahihuaji madija jajahi tojeqquma nadsapa: –Ohuadsa da tiquinaji –tatacossa najari. ³Nanaja isso siripa Pedro Huano tedseje huedajonahi qqii inabaqqujari. Bacco najonamandsapa: –Jari, ohuadsa dsiniro da tiquinaji –najari pohuadenidsa. ⁴Nadsapa isso siri qqii toquinadsapa Pedro pohuadsa huati tajari: –Jari, iahuaji qqii taji –najari. ⁵Pohua bodi: –Ohuadsa dsiniro da quinanjine nitide –nadsapa pohuadenihuaji qqii najari. ⁶Naraha Pedro attipa: –Ohuapi dsiniro ocappirani. ¡Nohuerani! Naraha Abi Diojine nahatohue ocajidsapi tia acco ocamanijine. Nasaretihuajicca Jesocristo onima huati onajaro. ¡Titehema-dsa ticcaridsaji! –najari. ⁷Nadsapa Pedro isso siri dsepe nahatonihuajiccadsa dama nadsa joca imadsapa toتهمajari. Diojine pohua amori, amori cocorini naqui tobicajaro. ⁸Nanaja isso siri ccaridsahi tobicadsapa joppa joppa naridsajari. Nadsapa Pedrodensama Diodsa dada toqqimahuaji toqquedsimajari. Huatidseri nadsa joppa joppa nadsa: –¡Diopa bica tahi! ¡Diopa deni tojahi! –naridsajari. ⁹Nadsapa Diodsa dada toqquma bodidsa ccaridsadsapa madija ohuahadeni qqii toquinajari. Diodsa huatidsehi naco mittamanajari. ¹⁰Najaridenipa jabojo quinaraha huatidsemanajari. Attidenipa: –A, ajaria Noccobiji Bicani quiquinanahidsa dsinirotohui huihuittacossa naccade –quinajari.

Pedro Portico de Saromodsa huati huati tajari

¹¹Naraha isso siri tobicahipa Pedro Huanodenidsa dissera tadsapa pohuadenidsa maridsanaja naridsajari. Aja Diodsa dada toqqimacca boroni inidihuaji tetepini cajini oninipi Portico de Saromo quiquinanahidsa isso siri tobicahi qqide huapima queri-qqujari. Nanidsapi tetepini cajini oninipi Portico de Saromo quiquinanahidsa madijapa: –A... ¿nejecoma najari? –naridsamanajari. ¹²Naraha Pedro madija queriquihi qqii tadsapa pohuadenidsa huati tajari: –Ohuemecote Isaraerideni ¿nejecotohui ia cattade tiqueriqquijaro? Aja isso siri tobicadsa tibodidenipi: “Pohuadeni ehuerahi dacorehe cajimanajari. ¡Nahatoto tajariraha!” ¿tiquinajaroqui? “Aja pohuadenipa Diodsa bicaquiri nadsa isso siri inabicananahi” ¿tiquinajarorane? Naraha ia ijine jarahi. Diojinena tobicajari –najari Pedro.

¹³–Icca Abi Diopa, icca idideni Abarahao, pohua bedi Isahaca, pohua bedi Jacobo quinajaridenicca Dio. Pohuajine isso siri tobicadsapa Pohua Bedi Jeso deni inanajari-paja. Najari Jesoa tijinedeni todsepe tojajaride. Tamine Pirato attipa: “Jeso tappa onadsa toccanijijine” naraha tiadenipi tettajomanadsa: “¡Ahuua porimacossanidsa dsoqquena dsoqquena!” tiquinadsa dsoqquejaride –najari Pedro. ¹⁴–Jesopa pohua bodi ssaja, pocca ima borocco taraha pohuadsa pajissa tiquinejeradsapi tamine Piratodsas huati tiquinajaro: “Barabana tappa tinajo” tiquinajarode, pohuapa toponi

nanadsoquederaha. ¹⁵Tiadeni camittehe jinede tinanadsoquemanaraha Djojine nahatonidsa Dio Pohuahuaaji toccamacossanijaride. Iapi pajissa qqui inajaroa aji nahatoqquiri inajaropaji. ¹⁶Najari Dio Bedi Jesocristo pohuajinena jidacca isso siri tobicajaripaja. Ia ettipi: “Jesopa pajissa canahatori canahi” inadsapi pohuana isso siri inabica hi qqui tiquinajaripaja – najari Pedro.

¹⁷ – Jehe occa madijadeni, tiadenidsa ohuattipi: “Tijinedeni Jeso dsoqqe jari” onaraha tibodideni ssamoqquiri napodsa tinanadsoquemanajari nahato onajaro. *Diodsa dada toqqimade taminedeni naco bodideni ssamoqquiri nadsa Jeso inanadsoquemanajaride. ¹⁸Naraha Diopa madija Tonassajade tojahijine pohua icattejidsapojari ocasserani ahuadsa dsoqqehijine nahato tapojari. Maittaccadsama Pohua Atti cacomeraquiri najaridenidsa naco *Cristo-Mesia dsoqqe hi tahimari huati tapodsa dsodo quinapojaro. Najaro imassa najaro tojajarode, pina aji Dio huati tapojarissa najaro tinanamanajaropaji.

¹⁹ – Najarojinea tiadenidsa ohuattipi: Jidapapi tibodideni cacajiquimeraji, Diodsa tiquejenaji, onajaro. Nema tiquinadsapi Dio ticcadeni imasiri sse inanitohui. Nadsapa ia Medsede Dio tibodideni jassi tonanabaqquihitohui.

²⁰ Pohua Bedi Jeso icattejidsapojari tiadenidsa dosse inaronapomahitohui. Najaria aja tiadeni Idinide Cristo-Mesia tojajaripaja.

²¹ Jidapapa Jesocristo memehua ji madicca hi, naraha nidsa Dio Pohua jipa tadsa dosse inaronapomahitohui. Nadsana dsama huapima

inabiquemaninitohui. Najaro ima naqui maittaccadsama Dio Atti cacomeraquiri najarideni dsodo quinapojaro. ²²Najaro imapi *Moisesi icca ididenidsa dsodo inapojaro:

“Ia Medsede Djojine icca madija ojaria Pohua Atti cacomerabote tojahitohui, pina ohuassa inahitohui. Najari attidsapi ibobora tinaji. ²³Naraha pohua attidsa madija ibobo tajaripa Dio ettajobaqquihitohui. Pocca madija toquejena-jarahitohui” napohui nade Moisesi.

²⁴Nadsama Moisesi dsoqqe hi natti Dio Atti cacomerabote Samohue naco najaro imassa najaro huati tajari. Aja Samohue dsoqqe hi natti naco Dio Atti cacomeraquiri najarideni huapima naco huati najonamanajari. ²⁵Nadsama tiadenipi najarideni potemahi tiquejenani. Poccadeni dsodoniji aji Dio huati tapojaricca ima bicani jidapana tiadenidsa tojajaro. *Diopa idideni tedse jehe canirepojari naqui tiadenidsa tojajaropaji. Aja idi Abarahaodsa Dio Attipa:

“Tipotemani dsotodecca naco pohuajine ajijaro dsamacca madija huapimadsa ima bicani tojaridsanitohui”

napohui nade Dio. ²⁶Najaria Dio Pohua Bedi tahide tiadenidsa dosse inaronapodsa pina madijassa naha tossonajaripajade. ¿Nejecotohui Pohua Bedi aja namihua ji dosse inaronajari? Pohua Bedijine tiadeni huapima ima bicanihua ji tiquejenanijine, aja pohuapa tiadeni acca inahuajani-baqquidsapi aji ticcadeni imasiri tinebomananijine – najari Pedro pohua imecote Isaraeri potemahidenidsa.

**Ima cattemadedenidsa Pedro
Huano tedseje bajari**

4 ¹Nadsapa Pedro Huano tedseje ima huatide toquejenaccaraha dada toqqumade motadeni bacco najonamanajari. Dada toqquma cacahuadedenicca tamine qquedsima, jodiideni mota *marinaja onini sadoseodsa jehe quinajarideni naco jahidsima najari. ²Najaridenina Pedrodenidsa huadimanajari. Pedro pohuadenipa Jesocristojine madija tocassiejerahijine tahimari maride toquejenajari. –Jesopa dsoqqueraha Diojine nahatonijaride. Pohujinepa madija naco nahatonimanahitohui –quinahi mari icanabaqquiraha taminedenipa najaro imadsa jiperaqquri nadsa huadimanajari. ³Nadsapa Pedro dama, Huano dama quinadsa toponi cocorodsa cororo idsimamanajari. Nadsapa: –Maji toccahi, dsemassana imarideni icattemanijine –quinajari. ⁴Naraha motadenipa Pedrodenijine Dio Atti mittamanadsa pajissa quinajari. Najarideni aja jehe quinapojarideni tedsejepa huapi tajari. Maqquideje pohuara 5 mil quinajari. Amonejedeni, ejedenidenipa huarahi. ⁵Huada ssiajapa imahaha canahijine jodiideni taminedeni, ime jocohuideni, jodiidenicca marinaja maridedeni quinadsa Jerosaredsa queriquimanajari. ⁶Anasa naco nahi pohuadenidsama quejemajari. Pohuapa dada toqqumadedenicca tamine deni tojajari. Pohuapa taminedenicca tamine. Caipa naco nahidsa quejemajari. Pohuapa Anasadsa: Coco, najari. Anasa pohua imecotedeni naco

nahidsa quejemamanajari. Ojaria onipa *Huano, ohuaha onipa Arejadro, denima huapi taha nahidsa quejemamanajari. ⁷Nadsapa Pedro Huano tedseje huedenadsa huedajonahijine tohuideni madija dosse quinajari. Nadsapa eccajonabaqqui-manadsa queriquimanahi nocconidsa bajari. Nadsapa pohuadenidsa huati toquinajari: –Jari, toponi tonabica-depi ¿nejecohuajicca ticahatterajarotte? Ticcadeni nahatohuepi ¿nejecohuajicca ticajimanajarotte? Aja isso siri tinabicamanajari-ica ima iadsa tecomeramanaji –quinajari taminedeni atti.

⁸Nadsapa Pedrodsa Dio Corime tojahissa tajarijine cappinera tadsa ecomerajaro: –Jehe taminedeni, ime jocohuideni, tiadenidsa huati onana. Titaharibobo canaji. ⁹Tettidenipi: “¿Nejecoma tiquinadsa isso siri tinabicamanajaritta?” tiquinajaro. Tettideni onihi naqui: “¿Nejecohuajicca dacorehedsa toponi tonabica-de ticahatterajarotte?” tiquinajaro. ¹⁰Jehe, nadsama najaro imapi tiadenidsa huati onana. Ica madija Isaraerideni huapima naco bodideni nahatoqquri nahijine huati onana. Iapi: “Pajissa Nasaretihuajicca Jesocristo atti dacorani” inajaro. Pohua onima isso siridsa: “Titehemadsa ticcaridsaji” inadsapi Jesojine isso siri tonomijaripaja. Najaria aja tobcahi qqui tiquinajaripaja. Najari Jesopa tijinedeni ahua porimacossanidra coba tidsanamanadsa dsoqqueraha Diojine nahatonijaripaja. Pohujinepa aji nahatohue icajijaropaji. ¹¹Najari Jesopa tettajomanaraha Diojine madija huapimadsa deni tojajari. Jeso tettajomanahipa pina ajijaro

imassa najaro. Najaro imapi Dio Atti dsodo nanidsa ajima najaro:

“Odsa sibadsa icanahatomana-nijinepi nanahatodedenipa siba ojariepi ettajomanani nade.

Naraha dsotodepi najaro sibana odsa daco cajiranijine tojajaro.”

Jeso attidsa teribodeni sibaqquri nadsapi najaro imassa tinanamanajaro. ¡Jesopa tettajomanaraha Diojine deni tojajaripaja!¹² Madija ohuahapa icca imasiri inatappanijine nohuerahi. Diocca daniji Jesona ia Idinide ojarijari. Dsama huapimadsa madija ohuaha ia tonassiajabaqquihijine nohuerahi. Nidsaranibote Diocca huadie tojadsapi Jeso pohuana ia dsori tonanabaqquihijine ojarijari –najari Pedro.

¹³Nadsapa Pedro Huano tedseje pohuadeni cacomeramanadsa taminedenipa huajo caniredsa: –A ¿iadsa cappinenera tajarico? –quinajari. Pedrodenicca madie tahide nahatoqquri nadsapa: –A, pohuadenipa pohuama madimancade. *Moisesicca marinaja, Dio Atti cacomeraqquri najaridenicca dsodonijidsa ssamomo taccade. Jeso huatimade toquejenadsapa tocahatterajari itidija –quinajari.

¹⁴Nadsapa taminedeni Pedro Huano tedseje idsahuabaqqui-manahitohuiraha nahi inoridenidsapa isso siri tobicahi huahi paja nadsapa apaja quinajari. ¹⁵Nadsapa Pedro, Huano, isso siri tobicahi quinadsa taminedeni dosse ininebaqqui-manajari. Nadsapa jai tojenahi nattidenipa pohuadenira imahaha canajari:

¹⁶ –¿Nejecoma inanabaqquihijine?

Naraha pohuadenijine isso siri tobicaha. “Maidsehe” inejerana. Aja Jerosarecca madija huapima qqui toquinaja nahi –quinajari. ¹⁷ –Naraha Jeso tahimari denima tojaridsa-jeranijine ajima inana: “Paji, tipamajonarana” inana, cappinamanahijine. Nadsana Jeso tahimari denima mari dsanapomana-jarahijine –quinajari taminedeni atti.

¹⁸Nadsapa Pedro, Huano, isso siri tobicahi quinajaridenitohui huahua quinapomajari. Jahidsimanipomadsa taminedeni pohuadenidsa huati toquinajari: –¡Epeje tiquinaji! Jesocristo tahimari mari maripi tinebomanaji –quinajari. ¹⁹Naraha manaco Pedro Huano tedseje pohuadenidsa huahuatiti tajari: –Diopa tettideni mittahi. “Ettidsara ibobora tana” ¿tiquinajaroqui? Nema tiquinadsapi “Dio Atti tinebomanaji” tiquinajaro nitide –quinajari. –Jari, najaro ima tibodideni huatoma-manaji. Tettideni nema tiquinadsapi ¿Diocca bica tapadseje? ²⁰Naraha iapi Dio Attidsara dissessera inanitohui. Dio Atti ecomanijinepi jipepera inani. Aji ia qqui inajaro, ia imittajaro maride inebo-jeranitohui –quinajari Pedrodeni.

²¹⁻²²Nadsapa taminedeni atti pohuadenidsa: –Paji tipamajonarana –quinajari. Denima jara inabaqquimanadsapa tappa inabaqquimanajari. Taminedenipa Pedro Huano tedseje inajidso-baqquimanahitohuiraha madijadeni noppine cappinamanajari. –Iadsa huadimananarana –quinajari. Aja Diocca canahatori canehejine isso siri tobicahi huapima

qqi toquinadsapa: –Diopa bica tahi –quinaja nadsa tamedeni cappinamanajari. Nadsama isso siripa huajano huapi taha tonomijararaha huajanori 40 denima caji-dsana tobicajari.

**Diocca dacorehe cajimanahijine
Pohuadsa huati toquinajari**

²³Nadsapa tamedeni Pedro Huano tappa inabaquimanadsapa tohuedanijari. Jesodsa jehe quinaridenidsa bacco tanimanadsapa dada toquimade tamine attideni huati, ime jochuhi attideni huati tanimanajari. ²⁴Nadsapa najaro ima mittamanadsapa huapima Diodsa huatide toquejenajari. Poccadeni huatinajapi ojariquijarossa nadsa Diodsa huati toquinajari: –Abi Dio nahatojide tijirani. Tiana meme tinahato, dsama tinahato, coridsa tinahato, huapima tinahatoridsajari –quinajari. ²⁵–Maittaccadsama naco icca ididenicca tamine Dabi aja ticca medse Ticorimejine bodi nahato tadsa ajjaro ima dsodo inapojaro:

“¿Nejecotohui madija ohuahadeni huapima huadiquiri najari?

¿Nejecotohui icca madija Isaraerideni naco tabaccorehe inamananijine bodideni huahuatoma-mana najaritta?” napohui nade.

²⁶“Aja dsama huapimacca tamedeni huadie inamananijine toqueriquidsa ia Medsede Diodsa jara jara quinajari. Madija Tonassijade tojahijine Dio icattejidsapjaridsa naco jara jara quinajari” napohui nade Dabi.

²⁷Najaro imassa najaro tojajarode. Aji Jerosaredsa queriquimanadsa tamine Herode, tamine Ponsio-Pirato, dsama onihicca madija, icca madija Isaraerideni quinadsa naco ticca Ejedeni Bicabote inandsoqqe-manahijine ima najoramanajaride. Najaria aja Jeso tiadsa ibora tajari ticattejidsapojari, ia Tonassijade Cristo-Mesia tojahijineraha pohuadsa huadiquiri nade. ²⁸Abi Dio, Tetti Dabijine dsodo nani maittararaha tamedeni najarossa inamanajaro –quinajari.

²⁹–Jidapana naqui, ia Medsede Dio, ia qqi tinabaquiji. Iadsa huadiquiri najari. Iapi ticca dodosse tabaqqi iquejenaraha iadsa jara jara quinahi. Nadsapi ticca dacorehera iadsa da taji, nani icappina-jeradsa tetti ecomeraridsanijine. ³⁰Nadsama ticca dacorehe iadsa tinanaridsadsapi comaquiri najarideni naco titinanomibaqqi najo. Ticca Ejedeni Bicabote Jeso-cristo oni deni tojahijine naco ticanahatoriri canaji, inajaro –quinajari Diodsa huati toquinadsa.

³¹Diodsa huatide jicadsapi najaro odsa jene jene canajaro. Nadsapa Dio Corime pohuadenidsa tojaridsa-hissa tajarijine cappinamanajaradsa Dio Atti ecomeraridsamanajaro.

**Huapima poccadeni
ojariquijari**

³²Nadsapa Jesodsa jehe quinarideni huapima poccadeni ima najarossa caniquimeradsapa jehe canirere canajari. Pohuadeni dsepetaji naqui pohuadeni attipa: –Ohua mottacca –quina-jarajari.

Todsepetaji, dsamatapa naco huapima poccadeni ojariquijari. Najarossa nadsa pohuadeni dsepetaji dade accoraquuri najari. ³³Nadsama Jesocca dodosse tabaqqi pohuadenipa ia Medsede Jeso nahatonih qqui toquinajaricca ima huati huati dsanapomanajari. Diocca dacorehejine attideni dacoradsapa taharibobo canajarideni bodidenidsa huana tajaro. Nadsapi Diocca huatidsehe, pocca tohuati huanehe naqui huapimadsa tojaridsajaro. ³⁴Nadsapa huapima cappiramana-jarajaripaja. Poccadeni dsama, odsa naqui cacajimaneri najaria aji dsinirotohui da da quiquinanajari. ³⁵Najaro dsiniropi Jesocca dodosse tabaqqidsa da da quiquinanajaro. Nadsapa Jesocca dodosse tabaqqipa cappiramanajaridenidsa da da ihiquimamana najaropaji.

³⁶Nadsapa madija oni Dsodse naco najarossa najaro inanajaro. Puhuapa *rehuitadeni. Dsama bedeni passo imenidsa huittidsacossani onini Sipredsa tossonajari. Jesocca dodosse tabaqqi pohuadsa: Bernabe, quiquinanajari. (Ettidsapi: Toponi nanahatidsede, inajaro.) ³⁷Bernabepa pohua madihicca dsama mota da inajaro dsinirotohui. Nadsapi pocca dsiniro Jesocca dodosse tabaqqidsa da inajaro.

Ananiapa bedimeni tadsajani ima inanamanajaro

5 ¹Naraha madija ohuaha oni Ananiapa bedimeni Sapira tadsajani poccadeni dsama da quinajaro. ²Najari madija bedimeni tadsajanipa poccadeni dsama manaconi dsiniro motapi

pohuadenidsa ecahuamanajaro. Ananiapa pohua motta dsiniro motara Jesocca dodosse tabaqqidsa dsojo idsimadsa pohuadenidsa da inajaro. Pohuadenidsa: –Aja, icca dsama manaconi dsiniro nemanehe –najari. Naraha maidsajari.

³Naraha Pedro pohuadsa huati tajari: –Anania ¿nejecotohui maidsehe jinede *Satana attidsara ibora tinadsa Dio Corime-dsa timaidsajaro? Ticca dsama manaconi motapi tinajimajaro. ⁴¿Ticca dsamapi ticca jeraqui? Ticca dsama da tinadsa ¿manaconi naqui ticca dsiniro jeraqui? Najaro dsiniropi ticcaraha ¿nejecotohui tibodidsa maidsehe tohuini tajaro? “Madija ocamaidsabaqqina” taraha Diodsana timaidsajaro –najari Pedro.

⁵Nadsapa Anania Pedro atti nama nahi mittadsapa huatiajari. Edima... bohua najari. Nadsapa Anania huatiahicca ima huapima mittamanadsapa cappinaridsamanajari. ⁶Nadsapa najaro odsacca dsabisso madimanajarideni toتهمamana, Anania assire jore inaqqimanadsa dsojo ininemanajari, ppa idsamanahijine.

⁷Nadsapa maji 3 tossoniquimadsa Anania dsoqqueraha bedimeni ssamo tadsa ccajonajaro. ⁸Nadsapa Pedro ponidsa huati tajari: –¿Ticcadeni dsama manaconipi dsiniro ajima nehe tiadenidsa da quina-jaroqui? –najari. Nadsapi Sapira attini: –Jehe, manaconi najarossa nehe da quinade –najaro.

⁹Naraha Pedro: –Jaho ¿nejecotohui Dio Corimedsa maidsadsa tinajaro? Tiadeni pamehe:

“Dio Corime nattome inana, icca maidsehe qqui tajarahi” ¿tiquinajarorane? Jari, qqui taneje, ajacca jahinijaripa ticca maqqui ppade jahinijari. Nidsa tia naqui tia ppa idsamananijine tia dsojo quinanitohui –najari.

¹⁰Naneje Sapira naqui huatiadsa edima... bohua najaro. Dsabisso jahinidsa qqui toquinaneje huatiani poneje najaro. Nadsapi poni naqui dsabissodeni dsojo ininemanajaro, maqqui inoridsa ppa idsamananijine. ¹¹Nadsapa Jesodsa toquejenajaridenidsa oppinehe imeni tojajaro. Madija huapima ima mitta-manadsapa Dio noppine cappinaridsamanajari.

Jesocca dodosse tabaqquipa canahatorimanana canajari

¹²Nadsama Jesocca dodosse tabaqquipa Diocca dacorehe pohuadenidsa tojaridsadsapi nahatoqquri najari. Canahatorimanana canadsapa Jerosarecca madija qqui toquinajari. Aja Jesodsa toquejenajaridenipa Diodsa dada toqquima boroni inidi tetepini cajini Portico de Saromo quiquinanahidsa quequeriqquimana najari. ¹³Naraha madija mota Jesodsa jehe quinarajaridenipa Jesocca madijadsa quejemamanahijine cappinaqquri naraha pohuadeni attipa: –Jesodsa jehe quinajaridenipa bicaqquri nahi –quinajari. ¹⁴Nadsapa madija mota maqquideje amoneje quinaha ia Medsede Jesodsa jehe quidsati tohuapijari. ¹⁵Nadsapa madija comaqquri najarideni huapima taborodenidsa dsojo dsojo icanajonamanajaripaja. Jahui inididsa pohuadeni taborodsa poporiri

naridsajari. Pedro tedsejema:

–Nidsa Pedro aja toqqequimadsa majidsa pohua corime pohua nahuine iadsa bacco tadsapi icanomirenitohui –quinajari. ¹⁶Madija Jerosare huajira tanidsa madimanajarideni, odsa capamema najaro onihicca, onihicca naco bacco najonamanajari, comaqquri najarideni eccajona-baqquimanajari, madija bodidenidsa Satana-cca dodosse tabaqqui tocorime cajimanajarideni naco eccajona-baqquimanajari. Nadsapa najarideni tocanomiridsajari, tocorimedeni naco jai tojenaridsajari.

Jesocca dodosse tabaqquipa najidsohue inahanamanajaro

¹⁷Naraha aja dada toqqumadedenicca tamine deni tojajaripa pocca madija tedseje comaqquri najarideni tocanomirehi ima mittamanadsapa huadimanajari. Aja pohuadenipa *marinaja onini sadoseodsa jehe quinaja najari. ¹⁸Najari pohuadenina soldado icadossebaquidsa Jesocca dodosse tabaqqui itadamamanadsapa toponi cocorodsa hua idsimamanajari. ¹⁹Naraha dsome nocconi tojadsa *Diocca dodosse memehuajicca ahuatodsapa toponi cocorocca noccobiji icatabojidsadsa iaquena-baqquidsapa dosse inanibaqqujari. ²⁰–Jai tijaniji, Diodsa dada toqqimahuaji ima huati tinanimanaji. Madija huapima camittehe jiquejeranicca cajimanahijine ima mari ticanabaqquimanana –najari Diocca dodosse memehuajicca. ²¹Nadsapa pohua attidsa iboraqquri nadsapa dsidsidsamassa Diodsa dada toqqimahuaji jai

tojedsimadsa madija mari icana-baquimanajari.

Naraha dada toqqimadedenicca tamine deni tojajaripa pohuadsa queriquimanajarideni naco Jesocca dodosse tabaqqui toponi cocorodsa jahininehi ssamoqqiri naja najari. Nadsapa jodiodenicca *ima cacattemadedeni deni toquejenajari deni queriquimanahijine huahua inabaquimanajari. Nadsapa dada toqqimadedeni mota, ime jocohuideni mota naco, aja jodiodenicca marinaja maridedeni mota jahijonadsa queriquimanajari. Nadsapa poccadeni medsedeni dosse inabaquimanajari toponi cocorohuaji. —Jesocca dodosse tabaqqui teccanibaqqui-manajo —quinajari. ²²Nadsapa jai tojajari, toponi cocorohuaji bacco toquinadsa qqui toquinaraha Pedrodeni amossihuaja najari. Nadsapa domo ccanidsa ima huati nanimanajari: ²³—Noccobijipi pico cadsacossanissa tani, bodicca noccobiji cacahuadedeni naco huahueri naridsahi. Icatabojidsadsa jaijedsimaraha Jesocca dodosse tabaqqui nohue quirapa. Qqui inabaqqui-jarahi —nanimanajari. ²⁴Nadsapa dada toqqimade taminedeni, nahicca odsa cacahuadedenicca tamine tedseje najaro ima mittamanadsapa huajo canirejari. Imahaha canadsa: —Jaho ¿nejecoma quinajari? ¿Nejeco ima tojapadseje? —quinajari. ²⁵Nanaja ojaría qquedsimadsa taminedenidsa huati tajari: —Maitta toponi cocorodsa hua todsimajaripa Diodsa dada toqqimahuajina madija maride toquejenapa —najari. ²⁶Nanaja Diodsa dada toqquimacca odsa cacahuadedenicca tamine,

pocca dodosse tabaqqui tedseje ima mittamanadsapa Jesocca dodosse tabaqquito hui jai tojajari. Bacco inabaquimanadsapa mohuaradsa jina inanibaquimanajari. Sibadsa pohuadeni iquinabaquimanahi noppine cappinamanadsapa Jesocca dodosse tabaqqui inajidso-baquimana-jarajari. ²⁷Nadsapa ima cacattemadedeni queriquimanahihuaji eccanibaqqui-manadsapa dada toqqimadedenicca tamine deni tojajari pohuadenidsa huati huati tajari: ²⁸—Madija mari mari tinebomanaji, inade. Naraha ¿nejecotohui mari mari tinebomana-jerajaro? Jidapapa aja Jerosarecca huapima ticcadeni marinaja tochatteraridsahi. Tijinedeni najari madija emene toccajaricca ima iadsa ssonarini. Aji tettidenipi: “Jodiodenijine Jesocristopa dsoqquejari” titiquina naraha ettipi: “Ijine jarahi” inajaro —najari tamine deni tojajari atti.

²⁹Nadsapa Jesocca dodosse tabaqqui tamine atti ecomeramanajari. Pedrona huati tajari: —Ia huapima Diocca madija iquejensapi tahidepi Pohuadsaha iboraqquri inanina bica tani, dsotodena madija attidsa iboraqquri inanijine. Naraha madijacca dossenijipi pina Diocca dossenijissa nejerasapi Diocca dossenijidsara iboraqquri inanina bica tani. ³⁰Abi Diopa icca ididenicca Dio. Najarijinena Jeso nahatonijaripaja. Tijinedeni ahua porimacossanidsa dsoqquedsa ppa tidsamanaraha nahatonijari. ³¹Diopa pocca dacorehe Jesodsa inanadsapi deni inanajaripaja. Dio Pohua inori nahatonihuaji Jeso inahittaridsapa Pohuajine madija huapimacca



tamine tojajari. Dio Pohuajine madija Tonassijade tojajaripaja. Ia Isaraerideni Tonassijade tojadsapa pohuajine ibodi cacajiquimeradsapi Diodsa iquejenajaro. “Icca imasiri inebona” inadsapi Pohuapa icca imasiridsa: “Ohuati ajimani” najari. ³²Iapi Jeso tahimari nahato inadsapi pajissara huati inajaro. Aji innocodsa qqui inajaro, eribodsa imittajarora tiadenidsa ecomeraridsajaro. Dio Corime naco nahato tajari pajissehera mari icanabaqqujari. Najaria aja Dio Pohua Attidsa iboraqquri najaridenidsa Pohua Corime da inaridsajari – najari Pedro, Jesocca dodosse tabaqqui tedseje.

³³Nadsapa taminedeni najaro ima mittamanadsapa nacasseraqquri nadsa huadimanajari. – ¡Jari, jicana! – quinajari. ³⁴Naraha ima

cacattemedeni queriquimanahi ojaria tothemadsa pohua tessedenidsa huati tajari. Pohuapa Moisesicca marinaja mamaride, *marinaja onini pariseodsa naco dissera tajari. Huapima pohuadsa: – Bica tahi – quiquinajari. Pohua onipa Camariego. Najari tothemadsa Jesocca dodosse tabaqqui amossinihuaji dosse imabaqqujari. ³⁵Nadsapa taminedenidsa huati tajari: – Paji, occa madija Isaraerideni. “¿Pohuadenidsa nejecoma inanijine?” tiquinadsapi mohuaradsa tibodideni huatomanaji. Ima tojarana. ³⁶Tibodideni huatoma-mananissa taji. Ajana, maittadsama onihima nadsa Teoda madicadsa pohua atti: “Ohuapi nahato onani” nanaja nadsapa madija 400 quinaha pohuadsa toquejenajaride. Naraha madijajine Teoda

dsoqueedsa pocca madija tojari-
baqquidsapa pocca ima jicaqqijarode
—najari Camarieo atti taminedeni-
dsa. ³⁷—Nahi dsotode madija onideni
dsodode toquejenadsa naco Carirea-
huajicca *Joda ccajonajari. Romano-
deni mohua inabaquimanahijine
madija inaqueriqquiraha dsoqque-
dsapa tojaribaqqijari. ³⁸Nadsama
tiadenidsa ohuattipi: Epejena, ajajari-
denipa tinebobaquimanajo, onajaro.
Poccadeni ima Diocca jeradsapi nidsa
jicanitohui. ³⁹Naraha pohuadenipa
Diocca dosseniji nitidija. Pajissa Dio-
cca ima tojadsapi Diocca ima tinajica-
mananijine ssamo tani. ¡Paji! Diodsapi
jaramana tiquinejeraji. ¡Poni! —najari
Camarieo taminedenidsa huati huati
tadsa.

⁴⁰Nadsapa Camarieo atti mitta-
manadsapa apaja quinadsa Jesocca
dodosse tabaqqi jahidsimanihijine
huahua quinajari. Nadsapa itacossi-
manadsa ipodeni da inabaqqi-
manajari. —Jidapapi Jesocristo
tahimari mari maripi tinebomanaji
—quinadsapa dosse inanibaqqi-
manajari. ⁴¹Naraha Jesocca dodosse
tabaqqipa ima cacattemededeni
queriqquimanahidsa jai tojenadsapa
huatidsemaneri toninemanajari. Jeso
onidsa toquejenajarijine najidsohue
inahanamananijine pajiramanahi
Dio nahato tapojarijine najidsohue
ecossa-jerajaro. ⁴²Nadsapa huajjira-
dsa maride toquejena-dsanapojari.
*Diodsa dada toquimahuaji maride
toquejena, poccadeni odsahuaji naco
maride toquejena dsanapomana-
jari. —Ia Medsede Cristo-Mesia-
tohui imadjaropi aja Jesocristo-
paja. Pohuadsa pajissa tiquinadsapi
ticassiejeranijine —quinajari Jesocca
dodosse tabaqqi attideni.

Dsamatapa dadadedeni
7 quinaha onideni hua
inabaquimanajari

6 ¹Jehe, nahidsapa Jesodsa jehe
quinajarideni denima tohuapija
dsanapohui naraha pohuadeni-
jine ima bica tejerajaro. Pohuadeni
huapimapa *jodiodeni. Motapa
dsama *Cresiacca madija attideni
nahatoqqiri najari, motapa pohua-
deni attira nahatoqqiri najari.
Pohuadeni atti oninipi: *ebreo.
Nadsapa dsama Cresiacca tohuatti
nahatoqqiri najaridenipa atti atti
quinajari: —Aja dsamatapa inatassa-
qquimanajaripa cappiramanajaro-
denidsa da quinahissa tajarajari
—quinajari. —Icca madija tabira
tocajamanajarodenidsa dsama-
tapa ajamani da da quiquinanajari.
Naraha jodiodeni pohuadeni atti
ebreo nahatoqqiri najaridenicca
madija tabira tocajamanajarodsana
dsamatapa denima da da quiquina-
najari —quinajari. ²Nadsapa *Jesocca
dodosse tabaqqi 12 quinajarideni
najaro imadsa jiperaqqiri nadsa
Jesodsa jehe quinajaridenitohui
huahua quinajari, ima cattemade
queriqquimanahijine. Jehe quinajari-
deni queriqquimanadsapa pohuadeni-
dsa huati toquinajari: —Ia dsamatapa
dade iquejenadsapi Dio Atti mari
inanissa tejerarana —quinajari.
³—Nadsapa dsamatapa dade toque-
jenahijine madija 7 quinaha ticatte-
jidsabaquimanajo. Pohuadenipa Dio
Corimecca dacorehe cajimanajari.
Bicaqqiri, bodideni nahatoqqiri
najaridenira dsamatapadsa dsepe-
deni ijimanahijine qqui tinabaqqi-
manajo. Iadsa teccajonabaquimana-
dsapa huapima qqui toquinadsa

pohuadenidsa: “Jehe, dsamatapa dade tiquejenana” inanijine –quinajari. ⁴ –Nadsapi iana Diodsara huati huati idsanaponijine. Dio Atti naqui mari mari ihicanabaqqi nahijine, inajaro –quinajari Jesocca dodosse tabaqqi.

⁵Nadsapa huapima: –Jehe, bica tani –quinadsapa dsamatapa dadade toquejenahijine icattejidsabaqqi-manajari. Onidenipa: Esteba, Feripe, Procoro, Nicano, Timao, Paomena, Nicora quinajari. Estebapa Jesodsa jehe nahissa dsanapojari, Dio Corimecca dacorehe naco cajijari. Nicorapa odsa panani Atioquiacca madija jodio jararaha jodiodenicca marinajadsa tojapojari. ⁶Nadsapa aja icattejidsa-baqqi-manajaripa Jesocca dodosse tabaqqi 12 quinajaridenidsa eccajonabaqqi-manajari. Nadsapa Jesocca dodosse tabaqqi baccohuaaji domo huadsa dsamatapa dadade toquejenahijine pohuadenidsa bara quinadsa Diodsa huati toquinajari. –Jehe Abi Dio, ajararideni dsamatapa dadade toquejenahijine pohuadeni acco ticamabaqqi –quinajari. Nama quinadsapa aja Jesocca dodosse tabaqqi attidenipa: –Jehe, jidapapi najaro tarabaisa pohuadenidsa tojani –quinajari.

⁷Nadsapi Dio Atti tojaribaqqijaro. Odsa panani Jerosarecca madija Jesodsa jehe quinajari tohuapijari. Dada toqqimadedeni naco Jesodsa jehe quinahi huapi tajari.

Esteba

⁸Estebapa Diocca tohuati huanehe caji, Diocca dacorehe naqui caji nadsapa canahatori canajari. Madija huapima Esteba canahatori canahi qqii qqii dsanapomanajari. ⁹Naraha

jodiodeni motapa Esteba tedseje ahuaji huati ahuaji huati quina-jari. Nahi Jerosaredda pohuadeni quequeri-quimana nahihuaajicca oninipi: Medse toquejenaporaha tappa tabaqqi-hicca icanacanimanajaro. Pohuadenipa odsa Sirenecca, odsa Arejadriacca, dsama Cilicia-huaajicca, dsama Asiahuaajicca quina-jari. ¹⁰Najaridenipa Esteba tedseje ahuaji huati ahuaji huati quinaraha deni toquejena-jaraha. Dio Corimejine Estebapa nahato tajari, atti bica tajari. ¹¹Nadsapa pohuadeni atti ajimani tojadsa Estebadsa huadimanadsapa ima inanaridsa-mananijine cacomehedsa madija ohuahadeni paca inabaqqi-manajari. Pohuadenidsa: –Ajima tiquinaji –quinajari. –Esteba atti imittadsapi pohua atti tabaccora tadsa Moisesicca marinajadsa tatamasso najari. Diodsa tatamasso nahi naco imittani, tiquinana –quinajari. ¹²Nadsapa imasiri huahuatidedeni jai tojaridsadsapa najaro ima madija huapimadsa huati naridsamanajari. Ime jocohuidenidsa, jodiodenicca marinaja maridedenidsa naco huati toquinajari. Nadsapa huadimanadsa domo ccajonajari, Esteba dama quinadsapa jodiodenicca ima cacattemedenedeni deni toquejenajaridenihuaji iaccamanajari, ipo da quinahijine. ¹³Nahihuaji Estebadsa huadimanajaridenipa madija ohuahadeni maidsehe huati toquinahijine qqii inabaqqi-manapomajari. Najarideni attidenipa: –Aja Estebapa Diodsa dada toqquimadsa Moisesicca marinajadsa naco atti tabaccora tadsa huati huati tajari –quinajari. ¹⁴ –Ima onihi naqui huati tadsa imittajaro, aja Nasarethuaajicca Jeso

attipa ajima nani najari: “Diodsa dada toquimapi madijadenijine canahatoraha ocatabona” nanaja najari. “Jodiodenicca madie tahidecca aji Moisesi icca idideni mari icanabaquipojaricca ima naqui ojine cacajiquimerana” nanaja najari –quinajari, maidsamanadsa.

¹⁵Nadsapa aja ima cacattemadedeni, Estebadsa huadimanajarideni naco huapima Esteba icattomamana nadsapa pohua pano todsibehia, pina Diocca dodosse memehuaicca panossa nahi qqui toquinajari.

7¹Nadsapa dada toquimadedenicca tamine deni tojajaripa Estebadsa huati tajari: –Aja madija huati toquinajari attidenipa ¿pajissaqui? –najari.

²Nadsapa Esteba huati tajari: –Ohuemecotedeni, taminedeni tedseje, titaharibobo canaji, occa ima huati onana –najari. –Icca Abi Dio Bicabote deni tojajari pohuapa icca idi *Abarahaodsa ahuatopojari. Aja Abarahaopa Mesopotamiadsa madiccadsa odsa panani Aranahuaji tocca-jaraccadsa Dio pohuadsa huati tajari. ³Pohua attipa: “Jari, ticca dsama tinebo, ticca madija tinebo-baqqui najo. Dsama onihi tia dsopi ocanadsa nanihuaji ticcaji, nanidsana timadinijine” najari Dio. ⁴Nadsapa Abarahao caldeadenicca dsama Mesopotamiadsa madiporaha inebodsa odsa panani Aranahuaji toccajari. Bacco tadsapa nahidsana madijari. Nahidsa pocca abi Tera dsoqquedsapa odsa panani Arana inebodsa aji icca dsamahuaji Dio Abarahao dosse inajonajari –najari Esteba.

⁵–Naraha Abarahao ahuaaji bacco nadsapa pohua madihijinecca dsama Dio pohuadsa da inejeraccani. Madija

ohuahadenicca dsamadsa madiccajari. Ejedeni naco cappiraccajari. Naraha Dio Attipa ajama najari: “Abarahao, nidsa dsotode ajijaro dsamapi ticca dsama tojanijine, tipotemanicca naqui tojanijine” najari. ⁶Ima onihi naqui Abarahaodsa Dio huati tajari: “Nidsa tipotemani naco dsama onihidsa madiridsamanahitohui. Najaro dsamadsa madiridsamanadsapa nahicca *madijacca dodosse toquejenahitohui. Pohuadeni dossedenidsa tarabadsa dsanapomandsapa huajano 400 naha nanajidso toquejena-dsanapoccahitohui” nahi nade Dio. ⁷“Naraha ticcadeni madija nanajidsodedenipa manaco Ohuana onajidsobaqquihitohui. Tipotemani najaro dsamadsa ojine jahininedsapa ajijaro dsamadsa bacco najonamahitohui. Nadsapa ajijaro dsamadsa Ohuattidsa iboraqquri nadsapa Ohuadsa huahuatidsemana nahitohui” nahi nade Dio Abarahaodsa –najari Esteba. ⁸–*Diopa Abarahao tedseje jehe canirejari. Najaro jehe canirenijipi Abarahaocca madija Dio Pohuadsa toquejenahi ahuatopojari nahijine Diopa Abarahao icadossejari. Pohua Attipa: “Abarahao, tia, ticca madijama occa madija tiquejenani ahuaato tanijinepi *huissinaja ticajimanana” najari. Nadsapa pohua bedi Isahaca tossonadsapa huadari 8 nadsa imehijine Diocca tojahi ahuaato tahijinecca huissinaja cajijari. Dsotode naco Isahaca pohua bedi *Jacobo tossonadsa najari naco huissinaja cajijari. Jacobo bedi 12 quinajarideni naco huissinaja cajimanajari. ¡Najaridenipa ia Isaraeri potemahideni icca idideni paja! –najari Esteba.

⁹–Aja icca idideni Jacobo bedidenipa pohuadeni ohuaha Josedsa

huahuadimana najari. Nadsapa huadiedsa da quinajaripaja. Da quinadsapa aja mitta quinajaridenina dsama Ejitohuaji iaccamanajari. Naraha Diopa Jose ecahuajari. ¹⁰ Jose tossiadjadsapa Diojine pohuadsa ocassera tanicca jicajaro. Diojine naco Jose nahato tajari, pohua atti naco bica tajari. Nadsapa Ejitodeni cca tamine Diojine Josedsa huati huana tajari. Najari taminedsa: Paraho, quiquinanajari. (Ettidsapi: tamine, inajaro.) Nadsapa Parahojine Josepa Ejitocca dsama cacahuade tojajari. Parahocca odsa naqui ecahua, pohua dsepetaji ecahua, pocca dodosse tabaqqi naco ecahuabaqqijari – najari Esteba.

¹¹ – Nadsapi Ejitohuaji pemi tojajaro. Jacobocca dsama Canahuaji naqui najarossa najaro. Nadsapa huapima pemijine ocasserani ahuanadsapa oji quinajari. Najaria aja icca idideni dsamatapa cappiramanadsa pemimanajaripaja quinade. ¹² Naraha Jacobo “Ejitohuaji dsamatapa huemahi” quinahi mittadsapa nahihuaji pohua bedideni aja icca idideni dosse inabaqqijari. Jai tojadsapa dsamatapa mitta quinadsa eccanimanajari. ¹³ Naraha Ejitohuaji dsamatapa mittade jai tojapomadsana Jose pohua cacomerajaripaja: “Ohuapi ticcadeni eso ojani” nahi nade Jose ohuahadenidsa. Nadsana tamine Paraho Josecca madija tahimarideni mittajari. ¹⁴ Nadsapa Jose pohua ohuahadeni dosse inanibaqqijari: “Occa abi, pocca madijama teccajonabaqqi manana, ajidsa timadimananjine” nahi nade. Nadsapa Jacobo pocca madija 75 quinajarideni Ejitohuaji jai tojajari quinade. ¹⁵ Najaria Jacobo pocca

madijama Ejitohuaji toccajaripaja, madimanahijine. Nadsapa nahidsana Jacobo huatiajari, pohua bedideni aja icca idideni naco nahidsana jicajari. ¹⁶ Potemahidenipa biridideni assiredeni jadsimana-jarahijineccadsa huira quinadsapa ecahuabaqqi manajari. Nahi dsotode huajano huapi tadsana ppa idsabaqqi manahijine odsapanani Siquemehuaji iaccanibaqqi manajari. Nanihuaji maittaccadsama poccadeni idi Abarahaona Amoro bedidenidsa dsama mitta inapojaro, tonoccobirijine quinade. Nanidsana siba odini hui todsanidsa biridideni hua idsaridsamanajari quinade – najari Esteba.

¹⁷ – Maittaccadsama aja Abarahao madidsama Dio Attipa pohuadsa: “Ajijaro dsamapi tipotemanicca tojanijine” napohui nade. Dio huati tapojaricca tohuajirabote nadsa icca madija Isaraeridenia nahi Ejitohuaji tohuapijaripaja quinade. ¹⁸ Naraha huajano huapi taha tossoniquimadsa Ejitocca tamine ohuaha tojajaripapina tamine tahideccassa najarajari. Aja Jose naco dsoqqedsapa tamine tojedsatipa Josecca ima ssamo tajari. ¹⁹ Najari taminepa icca idideni ihicamidsabaqqi najari, ihinajidso baqqi nanaja najari quinade. Pohua atti naco: “Aja maqquideje bedi tossonadsapa titinebomana najo, jicahijine. Nadsana tohuapi-jarahijine” nanaja nahi nade Ejitocca tamine atti – najari Esteba.

²⁰ – Nadsama najari tamine madidsa Moisesi tosso najari. Ejedeni tojapodsama Diopa pohuadsa huati huana tajari. Imehipa bedimene tadsajani poccadeni ejedeni abadsico 3 canaha odsadsa inajimanajari, dsoqqehi noppine.

²¹ Nahi dsotodepa hueni inidihuaji quiquidsa podsa nadsa icanebo-manajari. Naraha tamine Paraho bedenina qqui inadsapa dsojo inani-jari, inanapihijine. Pina ponicca ejedenissa inanajari. ²² Najari Moisesi napidsapa pina Ejitocca madijassa najari. Pohua mari icanamana-dsapa Ejitocca tohuattehe huapima tohuattajari. Nadsapa huatide nahato, dsepe ijih naco nahatojide rajari-paja. ²³ Najaria aja Moisesi pocca huajano 40 bacco tadsana pohua bodipa: “Occa madija Isaraerideni qquide occaridsana” najari nade. ²⁴ Nadsapa Moisesi qquide ccaridsa-dsa Ejitocca madija Isaraeri dsabisso inajidsohui qqui tajari. Isaraeri dsabisso ima cappiraraha inajidso-dsapa Moisesi: “A, occa madija acco ocamana” nadsa Moisesipa Ejitocca madija inanadsoqqe-jari. ²⁵ Aja Moisesi pohua bodipa: “Jidapanana occa madija nahato-qquiri nahi. Ohuapi occa madija Isaraerideni nanajidso toquejena-dsanapo-jarahijine Dio ohua cadosse-jari” najari nade. Naraha pocca madijapa pohuadsa ssamoqquri najari. ²⁶ Huada ssiajadsa Moisesi toccapomadsa naco Isaraerideni pamaha pohuadenira cahadirehi qqui tajari. Nadsapa cahadire-jarahijine: “Onajonebaquina” najari. Nadsapa pohuadenidsa huati tajari: “Epeje tiquinaji. Tiadenipi tia tiadeniraraha ¿nejecotohui ticanajidsorejaro?” najari Moisesi. ²⁷ Naraha nanajidsode huadidsapa Moisesi cco inaccosajari. “¿Nejecojari tia cadossedsa ia huatide ticcajonajaro? ¿Tiapi icca tamine tijajarorane?” najari. ²⁸ “¿Tiapi ohua tinanadsoqqenijinequi? ¿Pina maitta Ejitocca madija tinanadsoqqejarissa

onanijinequi?” nahi nade nanajidsode atti. ²⁹ Nadsapa: “Ejitocca madija tinanadsoqqe-jari” nahi ima Moisesi mittadsapa cappinadsa joppa tajari. Dsama onini Madianahuaji madihijine toccajari. Nahicca madijapa pocca madija quejena-jararaha pohuadenidsa madidsapa amoneje cajijari. Ejedeni naco maqqui pamaha cajijari –najari Esteba.

³⁰ –Nahi madianadenicca dsamadsa huajano 40 naha madijari. Najaro dsama huamonihuaicca ssono oninipi Sinahi. Nahi adami huajira tanidsa ccaridsadsapa ahua bedeni poni ehuerani diji tani qqui tajari. Nani ahua diji tani bodidsa Diocca dodosse memehuajicca ahua-tohui qqui tajari. ³¹ Nadsapa Moisesi jabojo najari: “¿Nejecotohui nema najaro?” najari. Nadsapa qquide tohuajiressidsa ia Medsede Dio Atti mittajari: ³² “Ohuapi Dio. Ticca idideni Abarahao, pohua bedi Isahaca, pohua bedi Jacobo quinajaridenicca Dio o-jani” nahi nade Moisesidsa. Nadsapa Moisesi jororo cananihuaji atti mittadsapa cappinajari. Tacca-cca canadsapa jororo cananihuaji qqui nimani-jarahi nade –najari Esteba.

³³ –Nadsapa ia Medsede pohuadsa huati tajari: “Ohuadsa: ‘Deni tijani’ tadsapi temoricca sadaria ssititi ticanajo. Aji tenihuajipi ssiqui bica tajaro. Ajidsapi Ohua ohuajaro” najari Moisesidsa. ³⁴ “Occa madija Isaraeridenipa Ejitodenijine nanajidso toquejenahi qqui onani, bodideni oji quinahi naco ohomittanani. Najaroa aji occaronajaropaji, occa madija odinibaqquihijine, onadsa. Ejitodenicca najidsohue inahanamanadsanapo-jerani-jine, onajaro. Jari, ticcaniji. Ejitohuaji

tia dosse onanina” nahi nade Moisesidsa –najari Esteba.

³⁵ –Tahidepa Isaraerideni Moisesi ettajomanadsapa: “¿Tiapi icca tamine tijajarorane?” quinaporaha Diopa Moisesi Isaraeridenicca tamine tojahijine tohui incomajari. Moisesi pocca madija idinibaqquihijine Dio pohuadsa huahua najari. Aji ahua bedeni diji tehe jororo canani bodidsa Diocca dodosse memehujicca ahuatodsapa Diopa Moisesi pocca madijahuaji dosse inanijaripaja.

³⁶ Moisesipa icca idideni Ejitohuaji eqquenabaqquijari. Pohuapa Diocca nahatohue cajija nadsa canahatori canaridsajari. Aja tahide Ejitodsapa canahatori canajari, dsotodepa aji coridsa imeni oninipi Macconi quinahidsa naco canahatori canajari. Dsotode aji dsama huamonihuaji huajano 40 naha eccaridsa-baqquidsa naco Moisesipa canahatori canaridsajari. ³⁷ Icca idideni Isaraeridenidsa ajama napojari: “Nidsa Diojine icca madija ojaría Pohua Atti cacomerabote tojahitohui, pina ohuassa inanahitohui” nahi nade.

³⁸ Moisesi naco pocca madija aja icca idideni Isaraerideni tedseje madija madide nohuerahihuaji madiridsamanajari. Pohua naco Dio Atti mittade ssono Sinahihuaji toqqemorajari. Nahi ssonodsana Diocca dodosse memehujicca atti mittadsa icca ididenidsa huati iqqumajaro. Najaropi Dio Atti iadsa camittehe da inanijinecca. Najaro ima iadsa bacco najonajaropaji –najari Esteba.

³⁹ –Naraha icca ididenipa Moisesi attidsa iboqquri najari. Moisesi ssonohuaji Dio Attitohui toqqemoradsa nattipa pohuadsa huattajoqquri najari. Bodidenidsapa:

“Ejitoahuaji imadiniccaraho” quinjari nade. ⁴⁰ Nadsapa Moisesi ohuaha *Araodsapa huati toquinajari: “Jari, ia cacahuade icajinijine corime tinahatoridsajo, inajaro. Najaridenina itedsejema ia tocanahatobaqquidsa jajamissanijine” quinjari. “Moisesipa Ejitodsapa imadiraha ia jina najonabaqquiraha ssonohuajiccani-jaraha. Huatijari ranaja” quinjari. ⁴¹ Nadsapa pohuadeni cacahuade bohui bedi corime orodsa inahatomajaro. Nadsapa edede inanadsoqqe-manadsa poccadeni nahatonaja baccuhuaji botta quinjari. “Ajima inadsana ia cacahuade huatidsehitohui” quinjari. Poccadeni nahatonajaraha najaridsa queriqquidsa huatidsemanajari nade –najari Esteba.

⁴² –Nadsapa pohuadenijine ima nema nadsapi Dio pohuadenidsa apaja najari. Aja pohuadeni motta Dio jiraha madimanadsapa maji, abadsico, abadsico bedi najaridenidsara: “Ia cacahuade” quiquinanajari. Najaro imapi Dio Atti cacomeraqquri napojarideni dsodo quinapojaro:

“Isaraerideni, madija madide nohuerahihuaji huajano 40 naha jai tijaridsaraha ¿Ohuadsa bani ono tojahijine da da tiquinattaco? Nohuerade. Ohuadsa da da tiquinajarade” nahi nade Dio.

⁴³ “Naraha dsama onihicca dio pohuamacca, aja ‘maji cacahuade’ quiquinanajari onipa Morocadsara tetetidsemana nadija. Pohua corime pohua tadsaridsa huadsajari tinahatomanadsa teccaridsamanadsapa pohuadsa tetidsemanadsa ‘ia medsede’ titiquina nadija.

Dio pohuamacca ohuaha naco
 ‘abadsico bedi cacahuade’
 quiquinanajari onipa Repana.
 Najaricca abadsico bedi
 corime ticanahatomanadsa
 naco tipitodenidsa jassi jassi
 tinadsa naqui ‘ia medsede’
 titiquina nadija.

Nema tiquinadsapi dsama
 onihicca *medse tiquejena-
 nijine tiadeni dosse onaba-
 qqunitohui. Ajicca dsama
 Babironia denihuaajina tiadeni
 onebobaqquinijine, ohuadsa
 iboqquri tiquinadsapi”

napohui nade Dio Atti –najari Esteba.

⁴⁴Nadsapa Esteba denima huati huati
 tajari: –Nadsama icca idideni naco
 madija madide nohuerahihuaji madi-
 ridsamanadsapa Dio Pohua tadsari
 eheccaridsamana najaro quinade.
 Najarodsana Dio Attipa: “Tiadenidsa
 omadijaro” nahi ahuato inanaridsa-
 jaro. Diopa Moisesi icadossedsa Pohua
 tadsari icca idideni icanahatomanajaro.
 Pina *Dio tadsari corimani Moisesidsa
 nohue icanapojarossa najaro bani etero
 ssequi nahidsa icanahatomanajaro
 quinade –najari Esteba.

⁴⁵ –Najaro Dio tadsaripi icca idideni
 potemahideni ecahuajonamanajaro.
 Dsotode ididenicca dsama tojanijine-
 huaji Josohue eccajonabaqquidsapa
 Dio tadsari bani etero ssequi nahi-
 cca naco eccajonamanajari. Ajijaro
 dsamadsa bacco najonamanadsapa
 madija ohuahana madimanahira qqui
 toquinajari. Naraha jadsire inana-
 manadsapi Diojine deni toquejena-
 jari. Ajadsa icca idideni madimanahi
 huajano huapi taraha Dio tadsari
 cajimanahi paja naccahi. Dsotode
 Dabi icca idideni Isaraeridenicca
 tamine tojadsa naco icca ididenipa

Dio tadsari bani etero ssequi nahi-
 cca inebomana-jaraccahi quinade.

⁴⁶Nadsama Diopa Dabidsa huati
 huana tajari. Dabi pohua naco Dio-
 dsa huati huana tadsapa Pohuadsa:
 “Jehe Abi Dio, tiapi icca idi Jacobo-
 cca Dio tijani. Tiadsa odsa bicani
 ocanahatona, nanidsana timadinijine.
 Nanidsa naqui ia Isaraerideni tiadsa
 ehetidse dsanaponijine” napohui nade
 tamine Dabi atti. ⁴⁷Naraha Diopa
 jehe najarajari. Dabi bedi Saromona
 Diodsa odsa bicani icanahatojaro
 quinade. ⁴⁸Naraha icca Dio meme-
 huaji madijaripa: “Madijadenicca
 nahatonijidsapa omadina” najarahi.
 Dio Atti cacomerabote Isahia dsodo
 inaponipi ajima najaro:

⁴⁹⁻⁵⁰ “Ohuapi Dio. Meme, nami,
 huapima aniridsajarocca
 ohohuacahua najaro.

Memepi occa huihuittari.

Nanidsana occa cacahuete
 cacahuade ohuittarijaro.

Namipi ohuamori cabarinijinecca
 huihuittari bedenissa najaro.

¿Ohuadsa odsa bicani tica-
 nahatomananijinequi?”
 nahi nade ia Medsede.

“¿Nejecohuaji omadinijine
 pajirani?

Nadsa Ohuana meme, nami,
 huapima onahatoridsajarode”
 nahi nade Dio.

⁵¹Nadsapa Esteba nahidsa queri-
 qqimanajaridenidsa denima huati
 tajari: –¡Naraha tiadenipi tibodi-
 deni iboqquri, teribodeni siba-
 qquri nani! ¡Dio Corimedsa naqui
 huattajojo tinani, pina ticcadeni
 ididenissa tiquinani! ⁵²Aja ticcadeni
 idideni ¿Dio Atti cacomeraqquri
 najarideni ihinajidsobaqqumana
 najarattaco? Ihinajidso-baqqumana

najari. Ihinajica-baqquimana najari naco. Dio Atti cacomeraqqiri najari-denipa Dio Attira huati toquinaja najonapohui. Najaria aja madija Tonassiajade Bicabote ccajonahitohui quiquinanajaripaja. Najaria Mesia quiquinanajaripa pocca ima borocco, Diodsa ibora tajaripaja. Nadsama najaro imapi pajissa tojajaroa aja Cristo-Mesia ccajonajaripajade. Najaria ccajonedsatiraha Pohua Attidsa jehe tiquinejeradsa dsoqqe-hijine teccoramanadsapa tinana-dsoqqemanajaripajade. ⁵³Tiadenipi Moisesicca marinaja ticajimanani, aji Diocca dodosse tabaqqui memehuajicca Moisesidsa da quinajaro. Naraha pocca marinajadsa naqui iboqquri tiquinajaro –najari Esteba.

⁵⁴Najaro ima taminedeni mittamanadsapa panodeni todsahi nadsapa huatideni jamijari.

⁵⁵Naraha Estebapa pohua bodidsa Dio Corime tojahissa tajarijine memehuaji qqui tamacossadsa Dio ssiejene qqui tajari. Jesocristo

Imehi inori nahatonihuaji huahi naco qqui tadsapa pohuadenidsa huati tajari: ⁵⁶–¡Qqui! ¡Meme-huaji tohuabani qqui tiquinaji! Madija Bedi pohua Imehi Dio inori nahatonihuaji huahi qqui onahi –najari Esteba. ⁵⁷Naraha denima mittamanahijine jiperaqquri nadsa pohuadeni huaribo moda quina-dsa johuahua johuahua canajari. Estebadsa ssonarimanadsapa dama quinajari. ⁵⁸Nadsapa inanadsoqqe-manahijine odsa panani idenihuaji iaqquenamanajari, sibadsa iquinaqquimanahijine. Esteba quinade ppahuaqquri nahijine poccadeni etero motaranicca ssiti quina-dsa madija ojaría oni Saorodsa da inaqquimanajaro, ecahuanijine. Nadsapa sibadsa iquinaqquimanajari. ⁵⁹Iquinaqquimanajaja: –Jehe ohua Medsede Jeso, ocorimepi tiadsa tojana –najari Esteba. ⁶⁰Nadsapa pohua pitodsa huitta nadsa jadsirema huati tajari: –Ohua Medsede, poccadeni imasiri



manaconi pohuadenidsa tinana tejeraji – najari. Pohua atti nama nadsapa huatiajari.

8¹⁻²Nadsapa Saoro Esteba dsoqquehi qqui tadsapa huatidsejari. Naraha madija Jesodsa disseraqqiri najaridenina Esteba dsoqqedsapa ppa idsamanajari. Nadsapa Esteba tohui huatidene huanaqqiri nadsa huapima oji quinajari.

**Jesodsa jehe quinajaridene
najidsohue noppinene
tojaribaqqijari**

Nadsapi najaro huadadsa Esteba dsoqqedsapa Jerosarecca Jesodsa jehe quinajaridenidsa najidsohue tojaridsajaro. Nadsapa jehe quinaridene huapima nanajidso toquejenadsapa tojaribaqqijari. Naraha Jesocca dodosse tabaqqi 12 quinajaridenipa domo toccabaqqijarajari. Aja domo toccabaqqijaridenipa dsama arobeni Jodeahuaji jai toja, dsama arobeni *Samariahuaji jai toja najari. ³Naraha Saoropa jehe quinaridene Jeso tahimari nebomanahijine dissera tajari. Odsa huapimadsa toqqedsimaja naridsapohui nadsapa maqquidejedene itadama, amoneje itadama naridsadsa toponi cocorohuaji joca joca inabaqqidsa hua hua ihidsimabaqqi najari.

**Dsama arobeni Samariadsa
Jeso tahimari mari
icanabaqqijari**

⁴Naraha aja Jerosaredda domo toccajaridene odsa onihihuaji bacco taridsamanadsapa *Jesocristo tahimari icassiejeranijinecca eccoraridsa-manajaro. ⁵Feripe naco

najidsohue noppinene joppa tajari. Pohuapa Samariahuaji toccadsa odsa panani bacco tadsapa Jesocristo tahimari maride tojajari. ⁶Nadsapa Diojine Feripe canahatori canahi qqui toquinadsapa nahicca madija huapima pocca marinaja mittamanahissa tajari. ⁷Aja canahatori canadsapa madija bodidenidsa Satanacca dodosse tabaqqi tocorime cajimanajari naco inanomibaqqijari. Madija bodidenicca tocorime jahininedsapa johua johua quinajari. Madija isso siritidene naco inanomibaqqijari. Madija idedeni tone biqueradsa issodene ssomi toquejenajaridene naco inanomibaqqijari. ⁸Feripejine nama nahi qqui toquinadsapa nahiodsa pananicca madija huatidsemanajari.

⁹Naraha nahidsa naco dsoppi-neje madijari, onipa Simao. Pohua attipa: – Ohuapi dsoppi-neje nahatojide ojirani, ojari onani – nanaja najari. Samariacca madija ihicamidsabaqqi nadsapa – A, nahato tahi – quiquinanajari. ¹⁰Nadsapa Simaodsapa madija huapima ejedenidene naco attidene: – Ajararipa pina Diossa najari – quinadsapa pohua onipa Diocca Nahatohue Dacorabote icanacanimanajari. ¹¹Huajano huapi taha canahatori cacana nadsapa pohuadsa pajissa quiquinanajari. ¹²Naraha Feripepa Diocca cacahuehecca ima bicani huati huati tajari. Jesocristo onina deni tojajari huati huati tadsa naco mittamandsapa manaco najaro imadsana pajissa quinajari. Jesodsa pajissa quinadsapa maqquidejedene amonejedene naqui passodsa topa

idsanabaquijari. ¹³Nadsapa Simao naco Jeso tahimari mittadsa jehe nadsapa totopa cajijari. Nadsapa Feripedsa ccaridsajari. Feripe canahatori canaridsahi Simao qqui tadsapa: –A... bica tahi –najari.

¹⁴Nadsama Jesocca dodosse tabaqqi Jerosarelsa madimanageri ima mittamanajari: –Samariahuajicca madijapa Dio Attidsa pajissa quinahi –mittamanadsapa Pedro Huano tedseje Samariahuaji tohuedahijine dosse inabaquimanajari. ¹⁵Nadsapa tohuedajari, nahi Samariadsa bacco toquina dsapa Diodsa huati toquinajari, Pohua Corime madija bodidenidsa tojaridsahijine. ¹⁶Aja Feripe mari icanabaquipedsa ia Medsede Jeso onidsa totopa cajiridsamanaporaha Dio Corimepa pohuadenidsa tojaraccajari. ¹⁷Naraha Pedro Huano tedseje pohuadenidsa bara quina dsa Diodsa huati toquinadsapa Dio Corime bodidenidsa tojaridsajari.

¹⁸Naraha pohuadenidsa bara quinadsa Dio Corime bodidenidsa tojaridsahi Simao qqui tadsapa najaro nahatohue tohuini nadsa: –Tiadenidsa dsiniro da onana –najari. ¹⁹Pedrodenidsa huati tajari: –Ohuadsa ticcadeni nahatohue da tiquinaji, onajaro. Ohua naqui aji ticcadeni dacorehessa onanijine. Madijadsa bara onadsa Dio Corime pohuadenidsa tojaridsa nana –najari Simao. ²⁰Naraha Pedropa pohuadsa huati tajari: –¡Paji! Tibodipi: “Diocca daniji dsinirodsa mita onana” tadsapi tia ticca dsiniroma najidsohue jiquejeranihuaji ticcanitohui. ²¹Tibodicca tabaccorehepi Diodsa ahuato tajaro. Nema tadsapi Diocca daniji tiadsa

toja-jeranitohui. ²²Jari, tibodi nema dsanapo-jeranijine ticca imasiri tineboji. Tibodicca tabaccorehe jicanijinepi ia Medsedesa huati tinaji. Pohua jipa tadsa ticca imasiri epeje inananitohui. ²³Tibodidsa icca nahatohue acconi tedini nahato onani. Tiapi ticca imasiri tia jore naquijarossa najaro –najari Pedro Simaods.

²⁴Nanaja Simao: –Jaho, jidacca huati tiquinajaro aji dsiniroma najidsohuehuaji oqqejeranijine ohuadsa Diodsa huati tiquinaji –najari Pedrodenidsa.

²⁵Nadsapa nahi Samariadsa Jesocca dodosse tabaqqipa Jesocristo tahimari maride nama dsanapomanajari. Aja pohuadeni qqui toquinajaricca mittamanajaricca naco huati huati totoquina najari. Nadsapa odsa panani Jerosarehuaji jahinidsa naco aja Samariacca odsa capamema naridsanihuaji Jesocristo tahimari icassiejeranijinecca maride toquejena nanijari.

**Feripe dsama Etiopehuajicca
tamine bijini accode tedseje
bacco tocanirejari**

²⁶Nahi dsotode naco Diocca dodosse memehuajicca Feripedsa ahuatods a huati tajari: –Feri pe, aji coridsa imenihuaji tiqqedsippaji, madija madide nohuerahicca jahuihuaji ticcana. Najaropi Jerosarecca jahui odsa panani onini Gasahuaji toccajaro. Nadsapi Gasahuajina ticcaji –najari. ²⁷Nadsapa najaro jahui Feripe toccadsapa dsama Etiopehuajicca madija qqui tajari. Pohuapa Etiopocca tamine bijini accode deni tojahicca. Nahato tajari. Etiopocca dsiniro naqui pohuana



ecahuajaro. Pohuapa Diotohui nadsa Jerosarehuaji ccajonajari, Diodsa dada toquimadsa huatidsehijine. ²⁸Nadsapa pocca odsa Etiopehuaji toccanijari. Pocca nami jojoppade-dsa tohuittarinidsa bojo joca icananimanadsapa maittaccadsama Dio Atti cacomerabote Isahiajine dsodo nani hua hua tanihari. ²⁹Nadsama Feripe tedseje bacco tocanirebote nadsapa Dio Corime Feripedsa huati tajari: –Jari, huassinaja ticcadsa ajicca nami jojoppade inorinina tianaji –najari. ³⁰Nadsapa huassinaja toccamissajari, bacco tajari. Nadsapa tamine bijini accode inorina toccanidsapa Isahiacca dsodoniji hua hua tanihi mittajari. Nanaja Feripe huati tajari: –¿Nija, najaro ima hua tadsapi timittanissa taqui? –najari. ³¹Naraha tamine

bijini accode attipa: –Ohua maride nohueradsapi ¿nejecoma nadsa omittanijine? –nadsapa Feripedsa huahua najari: –Nija, ticcamaroji, ipahimarina –najari. ³²Aji Dio Atti hua inajaropi ajima najaro:

–Pohua iaccamanajari, pina edede inanadsoque-manahijine pohua dsodsoqqe nahihuaji iaccamanajarissa najari. Pohua najidsode baccodenihuaji didi najari, pina edede cone beri quinadsa didi najarissa najari.

³³Pohuapa ajamani inanamajari. Imasiri caji najararaha imasiri manaconi pohuadsa inamanadsapi inandsoqqemanajari.

¿Nidsaranibote pohua potemahi tahimarideni huatide anipadsaja? Nohueranitohui.

Pohua potemahi cappiraha
 dsoqqedsapa ajijaro dsama-
 dsa amossi najari –nahi nade
 Dio Atti.

³⁴Nadsapa Etiopehuajicca tamine
 bijini accodepa Feripedsa huati
 tajari: –Jari, ohua mari ticanaji.
 Isahiacca dsodonijidsa ¿nejeço
 madijara pina ededessa nahijine?
 ¿Isahia pohua itide, madija ohuaha-
 rana? Ssamo onani –najari tamine
 bijini accode. ³⁵Nadsapa Feripe
 najaro Dio Atti aji Isahiacca dsodo-
 nijidsa Jeso tahimari huati huati
 najonajaripa aji Jesojine icassiejera-
 nijinecca ima bacco tajaro.
³⁶Nadsapa denima tohuedadsapa
 passo qqui toquinajari. Tamine
 bijini accodepa: –Ajicajaro passo-
 dsa *totopa ocajinijine ¿oppinera
 taqui? –najari. [³⁷Nadsapa Feripe
 atti: –Pajissa jehe onani tadsapi
 oppinera tani –najari. Nadsapa
 tamine bijini accodepa: –Obodipi:
 Jesocristopa Dio Bedi onani
 –najari.] ³⁸Nadsama Feripe jehe
 nadsa tamine bijini accodepa pocca
 nami jojoppade cahittahijine huati
 tajari. Cahittadsa tohuededsippadsa
 Feripe tamine bijini accode topa
 idsanajari. ³⁹Nadsapa topa, idi-
 mora nadsa huedemorahiraha Dio
 Corimejine Feripe amadsati dsama
 onihihuaji toccajari. Naraha tamine
 bijini accodepa Feripe qqui imani-
 jararaha pohua motta tohuatidseni-
 jari. ⁴⁰Naraha Feripepa odsa panani
 Asotodsana ahuatomajari, huaji
 taraha. Nadsapa Asotodsana joppema-
 dsa odsa capamema naridsanihuaji
 naqui Jeso tahimari icassiejera-
 nijinecca mari mari naridsajaria
 odsa panani Sesareahuaji naqui
 huaji taraha bacco tajaripaja.

Saoro naco Jesodsa tojjari

9 ¹Nadsama Saoropa Jesodsa
 jehe quinajarideni jicahijine
 jara jara dsanapojari. Nadsapa
 dada toqqumadedenicca tamine
 deni tojjaridsa huatide toccajari.
²Nadsapa najari tamednsa Saoro
 huati tajari: –Nija Tamine Caipa
 ¿ohuattidsa jehe taqui? Aja Jesodsa
 jehe quinajarideni otadamahijine
 odsa panani Damascohuaji ohua
 dosse tinaji, onajaro. Ohua dosse
 tinanijine jipa tinadsapi ticca ima
 teppe dsodo tadsa Damascohuaji
 dsojo onanijine. Nahi Damascohuaji
 jodiodenicca Dio Atti mamari onihi
 onihicca tamedenednsa nohue
 onaridsanijine. Nadsapi Jesodsa
 jehe quinajari maquideje, amo-
 nejedenima otadamadsa bijideni
 jore onabaquidsa aji Jerosarehuaji
 ohuaccani-baqquihitohui –najari
 Saoro. ³Nadsapa tamine Caipa jehe
 nadsa pocca ima teppe Saorods da
 inadsa Damascohuaji dsojo inajaro.
 Toccaraha Damasco bacco tabote
 nadsa memehuajicca ssiajani
 amadsati pohuadsa bacco naronas-
 sapi pohua inoridsa ssiajahujani
 najaro. ⁴Nadsapa Saoro tohuedima-
 jari. Namidsa ponadsa atti mitta-
 jari: –Saoro, Saoro ¿nejecotohui
 occa madija nanajidso taridsajaro?
 Aja occa madija nanajidso taridsa-
 jaropi pina ohua nanajidso taridsa-
 jarossa najaro –najari. ⁵Nanaja
 Saoro huati tajari: –¿Tiapi nejeco-
 jari? –najari. Naraha: –Ohuapi
 Jeso. Ohua tinajidsojaro. ⁶Jidapapi
 titehemadsa, odsa panani Damasco-
 huaji ticcaji. Nanidsana occa ima,
 aji ohuadsa tidsepe ijiniijinecca ima
 timittanijine –najari.

⁷Aja Saoro pohuadsa jai tojajari-deni naco atti mohuini mittamana-raha assirepa qqui quina-jarahi. Jabobo quinadsapa attideni jiraha domo huajari. ⁸Nadsapa Saoro namidsa ponaraha totehema, nocco ssire-re naraha nocco siri tojaha totehemajari. Nocco nohueradsapa bijidsa dama quinadsa odsa panani Damascouhaji iaccamanajari. ⁹Nahidsa huadari 3 naraha nocco tobica-jaraccahi. Dsamatapa jipajaraccahi, passo naco dse najaraccahi.

¹⁰Nahi Damascodsa Jesodsa jehe najari madijari onipa Anania. Puhuapa pina pocca huadassa nadsa ia Medsede Jeso ahuatodsa pohuadsa huahua najari: –¡Anania! –najari. –¿Ja? Ohuapi aji, ohua Medsede –najari.

¹¹Nadsapa Jeso pohuadsa huati tajari: –Anania, titehemaji. Ajicca jahui onini Borocobote quiquina-nahihuaji ticcaji. Nahi *Jodacca odsadsa bacco tinadsapi odsa panani Tarsocca madija qqui tinahitohui, pohua onipa Saoro. Puhuapa otohui nadsa ohuadsa huatide tojajari.

¹²Ohuapi pina pocca huadassa nadsa pohuadsa ima ahuatoto onanapa. Najaro imapi aja madija oni Anania ccajonadsa tinocco bara inadsa tinocco tobicapomanitohui, onapa pohuadsa –najari Jeso.

¹³Naraha Anania: –Jaho, ohua Medsede, najari maquidejepa aja Jerosarecca tiadsa toquejenajari bicaquiri najarideni inajidsobaquihui quinahi ima ommatide.

¹⁴Jidapana naco Jerosarecca dada toquimade tamedenica ima teppema ccajonaripa tiadsa jehe inajarodeni todsepe iquejenanijine

ia damade ccajonajari –najari Anania.

¹⁵Naraha ia Medsede Jeso Ananiadsa: –Jari, nema nehe ticcaji, pina ohuattissa tinanaji. Saoro ocattejidsajari. Puhuapa occa imadsa dsepe ijiridsahitohui. Dsama huapimacca madija, tamedenima mari icanabaquihijine. Isaraeridenidsa naco otahimari mari icanabaquihijine. Nadsapa otahimari-dsa: “Jehe, Jesopa pajissa Dio Bedi” quinahijine, onajaro. ¹⁶Puhuapa otahimari maride tojaridsaraha ocasserehe oppina tanica inaharidsanitohui. Najaro ima naqui nidsa pohuadsa nohue onanitohui –najari Jeso Ananiadsa.

¹⁷Nadsapa Anania Jeso attidsa ibora tadsapa toccajari. Jodacca odsahuaji bacco tadsapa toqqe-dsimadsa Saorodsa bara nadsa huati tajari: –Ohuemecote Saoro, jahui ticcajonaraha ia Medsede Jeso-cristopa tiadsa ahuatode. Najari ohua dosse najonadsa occajonajaro, tinocco biquemaninijine, Dio Corime tibodidsa tojahijine –najari Anania.

¹⁸Nadsapa Saoro noccodsa bara nadsa amadsati pina aba eterossa naha catojadsapa nocco biquemanipomajari. Saoro totehemadsa passohuaji toqqedsippadsapa totopa cajijari. ¹⁹Nadsapa jipadsa todacora-pomajari. Nahi Damascocca Jesodsa jehe quinajaridenidsa huada huatinimade tojari naha madicajari.

Saoropa Damascodsa Jeso tahimari maride tojajari

²⁰Nadsapa Saoro amadsati jodio-denicca Dio Atti mamarihuaji maride tojajari. –Jesopa Dio Bedi

–naridsajari pohuadenidsa. ²¹Nadsapa madija huapima Saorocca marinaja mittamanadsapa: –A ¿pohua bodi cacajiquimerajari ttarana? Nadsa najaripa Jerosarecca madija Jesodsa toquejenajari nanajidso naridsaccade. Ahuaji ccajonadsa naco Jesodsa jehe quinajarideni itadamadsa dada toqqumade taminedenidsa iaccanibaqquihitohui quiquinanaraha ¿najari jaraco? –quinajari.

²²Naraha Saoropa Diocca dacorehe cajidsa pohua atti bica tadsa huati huati tajari: –Jesopa aja *Cristo-Mesiatohui imadijaropaji –naridsajaria aja Damascohuajicca jodiodeni pohuadsa atti atti quinaraha ajamani toquejenadsa

tossamomanadsapa joma quinajari-paja.

²³Nadsama dsotode naco jodiodeni pohuadenira imahaha canadsa: –Jari, Saoro dsoquena –quinajari. ²⁴Naraha Saoropa pohuatohui najoramanahi ima mittajari. Odsa pananicca siba sse nahuajaninicca totoqqueqqumacca noccobijidsa pohuatohui cacassijamana najari. ²⁵Naraha najaro dsomedsa Jesodsa jehe quinajaridenipa quiqui imenidsa Saoro inahittidsamanadsa odsa pananicca siba sse nahuajaninicca noccobiji bedenidsa mohuaradsa madodsapa icanaronamanajari. Nama inanamanadsapa Saoro inassijamanajari.



**Saoro Jerosaredsa
madipomajari**

²⁶Nadsama Saoro odsa panani Jerosarehuaji toccanidsa bacco tani-dsapa Jesodsa jehe quinajaridenidsa quejemahijineraha pohua noppine cappinamanajari. Jesodsa tojjari tahimari mittamanaraha pajissa quina-jarajari. ²⁷Naraha Bernabena Jesocca dodosse tabaqqidsa Saoro iaccajari. Pohua tahimari pohuadenidsa huati huati tajari: –Ajaripa Damasco jahui toccaraha ia Medsede pohuadsa ahuatodsa atti mittajari. Nahi dsotodepa cappinera tadsa Damascohuaji Jeso tahimari maride tojjari –najari Bernabe. ²⁸Nadsapa pohua noppine tocappinermanadsa pohuadenidsa ccaridsajari, pohuadenidsa madijari. Nadsapa Saoro cappinera tadsa nahi Jerosaredsa ia Medsede Jesocristo tahimari mari icanabaqquihissa tajari. ²⁹Naraha jodiodeni mota dsama Cresiaccia tohuatti nahatoqquri najarideni Saoro tedseje imahaha canadsapa ahuaji huati ahuaji huati quinajari. Huadimandsapa dsoqquehijine tohui disseraqquri najari. ³⁰Naraha Jesodsa jehe quinajaridenipa Saoro inandsoqqe-manahijinecca ima mittamanadsapa odsa panani Sesareahuaji pohua iaccamanajari. Nahi Sesareadsa bacco toquinadsapa Saoro pocca odsa panani Tarsohuaji dosse inanimanajari.

³¹Nadsama Jesodsa jehe quinaridenidsa madija ohuahadenicca najidsohue totappadsapi jonehedsa madiridsamanajari. Aji dsama arobeni Jodeahuaji, dsama arobeni Carireahuaji, dsama arobeni

Samariahuaji naqui najidsohue totappajaro. Nadsapa Dio Corimejine poccadeni jeheniji todacorani dsanapojaro. Jesodsa jehe quidsati naco tohuapija dsanapohui najari. Huapima ia Medsede tohuira bodideni huatomamana-dsanapodsapa madimanahissa tajari.

Pedro Enea inanomijari

³²Pedro naco Jesodsa jehe quinajarideni qquide ccaridsajari. Odsa panani onini Ridahuajicca jehe quinajaridenidsa bacco tajari. ³³Nahidsa maqquideje ide tone biqueradsa isso ssomi tojjari bacco injari, onipa Enea. Pohuapa huajano 8 naha coma tajari. Ccaridsa-jarahi. Pohuajinedsa popori najari. ³⁴Nadsapa Pedro pohuadsa huati tajari: –Enea, Jesocristojine tinomini. Titehemaji, ticca huahuada mohuaradsa domo taqquijo –najari.

Nanaja amadsati toتهمadsa ccaridsajari. ³⁵Nadsapa Ridacca madija huapima, dsama arobeni Saronahuajicca madija naco Enea tonomihi qqui toquinadsapa bodideni cacajiqquimera-manajari. Nadsapa huapima ia Medsededsa toquejenajari.

**Tabita huatiaraha Diojine
camittemanijaro**

³⁶Nadsama Jodea arobenihuaji odsa panani Jopedsapí amoneje Jesodsa jehe najaro madijaro, oninipi Tabita. Dsama Cresiaccia madija attendidsapi: Dorca. Ponipi amoneje bicani madijaro, ima bicani inanaridsajaro. Madija cappiramanajari-deni acco acco ihicamabaqqui najari. ³⁷Naraha Tabita quidsa nadsapi huatiajaro. Huapini passodsa ssahua

quinadsapi odsa tetepihuaicca coba canahuajaninidsana ibarimanajaro.

³⁸Nadsama odsa panani Jopepi Rida-huaji huajira tajaro. Jopecca Jesodsa jehe quinajaridenipa Pedro Ridahuaji madijari quinahi mittamanadsapa Pedrotohui maqquideje pamaha dsaja tajari. Nadsapa Pedrodsa bacco toquinadsa huati toquinajari: –Huassinaja icca odsahuaji ticcaccaji –quinajari.

³⁹Nadsapa Pedro poadeni-dsa toccajari. Odsa bacco tani-manadsapa Tabita porinihuaji iaquedsimamanajari. Nani Tabita porinidsa poni tassani tabira tocajamanajarodeni domoni huaridsa oji oji quinajaro. Ponidenicca eteropi Tabitacca ssequinaja Pedrodsa nohue quinajaro. Poni madiccdsa poni tassanidenidsa ssequi inaridsajaro. ⁴⁰Naraha Pedropa huapima amossinihuaji dosse ininebaquidsa pohua pitodsa huitta nadsa Diodsa huati tajari. Nadsapa totehemadsa aji huatiajarodsa huahua najari: –Tabita, titehemaji –nanaja nocconi ssire-re nadsa Pedrodsa cattoma nadsa totehema, huittari najaro. ⁴¹Nadsapa dsapanidsa Pedro joca imadsapi totehemajaro. Nadsapa aji amoneje camittemanijaro qqui toquinahijine Jesodsa jehe quinajaridenitohui amonejedentohui huahua najari. Qqui toquindsapa huatidsemanajari. ⁴²Nadsama najaro imapi Jopehuajicca madija huapima mittaridsamanajari. Nadsapa Jopehuajicca madija mota denima Jesodsa jehe quinajari. ⁴³Nadsapa Pedro nahi Jopehuaji huadari huapi taccahijine nahicca bani etero nanadacomade oni Ssino tadsaridsa madicajari.

Pedro Coronerio tedseje

10 ¹Nadsama odsa panani Jope huajira tanidsa odsa panani onini Sesareadsapa maqquideje madijari, pohua onipa Coronerio. Poutuapa romanodenicca soldado dossede, pocca dodosse tabaqqi 100 quinanajari. Poadenidsa: –Dsama *Itariahuajicca soldadodeni –quiquinanajari. ²Coroneriopa madija bicahi, Diodsa dissera tajari. Poutuapa jodio jararaha pohua pocca madijama Diodsa jipaqquri nadsa Dio Attidsa iboraqquri najari. Aja Coroneriopa jodiodeni tohuati nahanaqquri najaridenidsa naco accora tajari. Diodsa huatide naco nenebo najarajari. ³Nadsapa maji tohuenajonadsa pina 3'dsa Coronerio pocca huadassa nadsa Dio Atti ccaccaronade ahuatojari. Coroneriodsa qquedsimadsa huahua najari: –¡Coronerio! –najari. ⁴Nanaja Coronerio cattoma nadsapa cappinadsa huati tajari: –¿Nejecora ohuadsa huati tinanijine? –najari. Nadsapa poadsa huati tajari: –Diopa titohui huati ajama-jarahi. Tetti mittahi, aja tohuati nahanaqquri najaridenidsa naqui accora tinani qqui tahi. ⁵Jari, odsa panani Jopehuaji madija dosse tinabaqqi Ssinotohui, pohua oni ohuahapa Pedro. Najaripa poadenidsa ccajonahijine. ⁶Pohua pina pohua onissa najaricca odsadsa madijari. Najari Ssinopa bani etero nanadacomade. Poutuapa coridsa imeni inididsa madijari –najari.

⁷Nadsapa Dio Atti ccaccaronade Coroneriodsa huati huati taha jicadsapa toccamacossanijari, amossi najari. Nadsapa Coronerio pocca tatarabidsade pama, soldado

ojari najaridenidsa huahua najari. Soldadopa Diodsa dissera tajari, Coronerio biji accode tojajari.

⁸Nadsapa pocca ima huati tahissa tadsapa Jopehuaji dosse inabaqquidsa jai tojajari.

⁹Huada ssiaya jahui jai tojajari, maji itetepi tojadsa Jopehuaji bacco toquinabote najari. Maji najarissa nadsa Pedropa Diodsa huati tahijine Ssinocca odsa tetepihuaji toccamarojari. ¹⁰Pedropa pemidsa jipahijine tohuini naraha pohua tapari ppede najomanaccadsa Diodsa huatide tojanaja pina pocca huadassa naraha Diojine pajissa qqui tajari. ¹¹Nadsapa qqui taneje meme tohuaba nadsa pina etero imenissa najaro ahuaji ssoque dsanani pama, ahuaji ssoque dsanani pama nehe namihuaji ccaronajaro. ¹²Nadsama aji etero ssoque caniquimani bodidsapi bani cajidsamaro najari. Bani dsamacca, odsacca, eppe cajihicca, pohua baccodsa ccaridsajaricca najari. (Bani motapa bani siri, aja Moisesicca marinajadsa: –Tijipamana tejeraji –nahicca.) ¹³Nadsapa memehuaijati atti mittaronahi Pedro mittajari: –¡Pedro, titehemaji! Ticca bani titabarojo, tijipanijine –najari.

¹⁴Naraha Pedropa: –Ohua Medsede, ¡poni! Bani *oppina tahiccapa Moisesicca marinajadsa: “Ajaripa tijipamana tejeraji” nade. Ohuapi bani nama nahicca ohojipa nejerani –najari. ¹⁵Naraha Pedroda huati tapomajari: –Pedro, pajissa Diopa: “Ajaripi bani tijipamana tejeraji” naporaha jidapapa Dio Pohuajine toppinerahi. Nadsapi Diojine toppinerahiccadsa: “Oppina tahi” tejeraji –najari Dio Atti ccaccaronade Pedroda.

¹⁶Aja bani tahimari huati nimaniji 3 nadsapa aji etero ssoque caniquimanipi memehuaijati toccamacossanijaro. ¹⁷Nadsapa Pedro pocca huadassa najaro qqui tajaridsa bodi huatoto canadsa: –¿Nejecotohui nama nahi qqui onajari? –najari. Nanaja Coronerio dosse inajonabaqquijarideni aja Jopedsa bacco quinajaridenipa: –¿Nejecohuajina Ssino madijari? –najonamanajari. Nadsapa Ssinocca odsacca siba sse nahuajiniccana noccobijihuaijati bacco quinajari. ¹⁸Nadsapa bacco quinadsapa huahua quinajari: –¿Ssino-Pedropa ajadsa madijarico? –quinanaja: –Jehe, ajadsa madihini –quinajari.

¹⁹Pedropa odsa tetepihuaji bodi huatoto cananaja Dio Corime pohuadsa huati tajari: –Madija 3 quinaha titohui bacco quinahi. ²⁰Titehemaji, ticcaronadsa pohuadenidsa ticcana. Ticappina-jeraji, aja titohui bacco quinajaridenipa ohua dosse onajonabaqquijari –najari Pedroda.

²¹Nadsapa Pedro ccaronadsa pohuadeni qqui tadsapa huati tajari: –Aja tohui jai tijajonajaropi aji ohuapaji. ¿Nejecotohuira jai tijajonajaro? –najari Pedro.

²²Nadsapa pohuadeni attia: –Coronerio ia dosse najonabaqquijari. Pahuapa soldadodeni dossede, madija bicabote. Jodio jararaha Diodsa ibora tajari. Jodiideni naco pohuadsa: “Ima bicani cajihini” quiquinanajari. Najaria aja Dio Atti ccaccaronade pohuadsa ahuatodsa: “Ticca madija Pedrotohui dosse tinabaqquijati, ticca odsahuajati ccacionadsa pocca ima timittanijine” nadsa ia dosse najonabaqquijari –quinajari.

²³Nadsapa Pedro: –Jehe, bica tani. Aji occa odsadsa timadimana-ccaji, dsemassana tiadenidsa occanijine –najari. Nadsapa huada ssiajana Pedro Coronerioca dodosse tabaqquidsa toccajari. Jopehuajicca Jesodsa jehe quinajarideni mota naco jai tojajari pohuadenidsa.

²⁴Nadsapa huada ssiajana odsapanani Sesareadsa bacco tani-manajari. Nahidsapa Coronerio, pocca madija, pohua tessedeni quinadsa Pedrotohui madimanageri. ²⁵Nanaja Pedro Coronerioca odsadsa bacco tadsa toqquedsimabote naraha Coronerio qquenadsapa Pedro baccohuaji pohua pitodsa huitta najari. Pohuadsa huatidse-
dsas: –Deni tijani –nahijineraha.

²⁶Naraha Pedropa Coronerio dsepedsa joca imadsa: –Titehemaji, ohuapi Dio ojajerani. Ohua naqui madija aji tiassa onajaro –najari.

²⁷Nadsapa Coronerio tedseje huahuatiti tajari. Odsa bodihuaji tohuededsimadsa odsa bodidsa madija queriquimanahi huapi tahi qqui tajari. ²⁸Nadsapa Pedro pohuadenidsa huati tajari: –Ohuapi *jodio madija ojani. Nadsama aji jodiodeniccima imapi nahatoqquri tiquinani. Occa madijapa madija ohuaha *jodio quejena-jarajaridenidsa iquejemani pina jidapana tiadenidsa qquide oqquedsimadsapi *oppina tani quiquinanade. Naraha Dio ohua mari canadsapa ajama najari: “Jidapapi madija ohuahadenidsa iquejemani naqui oppinera tani. Pohuadenidsa: Oppina tahi, tejeraji” nade ohuadsa. ²⁹Nema nadsapi ohuadsa huahua tadsa Diojine ocappina-jeradsa occa-jonajaropaji. Nadsama ¿nejecotohui ohuadsa huahua tajarotte? Jidapana

ohuadsa huati tinaji, omittanijine –najari Pedro.

³⁰Nadsapa Coronerio Pedrodsa huati tajari: –Aji maittadsama onihima nadsa jidapapi huada 4 nani occa odsahuaji Diodsa huatide ojadspapi maji tohuenajonadsa pina 3’dsa Dio Atti ccaccaronade ohuadsa ahuatodsa qqui onajaride. Pocca eteropi dsibehi tajaro. ³¹Nadsapa ohuadsa huati tade: “Coronerio, Diopa titohui huati ajama-jarahi. Tetti mittahi, tohuati nahanaqquri najaridenidsa accora tinani naqui Diopa qqui tahi. ³²Jari, odsapanani Jopehuaji madija dosse tinabaqqijio Ssinotohui, oni ohuahapa Pedro. Pohua onissa najaricca odsadsa madijari. Najari Ssinopa bani etero nanadacomade. Pohuapa coridsa imeni inididsa madijari” nade ohuadsa. ³³Nadsapa huassinaja occa madija titohui dosse onabaqqujari-paja. Aji ia qquide ticcajonani ibora tinadsa bacco tajonadsapi etidsejaro. Jari, jidapana Dio tedsejema iqueriquidsa ia Medsede tia mari canajaricca ima huati tinaji, imittanijine –najari Coronerio.

**Pedropa Coronerioca odsadsa
Jeso tahimari maride tojajari**

³⁴Nadsapa manaco Pedro pocca ima huati huati tajari: –Jehe, jidapana pajissa omittajaropi Dio: “Jodiodenira ojarimanana” najarajari. ³⁵Diopa dsama huapimacca madijadsa huati caharani canahi. Pohua Attidsa madija iboraqquri nadsa ima bicani inanaridsamandsapi Dio pohuadenidsa jipa tajari. ³⁶Diopa ia Isaraeridenidsa ima bicani huati najonajari. Najaroa aji Jeso-cristojine Dio iadsa tojonejaripaja.

Pohuajinena Diocca huadie dsori icanirenitohui. Pohuana madija huapima Medsededeni. ³⁷⁻³⁸ Tiadenipi ajijaro ima nahatoqquiri tiqinani. Najaroa aji Nasaretihuajicca Jeso tahimari. Tahidepa Huano pocca ima eccoraridsadsa pohua attipa: “Ticcadeni imasiri tinebomanaji, totopa ticajimanaji” napojari. Nadsapa madija topa idsanabaqqui-jaripaja. Nahi dsotodepa Jeso naco Huano topa idsanajari. Topa, idimora nadsapa Dio Pohua Corime Jesodsa inanhissa tajari. Dio pocca dacorehe naqui Jesodsa inanissima tajaro. Nadsapa Jeso ima bicani inanaridsajaropaji. Tahidepi dsama arobeni Carireahuaji ima bicani inanaridsajaro, dsotode dsama arobeni Jodea nemanehedsa naqui ima bicani inanaridsajaro. Imasiri jinede Satanajine madija ocasserani ahuamanajari naco inanomibaqquiridsajari. Jesopa Dio pohuadsa madijarijine nama naridsajari-paja. ³⁹ Nadsama ia naqui Jesocca dodosse tabaqqui pohuadsa jaijairidsadsa odsa panani Jerosaredsa dsepe ijih qqui, jodiodenicca dsama Jodea nemanehedsa dsepe ijrirdsahi naco qqui qqui inajarode. Naraha dsotodepa jodiodeni ahua porimacossanidsa coba idsanamanadsa inanadsoqqe-manajari. ⁴⁰ Naraha huada 3 nadsa Djoline Jeso nahatonipomajari. Nahi dsotode naco Djoline iadsa ahuatoniari. ⁴¹ Madija huapimadsapa ahuatoni-jararaha iadsana ahahuatoni najaride. Diopa tahide ia tocattejidsabaqquiopajaria aji pajissacca ima ecomeraridsanijine iadsa ahuatoni inajaropaji. Iapi Jeso nahatonidsapa pohua tedseje ijiparidsajaro, dsedse bica

tahicca dse inaridsajaro najarode. ⁴² Najaria pohua tahimari madija huapimadsa ecomeraridsanijine ia tocadossebaqquijaripaja. Abi Dio Pohua Bedi dosse inaronajaripa madija huapimacca ima cacattemade tojahijine. Nahi nidsaranibote Jeso pohua ccanipomadsa jicapojarideni inahatonibaqquidsapa aja camittaqquiri najarideni tedseje imarideni icattemanitohui. ⁴³ Najaria Jeso pohua tahimari maittaccadsama Dio Atti cacomeraqqiri najarideni dsodo najonamanajaripa ajama quiquinanajari: “Ia Idinide icca imasiri inanamossinijine nahato tahi ojari nahi. Pohuadsa pajissa inadsapi icca imasiri inanamossi tani” quinapohui nade. Najaro imapi madija huapimadsa tojajaro –najari Pedro.

**Jodio quejena-jarajaridenidsa
Dio Corime tojaridsajari**

⁴⁴ Nadsapa Pedro huati huati tahi Coronerio pocca madijama taharibobo cananaja Dio Corime bodidenidsa tojaridsajari. ⁴⁵⁻⁴⁶ Nadsama Dio Corimejine pohuadenipa *tohuatti jidsa tajarodsa huati huati toquinajari. Diodsa huatidsemanadsa attidenipa: –¡Diopa bica tahi! ¡Diopa nahatojjide rahi! –quinajari. Nadsama Jopehuajicca Jesodsa jehe quinajarideni Pedro-dsa jahijonajaripa jodiodenija najari. Pohuadenipa aja madija ohuadeni jodio quejena-jararaha tohuatti jidsa tajarodsa huati huati toquinahi mittamanadsapa: –A, madija ohuaha quejenaraha Dio Corime pohuadenidsa tojaridsajari –quinajari. ⁴⁷ Nadsapa Pedro huati tapomajari: –Aja Coroneriocca madijapa madija ohuaha quejenaraha Djoline

Pohua Corime bodidenidsa tojaridsa-jari. Pohuadenipa Dio Corime cajimanajari, pina iassa quinahi. Nadsapa totopa cajimanahijine bica tani. ¿Nejecojari pohuadenidsa: “Totopa cajimana-jarana” nahijine? Nohuerahi –najari Pedro.

⁴⁸Nadsapa Coronerio pocca madijama totopa cajimanahijine Pedro icadossebaquijari: –Jari, Jesocristo onima totopa cajimanana –nadsapa topa idsanabaquijari. Dsotodepa Pedrodsa huati toquina-jari: –Jari, iadsa timadiccaji –quinajari. Nadsapa Pedro huada pamehe pohuadenidsa madijari.

**Jerosarecca naco Pedro
tahimari mittamanajari**

11 ¹Nadsama dsama arobeni Jodeadsa madimanajarideni aja Jesocca dodosse tabaqqi ima mittamana, Jesodsa jehe quina-jari ohuahadeni naco ima mittamana najari: –Madija ohuaha jodio quejena-jararaha Dio Atti mittamanadsapa pajissa quinahi –quina-jari. ²Naraha Pedropa odsa panani Sesareahuaji ccanidsa odsa panani Jerosarehuaji bacco nanidsapa jodiodeni Jesodsa jehe quinajarideni mota pohuadsa huadimanajari. ³Nadsapa Pedrodsa huati toquina-jari: –¿Nejecotohui jodio quejena-jararaha poccadeni odsadsa tiqqe-dsimadsa pohuadenidsa tijipajarotte? Moisesicca marinajadsa nema inanipi *oppina tani nahato tinaraha –quinajari Pedrodsa.

⁴Naraha Pedropa pocca ima tahideccadsama pohuadenidsa ecomerajonajaro: ⁵ –Jehe, ohuapi Jopehuaji omadidsa Diodsa huatide ojaraha pina occa huadassa naraha

Diojine pajissa qqui onajarode. Meme tohuaba nadsa pina etero dsojoranissa nehe ssoque caniqquimehe ohuadsa bacco naronani qqui onajarode. ⁶Najaro etero ssoque caniqquimani bodihuaji qqui onanissa tadsapa bani cajidsamaro nade. Dsamacca bani, odsacca bani, bani epe cajimanajarideni, bani pohuadeni baccodsa jahiridsajarideni, huapima qqui onade. Jodiodeni iadsa bani oppina tahiccama quejemade. ⁷Nanaja memehuaji atti omittadsapa: “¡Pedro, titehemaji! Ticca bani titabarojo, tijipanijine” nade. ⁸Naraha pohuadsa ajima onade: “Ohua Medsede, ¡poni! Ohuapi bani oppina tahicca ohojipa nejerani” onade. ⁹Naraha memehuaji ohuadsa huati tapomade: “Ajajari banipa Diojine toppinerahi. Nadsapi Diojine toppinerahiccadsa: Oppina tahi, tejeraji” nade ohuadsa. ¹⁰Nadsapa ima huati nimanihi 3 nadsapa etero ssoque caniqquimanipi banima memehuaji toccamacossanijarode.

¹¹ –Nanaja odsa panani Sesareacca madija 3 quinaha otohui dosse inajonabaquijarideni omadinicca odsadsa bacco quinajari. ¹²Nadsapa Dio Corime ohuadsa huati tade: “Ticappina-jeradsa pohuadenidsa ticcaji” nade ohuadsa. Nadsapi aja Jopehuajicca Jesodsa jehe quina-jarideni 6, ohua inadsa pohuadenidsa jajjade. Nadsapi Coroneriocca odsahuaji bacco inadsa jajjedsimade. ¹³Nadsapa Coronerio pocca ima iadsa huati tade. Pohua attipa: “Dio Atti ccaccaronade occa odsa bodihuaji ahuatodsa huesda nadsa ohuadsa ajama najari nade: “Ticca madija Jopehuaji dosse tinabaqqi, Ssino-Pedro ahuaaji ccajonahijine.

¹⁴Najari ahuaji ccajonadsapa tiadenidsa ticassiejeranijinecca ima huati tahijine. Najaro imadsa tia, ticca odsacca madijama ticassiejeranijine' nade Dio Atti ccaccaronade ohuadsa" najari Coronerio atti.

¹⁵Nadsapi pohuadenidsa huati huati onanaja Dio Corime pohuadenidsa tojaridsajaride. Pina iadsa tojaridsa-pohuissa najaride. ¹⁶Nadsapi aji Jeso huati huati tajari obodi huatomade: "Huanopa tahide passodsapa tiadeni topa todsanabaquijari. Naraha dsotodena Dio Corime tibodidenidsa tojaridsahitohui" nade Jeso.

¹⁷Nadsapi ia Medsede Jesocristodsapa jehe inadsapi Dio Pohua Corime iadsa tojaridsapojaride. Najarossa najaro pohuadenidsa naco Dio Corime inanaridsajari. Nadsapa madija ohuahadeni naco Diodsa toquejenadsapa ohuapi Diodsa: "Tijine bica tejerani" onanijine opajira-jerani, onajaro – najari Pedro.

¹⁸Nadsapi najaro ima Jodeacca madija aja jodiodeni Jesodsapa jehe quinajarideni mota mittamanadsapa poccadeni huadie nebomanajari. Nadsapa Diodsa huatidsemanajari: –Jehe, jodio quejena-jararaha Diopa pohuadenidsa naco huati huana tajari. Djojine bodideni cacajiquimeradsa Jesodsapa pajissa quinadsapa camittehe jiquejeranicca cajiridsamanahi. ¡Diopa bica tahi! ¡Diopa deni tojahi! –quinajari.

**Jesocristo pohua tahimari
Atioquiadsa bacco tajaro**

¹⁹Nadsapa Esteba dsoqquehi nattipa Jesodsapa jehe quinajarideni mota nanajidso toquejenadsa ahuaji domo tocca, ahuaji domo tocca naridsajaria aja dsama Penisiahuaaji

bacco, dsama Siprehuaaji bacco, odsapa panani Atioquiahuaaji bacco toquinajaripaja. Nahidsa bacco taridsamanadsapa Jeso tahimari icassiejeranijinecca ima nahihuaajicca jodiodenira mari icanabaquimanajari. ²⁰Naraha Jesodsapa jehe quinajarideni domo toccajari motapa odsapa panani Atioquiahuaaji jai tojadsapa jodio quejena-jarajari-deni naco Jeso tahimari icassiejeranijinecca mari icanabaquimanajari. Maridedenipa dsama Siprehuaajicca madija pama, odsapa panani Sirenecca madija pama quinajari.

²¹Nadsapa ia Medsede Diocca dacorehe pohuadenidsa tojadsapi mari quinahissa tajari. Nadsapa Atioquiacca madija aja jodio quejena-jarajari huapima bodideni cacajiquimera-ridsadsapa ia Medsede Jesodsapa pajissa quinajari.

²²Nadsapa odsapa panani Jerosarecca Jesodsapa jehe quinajarideni ima mittamanadsapa Bernabe Atioquiahuaaji dosse quinajari, qqui inabaquihijine. ²³Nadsapa Bernabe Atioquiahuaaji bacco tadsa Dio pohuadenidsa ima bicani inanani qqui tadsapa huatidsejari. Nadsapa pohuadenidsa huati tajari: –Diodsa pajissa tidsanapomanana. Tibodideni dacoradsa ia Medsededsa disseraqquri tiquinaji –najari. ²⁴Bernabepa bica tajari, Dio Corimecca dacorehe cajijari. Jesodsapa naco jehe nahissapa dsanapojari. Nama nadsapa Atioquiacca madija huapi taha ia Medsede Jesodsapa jehe quinajari.

²⁵Nahi dsotodepa Bernabe Saorotohui odsapa panani Tarsohuaaji toccajari. ²⁶Pohuadsa bacco tadsapa Atioquiahuaaji jina inanajari. Bacco nanimanadsapa nahicca

Jesodsa jehe quinajaridenidsa huajano ojaría madimanadsa madija huapima mari icanabaquimanageri. Nadsapa nahi Atioquiadsana Jesodsa jehe quinajaridenidsa: Cristocca madija, icanacanibaquimanapojari.

²⁷Nadsapa najari huajanodsa Jerosarecca *Dio Atti huahuati toqqimadedeni Atioquiadsa bacco quinajari. ²⁸Pohuadeni naco aja madija toqueriqquihidsa quejemanadsa ojaría ima huati tahijine totehemajari, pohua onipa Acabo. Pohuapa Dio Corimejine bodi nahato tadsa huati huati tajari: –Nidsa icca dsama huapimadsa pemi tojanitohui –najari. (Najaropi dsotode Romacca madija oni Claodio dsama huapimaccca tamine madidsa pemi tojajaro-pajide.) ²⁹Nadsapa Atioquiaccsa Jesodsa jehe quinajarideni Acabo atti: –Pemi tojanitohui –nahi mitta-manadsapa: –Jodeacca Jesodsa jehe quinajarideni acco icamabaquina –quinajari. Imahaha canadsapa: –Ipajiranissa tanicca da inaquina. Pina huemani cajihipa denima da inana, badsira tehe cajihipa badsira tehe da inana –quinajari. ³⁰Nadsapa poccadeni daniji da inaquimanadsapi Bernabe Saoro tedseje Jodeahuaji eccanimanagero. Bacco nanimanadsapa Jerosarecca *Jesodsa jehe quinajarideni cacahuadedenidsa da quinajaro.

**Satiaco inanadsoqquemana,
Pedro toponi cocorodsa
coro idsimamana najari**

12 ¹Nadsama pemi tojajeraccadsapi dsama arobeni Jodeahuaji jodiodenicca tamine *Herode madijari. Najaripa Jesodsa jehe

quinajarideni inajidsobaquihijine pocca madija icadossebaquidsapa itadamanageri. ²Nadsapa pohua attidsa Huanocca ato Satiaco toponi huahuajinadsa inanadsoqquemanageri. ³Najari dsoqquedsapa jodiodeni huatidsemanajari. Huatidsemanahi tamine Herode qqui tadsapa: –Pedro naco dama tiquinajo –najari pocca madijadsa. Jodiodenicca ejete imenibote onini *Pan ssaja tajarahicca (onini onihipi *Pascoa) najaro ejetecca huadadsa Herode atti nama najari. ⁴Nadsapa Pedro dama quinadsa toponi cocorodsa coro idsimanageri. Nadsapa soldado huapima Pedro eahuamanageri. Tahide 4 quinaha eahuamanageri. Dsotode 4 quinaha eahuamana, dsotode 4 quinaha eahuamana najari. Tamine Herode attipa: –Nidsa ejete Pascoa jicadsana Pedrocca ima cattemanijine huahua onana. Nadsana toponi cocorodsa qqenadsapa madija huapima qqui toquinadsa dsoqquehijine –najari. ⁵Nadsapa Pedro toponi cocorodsa huedsaraha Jesodsa toquejenajari-denipa odsa onihihuaji Pedrotohui Diodsa huati huati dsanapomanajari.

**Diojine Pedro toponi
cocorodsa qqenajari**

⁶Najaro dsomedsa Pedropa toponi cocoro bodidsa huedsajari. Cadena pamacossadsa biji jore quinadsa soldado ahuaji hua ahuaji hua nahi nocconidsa Pedro huittidsadsa huadajari. Pohua cacahuade ohuahadenipa noccobijidsa bajari. Huada ssajana Herodepa Pedrocca ima cattemade huahua nahijineraha najaro dsomedsa Pedro amossi

najari. ⁷Nahi toponi cocorodsa ia Medsede Diocca dodosse memehuaicca ahuatodsapa tossiaja-baqqui najaro. Pedro huadaraha pparidsa dipi nadsa: –¡Huassinaja titehemaji! –nanaja bijicca cadena jeohuajaja najari. ⁸Nadsapa: –Jari, ticca etero tedsaji, temoricca sadaria naco tedsajo –najari. Huedsadsapa Diocca dodosse huati tapomajari: –Ticca etero motaranicca naqui tedsadsa onatti tiqqenaji –najari.

⁹Nadsapa Diocca dodosse tahide tojeninejari, Pedropa najari natti toqqenaraha pohua bodipa: –A, ajaropi pina occa huadassa nani –najari. Diocca dodosse pajissa pohua eqquenajariraha Pedropa ssamo tajari. ¹⁰Nadsapa noccobiji cacahuade huahueri naridsaraha deniccadsa tossoniquimani,

deniccadsa tossoniquimani tani-manajari. Noccobiji amossinihuajiccapo ppejo nahatoni huacossaraha nahihuaji bacco tanimanadsapa noccobiji poni ehuerani tohuabajararo. Nadsapa tohuedemanidsapa jahui tohuedadada... Diocca dodosse amossi najari.

¹¹Pedropa qqenadsa bodi huatomajari: –A, jidapapi qqi onani pajissaraha Diocca dodossejine oqqenajaro. Ohua jarade jiodieni naco Herode ohua inandsoqqehijine tohuini quinaraha jidapapi dsori onani –najari Pedro.

¹²Nadsapa Pedro aja pohua pajissa qqenajaricca ima bodi huatomahissa tadsapa Mariacca odsahuaji toccajari. Ponipi Huanocca ami, aja Huano pohua oni ohuahapa Maraco. Nahi Mariacca



odsadsapa madija Diodsa huatide toqueriquija najari. ¹³Nahidsa bacco tadsapa toqquedsimahijine amossinihuajicca noccobijidsa coba coba nadsa huahua najari. Mariacca medse Rode mittadsa –¿Nejecojari huahua najari? –nadsapi qquide qqenajaro. ¹⁴Nanaja Pedro atti ponidsa jidsera nadsapi huatidsedsa noccobiji taborani joppa todsimani-jaro. Attinipi: –¿Pedro ccanihi! ¿Amossinihuajicca noccobijidsa huajari! –najaro. ¹⁵Naraha bodideni pajissa quina-jaradsa: –Timaidsa-jaro, ccani-jarahi –quinajari. Naraha Rode attinia: –¿Pajissa najaripa! –najaro. Naraha: –Najari jarahitide. Pohua cacahuade Diocca dodosse memehuajicca itide –quinajari.

¹⁶Naraha Pedropa coba coba nahi paja najari. Nadsapi noccobiji icatabojidsamananeje Pedro jidsera nadsapa jabojo quinajari. ¹⁷Nadsapa imahaha cosseri naraha Pedro pohua dsepe da nadsa: –Joma tiquinaccaji. Occa ima huati onaccana –najari. Nadsapa Diojine pohua qqenahicca ima pohuadenidsa huati huati tajari. Jicadsapi: –Aji occa ima Jesodsa jehe quinajaridenicca tamine Satiacodsa huati tiquinana, aja imecotedeni huapimadsa naqui huati taridsamanana, occa ima nahatoqquri nahijine –najari Pedro. Nadsapa nahicca madija inebobaquidsa odsa onihihuaji toccajari.

¹⁸Naraha aja Pedro cacahuade soldadodenipa cassajamanadsa qqui toquinaraha amossi nadsapa jabojo quinajari. Ssamoni ahua-manadsapa: –¿Nejecohuaji ajadsa huedsajaripa? ¿Nejecoma nadsa

joppa tajarinaja? –quinajari.

¹⁹Tamine Herodepa: –¿Pohuatohui qqui taridsamananissa taji! –najari. Naraha qqui imanimana-jaradsapa Herodepa soldadodenidsa huati tajari: –¿Nejecoma nadsa Pedropa amossi najaritta? –najari. Naraha ssamoqquri nadsa pohuadeni cacomamanadsapa tamine Herode attipa: –¿Jari, tiadenipi tijicaji! –najari. Nadsapa pohuadeni jicahijine iaqqenabaquimanajari. Nahi dsotodepa tamine Herode dsama arobeni Jodeadsa madiraha toccajari, odsa panani Sesareadsana madicahijine.

Tamine Herodepa dsoqqejari

²⁰Naraha tamine Herodepa odsa panani Tirocca madijadsa huadi, odsa panani Sidocca madijadsa naco huadi tajari. Herodecca madijapa najaridenidsa dsamatapa dada quinadsa jijipamana naraha tamine Herode pohuadenidsa huadidsapa dsamatapa dada apaja quinajari. Naraha pohuadenira queriquimanadsapa: –Jina, tamine Herodedsa jajiedsimsadsa icajonerapomana –quinajari. Naraha tahidepa tamine Herode biji accode onipa Barastodsaha jai tojedsimapojari. Pohuadsa attidenipa: –Jari, tamine Herode iadsa tojonemanihijine ia acco ticambaqquiji –quinajari Barastodsapa. Nadsapa Barasto Herodedsa huati tajari. ²¹Naraha Herodepa Barastodsapa: –Nidsa huada onihidsana imarideni omitterijine –najari. Nadsapa najaro huada bacco tadsa pocca ima huati tahijine tamine Herode pocca etero bicani huedsadsapa madija queriquimanahihuaji

toqqedsimajari. Nadsapa pocca huihuittari bicanidsa huittaridsapa ima huati huati tajari. ²²Tamine Herodecca ima mittamanadsapa huatidsemanadsa johua johua quinajari: –¡Ajajari attipa pina Dio Attissa najari! ¡Madija atti jarahi! –quinajari. ²³Tamine Herodepa pocca madija pohuadsa huatidsemanadsa nama quinaraha: –Nema tiquinejeraji, ohuapi Dio ojajerani –najarajari. Nadsapa Diocca dodosse memehujicajine Herode amadsati quidsa najari. Pohua ime maccadsa ssari quinadsapa huati-jari.

²⁴Tamine Herode madiccadsa pohuajine najidsohue tojaridsa-raha Dio Atti dsama huapimadsa tojaridsadsapi madija Jesodsa toquejenajari tohuapiridsajari.

²⁵Nadsapa Bernabe Saoro tedsejepa odsa panani Atioquia-huajicca da naqquinaja Jerosare-huaji iaccanimanadsa da quinehe jicadsapi Atioquiahuaji tohuedanijari. Huano pohuadsa Maraco quiquinanajari naco pohuadenidsa toccajari.

**Bernabe Saoro tedseje
dsama onihihuaji Dio Atti
maride huedaridsahijine**

13 ¹Nadsama odsa panani Atioquiacca Jesodsa jehe quinajaridenidsa quequeri-quimana najaripa Dio Atti huahuati toqquimadedeni, Dio Atti mamaridedeni naco. Pohuadeni onidenipa: Bernabe, Simeho-Sohuehi, Rosio Sirene-huajicca, Saoro, Manahe quina-jari. (Manahepa dsama arobeni Carireacca tamine Herode tedseje

canapirejari.) ²Nadsapa toqueri-quimanadsa jipehe nebocossamanadsa Diodsara huatidsemananaja pohuadenidsa Dio Corime huati tajari: –Jari, Bernabe Saoro tedseje ticattejidsabaquimanajo. Pohuadenidsa huahua onajaropi dsama onihi, onihidsa Ohuattidsa dsepedeni ijimanahijine –najari.

³Nadsapa dsotode jipehe nebcossamana-pomadsa Bernabe Saoro tatidenidsa bara quinadsa Diodsa huati toquinadsapa: –Ticadaji –quinajari.

**Bernabe Saoro tedseje Siprehuaji
Dio Atti maride toquejenajari**

⁴Nadsama Dio Corime Bernabe Saoro tedseje dosse inabaquidsapa passo imeni inidicca odsa panani Sereosiahuaji tohuededsippajari. Nadsapa *canoa imenibote etero ssoque caniquimani cajiniccadsa tohuededsadsa iaccabaquimanajari, dsama huittidsacossani onini Siprehuaji tohuedajari. ⁵Najaro dsamadsa bacco toquinadsapa odsa onini Saraminadsa huana tocanamanajari. Nahidsa jodiodenicca Dio Atti mamari onihihuaji, onihihuaji Dio Atti maride toquejenaridsajari. Aja Huano pohuadsa Maraco quiquinanajari naco pohuadeni biji accode ccaridsajari.

⁶Nadsapa najaro dsama huittidsacossani Sipredsa maride jahiridsadsapa odsa onihi onini Papo bacco toquinajari. Nahi Papodsapa jodiodenicca dsoppeneje bacco quinajari. Pohua onipa Barieso. Pohua attipa: –Dio Atti huati toqquimade nahato onani –nanaja naraha maidsajari. ⁷Aja pohuapa dsama cacahuade Serjio-Paoro tedseje caberajari. Nadsama

Serjio-Paoropa bodi nahatojide rajari. Najaria aja Dio Atti mittahijine jipa tadsa Bernabe Saoro tedseje huahua inabaquijari. ⁸Naraha dsoppineje Barieso, pohua oni dsama Cresiaccia tohuattidsa: Erima quiquinanajari, najaripa pohua tesse Serjio-Paoro Diodsa tojahijine jipera tadsa pocca imara huati huati najari. Pohua attipa: –Pohuadeni attidsa jehe onejerani. Tia naqui jehe tejeraji –najari Barieso-Erima. ⁹Nadsapa Saoro, aja pohua oni ohuaha hua quinahipa Pablo quiquinanajari, pohua bodidsa Dio Corimecca dacorehe tojanissa tadsa dsoppineje icattoma nadsa huati tajari: ¹⁰ – ¡Madsajide tijirani! Tabaccora tinani, pina maidsehe jinede Satanassa tajaro. Ima bicani huahudide tijajaro. Ia Medsedecca marinajapi borocco taraha tijine johuidso tajaro. ¿Nejecotohui ticca imadsa epeje tejerajaro? ¹¹Naraha jidapapi Dio tia najidsodsapa tinocco siri tojana. Huada huapi tehe maji ssiejene qqui tina-jarahitohui –najari Pablo Barieso-Erimadsa.

Nadsapa amadsati nocco todsidsidsa pohua inequenimanahijine madija-tohui pohuama bara naridsajari. –Ohua acco ticamamanaji –naridsajari. ¹²Nadsapa dsama cacahuade Serjio-Paoro aja Pablo atti Barieso-Erimadsa huati tajari pajissa tojani qqui tadsapa Jeso tahimaridsa pajissa najari. Ia Medsede Jeso tahimari Pablodenicca marinajadsa: –A, poccadeni marinaja bica tani –najari.

**Pablo Bernabe tedsejeпа
dsama Pisidiacca odса panani
Atioquia bacco toquinajari**

¹³Nadsapa Pablo pohua tessedeni tedseje odса panani Papo jippehuaji

canoa imenibotedsa tohuacca-manadsapa dsama onini Pafiriadsa huana tocanamanajari. Nahi huana tocanamanahicca odса oninipi Perje. Nahidsana Huano Pablodeni inebobaquidsa pohua motta Jerosarehuaji toccanijari. ¹⁴Naraha Pablodenipa Perjedsa tojoppemanadsapa pohuadeni amoridsa dsama arobeni onini Pisidiahuaji tohuedajari. Nani Pisidiacca odса panani onini Atioquia bacco toquinajari. Nadsapa *jassinajacca huada bacco tadsapi jodiodenicca Dio Atti mamarihuaji tohueddsimadsa pahimarijari. ¹⁵Nadsapa Dio Atti mamaricca taminedeni Moisesicca marinaja hua quinajaro. Dio Atti cacomeraquuri najaridenicca dsodoniji naqui hua quinajaro. Najaro jicadsapi Dio Atti mamaricca taminedenia poccadeni madija ojaria icadossemanadsa Pablodendisa huati tajari: –Imecotedeni, Diodsa denima etidsenijine ima bicani ticajimanadsapi jidapana huati tiquinaji. Ticcadeni ima imittana, quinapaja taminedeni –najari.

¹⁶Nadsapa Pablo pocca ima huati tahijine totehemadsa pohua dsepe da najari, tocadidire nahijine. Nadsapa pohuadenidsa huati huati tajari: –Jehe occa madija Isaraerideni, madija ohuahadeni Diodsa iboraquuri tiquinajaro naqui titaharibobo canaji. ¹⁷Ia Isaraeridenicca Diopa icca ididini icattejidsabaquijari. Pohuajinena icca ididini madija ohuahadenicca dsama onini Ejitodsa madimanasapa tohuapjaripaja. Ejitocca taminejine pohuadenidsa ima oppina taraha, Diopa dacoraja najari. Pohuajine Ejitohuaji

jahininejaripaja. ¹⁸Nadsapa madija nohuerahihuaji huajano 40 naha jahiridsadsa naco Pohuadsa jehe quinahissa tajararaha Diopa paja inebobaquirihi najarajaripaja. ¹⁹Nadsapa icca ididenicca dsamabote Canahahuaji madimanahijine Diopa pohuadeni acco icamabaquijari. Madija ohuahadeni tohuatti onihi onihi cajimanajarideni madimanahi 7 quinaraha Diojine jicaridsajari. Nadsapa icca ididenidsa: “Ajijaro dsamapi ticcadeni tojana” najari Dio. ²⁰Nadsapa pohuadeni madiridsamanajaricca huajano huapimapa 450 najari. (Aja Ejtohuaji huajano 400 naha madimanageri, madija nohuerahihuaji huajano 40 naha jahiridsajari, dsotode Canahahuaji bacco toquinadsa huajano 10 naha nahicca madijadsa jadsire inanamanajaro.)

—Nadsama huajano 450 jicadsana icca idideni imarideni cattemade tojahijine Diopa onideni hua inajonabaquijari. Ojaria dsoqquedsapa ohuaha oni hua inajari. Najari dsoqquedsa naco ohuaha oni hua inajari. Nama dsanapomanajari. Ima cattemade jicahiccapa Dio Atti cacomerabote Samohuepaja. ²¹Nadsama Samohue madidsapa icca idideni pohuadsa huati toquinajari: “Iapi tamine deni tojahicca tohuina inani” quinajari. Attideni nama quinarsapa Diojine Saoro tamine tojadsapa huajano 40 naha dosse dosse najaripaja. Aja Saoropa Benjamin potemahi Quis bedi. ²²Nahi dsotodepa Dio Saorodsapa apaja nadsa Diojine *Dabina tamine tojajari. Nadsapa Dabidsa ajama najari Dio Attipa:

“*Dsesse-Isahi bedi Dabina madija bicahi. Pohua bodipa pina obodissa najari. Pohuapa ohuattissa inandsanaponitohui” nahi nade Dio Atti.

²³—Nadsama aja tamine *Dabi Potemahipa Jesopaja. Najarina ia Isaraerideni Tonassijade tojahijine Dio dosse inaronajari. Pina tahide Dio Pohua huati tapohuissa najaro. ²⁴Jeso maride toja-jaraccadsama tahidepa Huano Baotistana Isaraerideni huapima mari icanabaquipo dsapa ajama najari: “Jari, Diodsa tiquejenanijinepi ticcadeni imasiri tinebomanaji. Nadsana passo dsa tiadeni topa odsanabaquina” nahi nade Huano atti. ²⁵Nadsama Huanopa pohua dsoqquehicca huada tohuajiradsapi pocca mamari tabaqquidsapa tahide huati tapojari: “Aja tohui timadimanajaropi, aji ohuadsara: ‘Tia paji nitide’ titiquina najaro. Naraha ohuapi najari ojajerani. Aja tohui timadimanajaropi onatti ccajonahitohui. Ohuapi ajimani ojani. Pina pocca medsessa onanijinepi opajira-jerani. Pohua amoricca sadaria diccade naqui opajira-jerani” napohui nade Huano —najari Pablo.

²⁶—Jehe ohuemecotedeni, aji tiadenipi Abarahao potemahi tiquejenani titaharibobo canaji. Aji motapi madija ohuaha tiquejenaraha Dio Attidsa iboraquiritiquinani titaharibobo canaji. Diopa ia huapimadsa pocca ima icassiejeranijinecca inanaridsajaropaji. ²⁷Naraha aja Jerosaredsa madimanajarideni nipa poccadeni taminedenima Jeso qqui toquinaraha bodideni ssamoquiri najari. “Jesopa Diocca dosseniji ia Idinide” quina-jarajari. Najaro imapi Dio

Atti cacomeraququiri najarideni dsodo quinaporaha mittamana-jarajari. Poccadeni Dio Atti mamarihuaji jassinajacca huadadsa Dio Atti cacomeraququiri najarideni-cca dsodoniji mittamana mitta-mana naraha: “Jeso dsoqquena, dsoqquena” quinajaripaja. Nama quinadsapa pina Dio Atti cacomeraququiri najarideni dsodo quinaporarossa nehe inanamanajaro.

²⁸ Pohuadenipa: “Jeso ima inanajaro manaceni dsoqquena” quinaraha ima cappirahissa tajari. Naraha tamine Piratodsapa huati toquina-dsa: “Jeso dsoqquena” quinadsapa pohuadeni attidsa jehe nadsapa dsoqquehijine icadossebaququijari. ²⁹ Nadsapa Jeso inanadsoqque-manajaripa pohua dsoqquehijine tahimari Dio Atti dsodo napojaro-cca nemanehi inapajiramananissa tajaro. Ahua porimacossanidsa idironamanadsa sibadsa tonocco-birijine hui todsanidsa ibedsamanajari. ³⁰ Naraha Jesopa huada 3 nadsa Djojine nahatonijari. ³¹ Nahatonidsapa pohua huatimadedeni aja Carireahuaji pohuadsa jahiridsa-dsa Jerosarehuaji bacco toquina-jaridenidsa huada huapi taha ahahuatoni najari. Najarideni attidenipa: “Iapi Jeso camittemanihi qqui inade. Ia qqui inajari najaro ima ecomeraridsajaro” quiquinana-jaripaja –najari Pablo.

³² –Nadsama ohua Bernabe tedseje naqui Jeso tahimari icassiejeranijinecca tiadenidsa huati inajaropaji. Maittaccadsama Abi Diopa icca ididenidsa najaro ima huati tapojari. ³³ Jidapana iapi najarideni potemahi iquejenajaro-dsa najaro ima pajissa tojjajaro.

Najaria Dio Pohua Bedi Jeso inahatonijaripaja, pina maittaccadsama tamine Dabi pocca jijiri dsotodeccadsa dsodo inapojaro:

“Neppe, tiapi occa Ejedeni tijani. Jidapana ticca Abi ojjajaro. Tiadsa camittehe da onajaro”

nahi nade Dio. ³⁴ Nadsama Abi Dio Pohua Bedi dsoqquedsa inahatonidsapa dsoqquepoma-jarahijine huati tajari. Pohua ime naqui jadsijeranijine huati tapojaripaja. Najaro imapi Dio Atti cacomerabote Isahia dsodo inapojaro:

“Occa huatinaja pajissehe bicani nemanehi Dabidsa huati onapojaropi tiadenidsa pina ohuattissa onananitohui”

nahi nade Dio. ³⁵ Najaro imapi tamine Dabicca jijiri onihidsa naqui ajima najaro:

“Ticca Ejedeni Bicabote tijine pohua ime namidsa jadsijeranitohui”

naponi nade Dabi dsodo inapojaro. ³⁶ Nadsama aji Dabi dsodo inapojaropi pocca ima jerani nahato inani. Aja tamine Dabipa Diodsa ibora tadsa huajano huapi taha icca idideni ecahuabaququihissa tajari. Naraha huatiadsa ppa idsamanadsapa pocca abideni jicapojarideni-ssa najarohuaji tojjajari. Pohua ime naqui battadsa jadsijaro. ³⁷ Naraha Djojine Jeso nahatonijaripa pohua imena batta-jerajaro. Najaricca ima Dabi dsodo inapojaro –najari Pablo.

³⁸ –Ohuemecotedeni, tiadenipi ajijaro ima ticahatteraji: Jesodsapa iquejenadsapa pohuajine Diopa icca imasiridsa: “Epeje, ohuati ajimani” najari. Najaro imapi tiadenidsa ecomerajaropaji. ³⁹ Jesodsapa pajissa

inadsapi pohuajine imasiri ia tappa tabaqquijaro. Naraha Moisesicca marinajapi najarossa nejerani. Najaropi icca imasiri ia tappa tabaqquinijine pajira-jerajaro.

⁴⁰ – ¡Paji, Dio Atti cacomeraququiri najarideni dsodo quinapojarossa najaro tiadenidsa ssonarirana! Aja Dio Atti cacomerabote Abaco pocca dsodonijidsa ajijaro ima dsodo inajaro:

⁴¹ “Jari, Ohuatti jaja ticanamanajarodeni ticattomama canaji. ¡Ojine qqui tiquinadsapi oppinani temanadsa tijicanitohui! Nidsa timadimanaccadsama ojine jabojuhue imeni pajissa tojanitohui. Tiadenidsa najaro ima tojanijine huatide caji taraha pajissa tiquinejeranitohui”

napohui nade Dio –najari Pablo.

⁴² Nadsama najaro ima maride jicadsapa Pablo Bernabe tedseje *jodiodenicca Dio Atti mamarihuaji huedenadsapa pohuadenidsa queriquimanajarideni huati toquinajari: –Jassinajacca huada bacco tapomadsa Jeso tahimari ia mari ticanabaqupomanijine ticadajonapomana –quinajari. ⁴³ Nadsapa queriquimanaha jicadsa jodiodeni motapa Pablodenidsa jai tojajari. Jodio quejena-jararaha jodiodenicca marinajadsa toquejenajarideni naco jai tojajari, ima denima mittamanahijine. Nadsapa Pablodeni attidenia: –Jesodsa pajissa tiquinadsapi bicatani, nema tidsanapomanana. Dio tiadenidsa huati cahanari canahicca ima tinebomana-jerana –quinajari Pablodeni huati huati toquinadsa.

⁴⁴ Nadsapa jassinajacca huada onihi bacco tapomadsa queriquimanapomajari. Odsa pananicca

madija huapima Dio Atti mittade pohuadenidsa queriquimanajari. ⁴⁵ Naraha jodiodeni motapa Pablo Bernabe attidenitohui madija huapi taha queriquimanahi qqui toquinadsapa najaro acconi huadimanajari. Nadsapa attideni tabaccora tadsa atti atti quinajari:

–Ticca imapi pajissa jerani, ponima huati huati tinajaro. ¡Ticcaniji, tabaccora tinani! –quinajari Pablodsa.

⁴⁶ Naraha Pablo Bernabe tedsejepa cappinenera tadsa pohuadenidsa huati toquinajari: –Tahidepi aji icca madija jodiodeni tiadenidsana Dio Atti icassiejeranijinecca ima eccoraponijine Dio ia tocadossebaququidsapa nema inanjaro. Naraha tiadenipi timittamananijine jiperaququiri tiquinadsapi pajissa tiquinejerajaro. Nema tiquinejersapi tettideni pina: “Iapi Diocca camittehe jiquejeraniccadsa imadi-dsanaponijine ipajira-jerani” tiquinajarossa najaro. Jidapapa aja jodio quejena-jarajaridenira mari icanabaququina, inajaro. ⁴⁷ Abi Diopa madija huapima maride iquejenanijine Pohua Atti dsodo naponiccadsa ia tocadossebaququijari. Najaroa aji Pohua Atti cacomerabote Isahiacca dsodonijidsa ajima najaro:

“Ojine tiadeni pina ssiajanissa tiquinadsapi jodio quejenajarjaridenidsa madija tocassiejerahijine tahimari ahuato tinamananijine mari mari titicanabaququiridsamana nadsapi dsama nemanehedsa madiridsamanajarideni tocassiejerahijine, onajaro” napohui nade Dio –najari Pablo.

⁴⁸ Pablo atti nama nadsapa jodio quejena-jarajarideni mittamanadsapa huatidsemaneri najari: –Ia

Medsede Jeso tahimari bica tani, bica tani –quinajari. Nadsama aja camittehe jicaquera tanicca caji-manahijine Dio icattejidsabaquipo-jarideni Jesodsa jehe quinajaripaja.

⁴⁹Nadsapa ia Medsede tahimari icassiejeranijinecca najaro dsama arobeni nemanehedsa tojaridsajaro.

⁵⁰Naraha jodiodeni motapa Pablodenidsa huadimanadsa denima mari mari quinahijine jiperaquiri nadsapa ima inanaridsamanajaro. Pahuadenijine nahi Atioquia odsa pananica cacahuadedeni Pablodenidsa huadimanajari. Amoneje deni toquejenajaro aji Diodsa iboraquiri najaro ponideni naqui Pablodenidsa huadimanadsa ima ssaja taridsadsapi poccadeni dsama arobenihuaji mohua ininebaquimanajari. ⁵¹Nadsapa Pablo Bernabe tedseje najaridenicca tabaccorehe ahuato tanijine pahuadeni amoricca ssiqui catojanijine pporo pporo quinadsapa: –¡Epejena! Ticcadeni ima tabaccora tani –quinadsa odsa panani Iconiohuajina tohuedajari.

⁵²Naraha nahi Atioquiacca Jesodsa jehe quinajarideni huatidsemaneri najari. Dio Corime naco pahuadeni bodidsa tojaridsahissa tajari.

**Pablo Bernabe tedseje
Iconiodsa bacco toquinajari**

14 ¹Nadsama Pablo Bernabe tedseje odsa panani Iconiodsa bacco toquinadsapa jodiodenicca Dio Atti mamarihuaji tohuededsima nadsa mari mari ihicanabaquui najari. Attideni bica tadsa Jeso tahimari mari icanabaququidsapa jodiodeni mota huapi taha, jodio quejena-jarajarideni naco mota huapi taha pajissa

quinajari. ²Naraha jodiodeni mota aja Jesodsa jehe quina-jarajaridenipa jodio quejena-jarajaridenidsa huati naridsamanajari, Pablodenidsa tojiperamanahijine. Nadsapa pahuadeni attijine najarideni naco Pablodenidsa huadimanajari. ³Nama quinaraha Pablo Bernabe tedseje nahi pahuadenidsa madimana-dsanapojari. Ia Medsede Jesojine cappinenera tadsa Dio madijadsa huati cahanari canahi tahimarini mari icanabaquui-dsanapojari. Nadsapa najaro ima pajissa ahuato tanijine Dio Pablodenidsa pocca nahatohue da inadsapi canahatorimanana canaridsajari. ⁴Naraha nahi odsa pananica madija ima inapamanadsapi motapa: –Jodiodeni Jesodsa jehe quina-jarajaridenicca imana bica tani –quinajari. Naraha motadeni naco: –Jeso tahimari maridedenicca imana bica tani –quinajari. ⁵Naraha Pablodenidsa jiperaquiri najarideni aja jodiodeni mota, jodio quejena-jarajarideni tedseje, poccadeni taminedenima quejemamanadsa ima najoramanapojari: –Pablodeni damama inadsa inajidsobaququidsa sibadsa iquinabaququina, topamajonahijine –quinajari. ⁶Naraha Pablo Bernabe tedseje ima mittamanadsapa dsama onihi Licaoniahuaji dsaja tajari. Najaro dsamacca odsa panani onini Listaradsa bacco toquinajari. Dsotode naco odsa onihi Derbedsa bacco toquinapomajari. Odsa pamema najarods naqui bacco taridsamanajari. ⁷Najaro dsama Licaoniahuaji huedaridsadsapa Jeso tahimari icassiejeranijinecca mamariri naridsajari.

**Pablo Bernabe tedseje
Listaradsa nanajidso
toquejenajari**

⁸Nadsapa nahi odsa panani Listaradsa madija amori siri qqui quinajari. Pahuapa nama naha tossonajari, ccaridsahijine ssamo tajari. ⁹Aja amori siripa Pablocca marinaja taharibode huittajari. Nanaja Pablopa amori siri icattoma nadsa pocca jeheniji nahato tajari. Aja pohua bodipa: –Jehe, Jesopa ohua tonanomihijine pajirahi –najari. ¹⁰Nadsapa Pablo pohuadsa jadsirema huahua najari: –¡Titehemaji! ¡Tenissa taji! –nanaja amadsati totehema, ccaridsa najari.

¹¹Nadsama amori siri Pablo attidsa Diojine tobicahi madija qqui toquinadsapa dsama Licaoniacca madija pohuadeni attidenidsa johua johua quinajari: –¡Jidapapa ia cacahuade memehujicca madija toquejenadsa bacco naronamanahi, bacco naronamanahi! –quinajari. ¹²Nadsapa pohuadeni cacahuade memehujicca onidsa icanacani-baqquimanajari. Bernabepa pohuadeni cacahuade deni tojahicca Seo onidsa cacanjari. Pablopa huatijide rajarijine pohuadeni cacahuade-denicca ima huahuatide Hermese onidsa cacanjari. ¹³Nadsapi najaro odsa panani Listaradsa pohuadeni cacahuade Seodsa poccadeni daniji dada toquimahijinecca odsa cajimanajari. Odsa pananicca jahui bacco todsimaponi inidihuaji cahittajaro. Nadsapa Seodsa poccadeni daniji dada toquimade tamine pocca madija tedseje Pablodenidsa huatidsemanadsapa: –Icca daniji pohuadenidsa da inana –quinajari.

Nama quinadsapa bohui maqqi pamaha eccajonabaqqumana, mohue nahatohui tomattoccajine naco eccajonamana najari. Pablodenidsa: –Ia cacahuade tiquejenani –quinadsa bohui inapamajonamanahijineraha.

¹⁴Naraha Bernabe Pablo tedseje pohuadenidsa madija huatidsemanadsa bohui inapamajonamanahijine quinahi mittamanadsapa jabojo quinajari. Bodideni ocassera tadsa poccadeni etero mattonidsa joca sseo quinadsapa madija domodeni huahihuaji dsaja todsimajari. Attideni dacoradsa huati toquinajari: ¹⁵ –¿Nejecotohui ticcadeni ima iadsa nema tinanamanajaro? ¡Iapi madija, aji tiadenissa inani! Tiadenidsa ima bicani icassiejeranijinecca huatide icadajonajaro. Aji ponima iadsa: “Ia cacahuade Seo, Hermese” titiquina najaropi ¡tinebomanaji! Ticcadeni dio pohuamaccadsa: “Ia cacahuade” titiquina najaropi tinebomanaji. Dio camitta tajaridsara pajissa tiquinaji. Pahuana huapima inahatoridsajaro. Meme inahato, dsama inahato, passo imeni inahato najaro. Meme abari inahato, dsama abari inahato, passo abari inahato, ia huapima naqui ia tonahatobaqqujari. ¹⁶Naraha maittaccadsama Diopa madija huapima eccocobaqqujaradsapa poccadeni ima tohuira disseraqquri nadsa nama najonamanajari. ¹⁷Nama quinaorporaha Dio Puhujine pocca biquehe huapimadsa ahuatato dsanapojaro. Puhujine passo tiadenidsa cchacca-cca najaro, dsamatapa naco moro moro tajari. Puhujine jijipa titicajimana dsanapojaro, Puhujine

naqui tetetidsemana najaro. Najaro huapimadsa tibodidenipi: “Dio madihi” titiquina nanijineraha –quinajari Pablodeni.

¹⁸Pablodenipa huati huati quina-
raha mittamana-jarajari. Bohui
naco inapamajonahijine dissera-
qquiri naraha Pablodeni denima
huati huati quinadsa mittamana-
dsapa: –Epejena, pohua –quina-
jari.

¹⁹Nanaja Atioquiacca, Iconiocca
jodiodeni aja Pablodenidsa jipera-
qquiri najarideni nani Listaradsa
bacco najonamanajari. Najaro
odsa pananica madijadsa huati
naridsamanadsa Pablodenidsa ima
inanamanapomajaro. Nadsapa
pohuadenijine Listaracca madija
naco Pablodenidsa huadimanajari.
Nadsama aja huadimanajaridenina
Pablo dsoqquehijine sibadsa iquina-
qquimanajari. Iquinaqquimanadsa
Pablopa pohuadenidsa pina paja
huatiarjarissa nadsa odsa panani
huapihuaji joca coro quinadsa:
–Jidapapa dsoqquehi –quina-
jari. ²⁰Naraha aja Jesodsa jehe
quinajaridenipa Pablo ponahihuaji
qquide jahijona, bacco najonamana-
dsa domo huahuajaninaja Pablo
totehemadsa odsahuaji toccani-
jari. Huada ssiajapa Pablo Bernabe
tedseje Derbehuaji tohuedajari.
²¹Nahi Derbehuaji bacco toquinadsa
naco Jeso tahimari icassiejeranijine-
cca mari icanabaqquidsapa madija
mota huapi taha Jesodsa pajissa
quinajari.

**Pablo Bernabe tedseje
dsodonimanajari**

Nadsapa Derbehuaji maride
jicadsa pohuadeni nattihuaji

dsodonimanadsapa Listaradsa
bacco, Iconiodsa bacco, Atioquiadsa
naco bacco nanimanajari. ²²Hueda-
nidsa naco Jesodsa jehe quinajari-
deni huatidsemanahijine bodideni
acco icamabaqqui-ridsapomajari.
Pablo attidenia: –Jesodsa pajissa
tidsanapomanaji. Diojine ticca-
deni jeheniji todacorani dsanapo-
nitohui. Ocasserani teridsamana-
raha nema nehe tinahanamana-
ridsana. Tiadenidsama ia naqui
ocasserani inahananitohui. Nema
inadsana Diocca cacahueheda
bacco inanijine, inajaro –quinajari.
²³Nadsapa aja odsa panani onihi,
onihi naridsajarocca *Jesodsa jehe
quinajarideni cacahuadedeni toque-
jenahijine icattejidsa-baqquimana-
jari. Dio pohuadeni acco icama-
baqquihijine jipehe nebocossamana-
dsa Pohuadsa huati toquinajari:
–Abi Dio, ajararideni acco ticama-
baqquina, ticca Ejedenidsa jehe
quinajarideni ecahuabaqquimana-
hijine –quinajari.

²⁴Nahi dsotodepa Pablo Bernabe
tedseje dsama arobeni Pisidia
tossoniqquimani-manadsapa dsama
Pafiria bacco tanimanajari. ²⁵Aja
Pafiriacca odsa panani Perjedsa Dio
Atti maride toquejena nanimana-
jari. Nahi dsotodepa odsa panani
onihi Atariahuaji bacco dsippani-
manajari. ²⁶Nadsapa dsama Siria-
cca odsa panani Atioquiahuaji
tohuedanijine canoa imenibotedsa
tohuededsanidsapa tohuaccani-
manajari. Najaro odsa pananidsapi
tahide pohuadeni tojoppemamana-
pohuijine Jesodsa jehe quinajari-
deni Diodsa huati toquinapojari,
Dio pocca tohuati huanehema
pohuadeni ecahuabaqquihijine.

Nadsapa Pablo Bernabe tedseje Dio Atti eccoraridsamanehe jicadsapi najaro odsa pananihuaji huedanijari. ²⁷Atioquiadsa bacco nanimana-pomadsapa Jesodsa jehe quinarideni queriqquihijine huahua inabaquimanajari. Queriqquimanadsapa Jeso tahimari maride pohuadani huedaridsahicca ima huapima huati huati toquinajari. Djojine jodio quejena-jarjarideni bodideni najorahissa tadsa Jesodsa jehe quinajari tahimarideni naco huati huati toquinajari. ²⁸Nadsapa nahi Atioquiacca Jesodsa jehe quinaridenidsa abadsico huapi taha madimana-dsanapojari.

Jerosaredsa queriqquidsa imahaha canajari

15 ¹Nadsapa Pablo Bernabe tedseje odsa panani Atioquiadsa madimanaccadsa dsama Jodeacca madija bacco quinajari, Jesodsa jehe quinarideni maride jahijonajari. Poccadeni marinajapi ajima najaro: –Aji, jodiodenicca *huissinaja pina Moisesisca marinajassa najaro tetideni ajimadsapi *oppina tani. Najaro huissinajadsa jiperaquiritiquinadsapi ticassiejera-jeranitohui –quinajari Jodeacca madija. ²Naraha Pablo Bernabe attidenipa: –Nema nejerani, oppinera tani –quinajari. Nadsapa Moisesicca marinaja nahatoquiriti najarideni tedseje ahuaji huati ahuaji huati quinajari. Naraha poccadeni ima tobica-jeradsapi Atioquiacca madija attidenia: –Jari, najaro ima huatide imecotedeni Jerosarehuaji dosse inabaquina, aja Jesocca dodosse tabaqquidsa huati toquinahijine.

Nahicca Jesodsa jehe quinarideni cacahuadedeni tedseje ajijaro ima icattemamananijine –quinajari. Nadsapa icattejidsa-baquimanajari Pablo, Bernabe, nahi Atioquiacca Jesodsa jehe quinarideni pama quinadsa odsa panani Jerosarehuaji dosse inabaquimanajari.

³Nadsapa aja icattejidsabaquinaridenipa Atioquiacca Jesodsa jehe quinarideni attidenidsa Jerosarehuaji jai tojajari. Dsama arobeni Penisiadsa bacco toquinadsapa nahicca Jesodsa jehe quinaridenidsa Pablodeni huati toquinajari: –Jehe, icca benehidsapi jodio quejena-jararaha poccadeni ima nebomanadsa jidapapa Abi Diodsana toquejenaridsadija –quinajari. Dsama arobeni Samariadsa bacco toquinadsa naco najaro ima huati naridsamanajari. Nadsapa Jesodsa jehe quinarideni huapima poccadeni ima mittamanadsapa huatidsemanajari.

⁴Nama najonamanajaria Jerosare bacco toquinajaripaja. Bacco toquinadsapa Jerosarecca Jesodsa jehe quinarideni, Jesocca dodosse tabaqqi, Jesodsa jehe quinarideni cacahuadedeni quina-dsa huapima pohuadani qquide queriqquidsa: –¿Nija, bicaquiritiquinaqui? –quinajari. Nadsapa Pablo Bernabe tedseje pohuadenidsa huati toquinajari: –Jehe, icca benehidsa Dio Atti maride icadaridsadsapa Djojine jodio quejena-jarjarideni naco Jesodsa pajissa naridsamanade –quinajari. ⁵Naraha jodiodeni *marinaja pariseodsa jehe quinarideni mota Jesodsa jehe quinaraha Pablodenicca ima mittamanadsapa

totehemamanadsa huati toquinajari: –Aji ettipi madija ohuahadeni naco jodio quejena-jararaha ia Medsede Jesodsa jehe quinadsapa huissinaja cajimanana, inajaro. *Moisesicca marinajadsa iboqquri nadsapa oppina tani –quinajari.

⁶Nadsapa Jesocca dodosse tabaqqi Jesodsa jehe quinajari-deni cacahuadedeni tedseje queri-qquimanapomajari, najaro ima icattemamananijine. ⁷Nadsapa huapima ahuaji huati, ahuaji huati, ahuaji huati quinana ja manaco Pedro totehema nadsa pohuadenidsa huati tajari: –Ohuemecotedeni, occa ima tiadenidsa jidsera tapode. Aja madija ohuahadeni naco jodio quejena-jararaha pohuadenidsa Pohua Atti ohuaccoranijine Abi Diopa ohua tocattejidsajaride. Jeso tahimari icassiejeranijineccadsa pajissa quinahijine ohua cadosse-jaride. ⁸Diopa madija bodidendi nahato tajari. Jodio quejenajara-jaridendi Jesodsa pajissa quinahi Dio nahato tadsapa pohuadenidsa Pohua Corime inanaridsajari. Pina iadsa Pohua Corime inanaridsapojarissa najari. Nama nadsapa Dio Pohuajine jodio quejena-jarajaridendi naco pocca madija toquejenahijine jipa tahi ahuato inana jaro. ⁹Diopa pina iadsa inana jarossa najaro pohuadenidsa naqui nema inana jaro. Aja Pohuajine Jesodsa pajissa quinadsapa pohuadeni bodi inahire-baqqijari. ¹⁰Naraha tiadenipi znejecotohui tibodidenidsa: “Dio Pohuajine bica tejerani” tiquinajaro? “Dio nattome inana, ettidsa huadi-jarahitide” ztiquinajaroqui? Aji tettidenipi: “Jodio quejenajara-jaridendi Jesodsa pajissa quinadsapa

Moisesicca marinaja nemanehedsa iboraqquri nana” tiquinajaro. Naraha icca ididenipa Moisesicca marinajadsa iboraqquri nahijine pajiramana-jarajari. Ia naqui najaro marinajadsa iboraqquri inanissa tanijinepi ipajira-jerani. Nadsapa imecotedeni jodio quejenajara-jaridendi: “Moisesicca marinaja nemanehedsa iboraqquri tiquinaji” tiquinadsapi pina madija mijira tajaridsa: “ccanajabote jore tinajo” tiquinajarossa najaro. ¹¹Naraha nema tiquinejeraji, inajaro. Ia Medsede Jesona pocca tohuati huanehema pocca dacorehema ia tonassiajabaqqijari. Najaro imadsa pajissa inajaro. Jodio quejenajara-jaridendi naco pina iassa quinajari. Jesopa pocca tohuati huanehema pocca dacorehema pohuadeni naco inassiajabaqqijari –najari Pedro atti.

¹²Nadsapa madija huapima tocadidire nadsa taharibobo canadsapa manaco Bernabe Pablo tedseje poccadendi ima huati toquinajari. Aja jodio quejena-jarajaridendi Dio Atti maride huedaridsadsapa Dio canahatori canaridsajari tahimari huati huati toquinajari.

¹³Poccadendi ima jicadsapi manaco Satiaco huati tajari: –Ohuemecotedeni, ohuatti titaharibobo canaji. ¹⁴Ssino-Pedro iadsa huati tapojaricca imapi ajima najaro: “Diopa jodio quejena-jarajaridendi pocca tohuati huanehe ahuato inana jaro. Pohuajine jodio quejenajara-jaridendi mota pocca madija toquejenahijine icattejidsa-baqqipojari” nade Ssino-Pedro. ¹⁵Ima najarossa najaropi maittaccadsama Dio Atti cacomerabote Amo dsodo inapojaro:

¹⁶“Ia Medsede Dio Attipa ajima najaro: ‘Jehe, Dabi Potemahi jodiodenicca cacahuehepi jicani. Pina odsa toquehedimajarossa najaro.

Naraha nidsa occanipomadsapi Dabi potemahipa ohuacahua-baqqipomahitohui.

Ojine poccadeni cacahuehe toje-maninijinepi pina odsa jaca camanijarossa nanitohui.

¹⁷Nama onanabaqqidsapa madija huapima aja jodio quejena-jarajarideni naco pohuadeni Medsede Otohui qqui naridsamanadsapa Ohuadsa bacco quinahitohui.

Occa madija toquejenana, onadsa ocattejidsabaqqi-hitohui’ napohui nade Dio Atti maittaccadsama.

¹⁸Jehe, ia Medsede Diopa maittaccadsama Pohua Atti iadsa huati najonajari, itedsejemacca ima nahatoqqiri inanijine” nahi nade Dio Atti cacomerabote.

¹⁹ –Nadsama ohuattipi ajima onajaro: Madija ohuahadeni jodio quejena-jarajaripa poccadeni ima jadani nebomanadsa bodideni cacajiquimeradsa Diodsa toquejenaridsajaridenipa ijine ocasserani ahuamana-jarana. Pohuadenidsa: “Moisesicca marinajadsa iboraqqiri tiquinana” inejerana onajaro. ²⁰Nadsapi pohuadenidsa ajijaro imara dsodo inana: Aja siba nahatonidsa bani da tahiccapa mitta tiquina tajarajo, tijipamananijine *oppina tani. Bani ssipori niqui nahi dsoqquedsa emene toccajarahicca naco tijipamana tejeraji. Bani emene tijipamanahijine naco

oppina tahi. Huananehe naqui tinebomanaji. Pina maqquideje amoneje cajiraha amoneje onihija aja ajapi poni. Amoneje maqquideje cajiraha maqquideje ohuaha naja najapi poni. Tabiradeni naco pohuama aja aja canaridsera-jarana. Najaro imara pohuadenidsa dsodo inana, onajaro. ²¹Najaro ima huapima Moisesicca marinajadsa dsodo nanipi dsama huapimadsa tojaribaqqijaro. Najaro marinaja maittaccadsama mari mari quinapojaripa jidapana iadsa bacco najonajaro. Icca dsamadsa, dsama onihidsa, dsama onihidsa naqui jassinajacca huadadsa Dio Atti mamarihuaji pocca marinaja mari mari quinahi paja naccahi –najari Satiaco.

Jodio quejena-jarajaridenidsa ima dsodo quinajaro

²²Nadsapa Jesocca dodosse tabaqqi, Jesodsaja jehe quinajarideni naco, pohuadeni cacahuadeni tedseje huapima attidenipa: –Jehe, ajima inana. Najaro ima Atioquiacca imecotedenidsa dosse inana. Pablo Bernabe tedseje dsojo inanimananijine bica tani –quinajari. Nadsapa poccadeni madija pamaha naco Pablodenidsa tohuedahijine icattejidsabaqqimanajari. Ojaria onipa *Joda, pohua oni ohuahapa Barsaba. Pohua tessicattejidsamanajari onipa Sila. Pohuadeni pamahapa Jesodsaja jehe quinajaridenidsa deni toquejenajari. ²³Nadsapa pohuadenidsa ima teppe dosse quinajaropi ajima najaro: –Nija imecote jodio tiquejenajerajardeni ¿bicaqqiri tiquinaqui? Iapi Jesocca dodosse

tabaqqi odsa panani Jerosarehuaji Jesodsa jehe quinajarideni cacahuadedeni inadsa tiadenidsa icca ima dsodo inajaro. Aji odsa panani Atioquiadsa timadimanajarodenidsa, dsama Siriadsa timadimanajarodenidsa, aji dsama Ciliciadsa timadimanajarodenidsa naqui icca ima dosse inajaro. ²⁴Aji ima imittajaropi: Icca dsama Jodeahuajicca madija tiadenihuaji jai toजारidenicca marinajajine ocasserani temanani imittani. Attidenipa: “Jodiogenicca huissinaja ticajimanaji, Moisesicca marinajassa tinanamananijine” quinadsapa ssamoni temanajaro. Naraha najaridenipa ia dosse inabaqqi-jarade. ²⁵Nadsama imahaha icanadsa jehe icaniredsapi: “Imecotedeni Atioquihuaji huatide dosse inabaqqi” inadsapi ahuajicca imecotedeni pamaha icattejidsabaquidsa tiadenihuaji dosse inabaqqi-hitohui Bernabe Pablo tedseje. Jehe, Bernabe Pablodenipa imecote bicaca tajari, pohuadenidsa eti huana tajaro. ²⁶Pohuadenipa ia Medsede Jesocristo tahimari maride toquejenaridsadsa oppinani ahuaridsamanaraha attidenipa: “Ipamajonadsa naqui bica tani” quinajari. ²⁷Nadsama ia dosse inabaqqihijinepa Joda Sila tedsejena icca ima iaccamanadsa tiadenidsa huati toquinahitohui. ²⁸Dio Corime ibodi acco camadsapa etti ajima inajaro: Aji Moisesicca marinaja nemanehe tibodidenidsa ccanaja tadsapi Moisesicca marinaja mota deni tojaniccadsara iboraqqiri

tiquinaji, inajaro. Najaropi ajima najaro: ²⁹Aja madija icca Diodsa toquejena-jarajaridenicca bani poccadeni siba nahatonidsa da tahiccapa mitta tiquina tajarajo, tijipamananijine oppina tani. Bani ssipori niqui nahi dsoqquedsa emene tocca-jarahicca naco tijipamana tejeraji. Bani emene naco tijipamanahijine oppina tahi. Huananehe naqui tinebomanaji. Pina maqquideje amoneje cajiraha amoneje onihi aja ajapi poni. Amoneje maqquideje cajiraha maqquideje ohuaha naja najapi poni. Tabiradeni naco pohuama aja aja canaridsera-jarana, inajaro. Tiadenipi aji icca dsodonijissa tinanamanadsapi bica tani, inajaro. Epejeni icca ima –quinajari poccadeni ima teppedsa.

³⁰Nadsapa Joda Siladenidsa poccadeni ima da quinadsapi: –Dio onima jai tijanissa tana –quinajari. Nadsapa Pablo, Bernabedeni tohuedanidsapa Joda, Sila tedseje pohuadenidsa tohuedajari. Atioquiadsa bacco tanimandsapa nahihuajicca Jesodsa jehe quinajarideni tedseje queriquimanadsa pohuadenidsa ima teppe da quinajaro. ³¹Nadsapa Jesodsa jehe quinajarideni ima teppe hua quinadsa ima bicani mittamandsapa huatidsemanajari. ³²Joda Sila tedsejepa *Dio Atti huahuati toqqimadedeni toquejenadsapa Jesodsa jehe quinajaridenidsa Dio Atti huati iqqimamanajaro. Poccadeni huatinaja dequericcadsa huati huati toquinadsapa Jesodsa jehe quinajari bodideni inahatidsebaqqiimanadsa poccadeni jeheniji todacorani najaro. ³³Nadsapa

nahidsa madimana-dsanaponaja pohnadeni dosse inabaquimana-pojaridenihuaji tohuedanihijine Atioquiacca Jesodsa jehe quinajari Jodadeni dosse inanibaquimana-jari. Attidenipa: –Jehe, Dio pocca jonehema tiadeni tohuacahua-baqquihissa tahitohui –quinajari. [³⁴Naraha Silapa ibohuijine tohuini nadsa toccani-jarajari.] ³⁵Pablo Bernabedeni naco Atioquiadsa madimanaccajari. Pohnadenipa Atioquiacca Dio Atti mamarideni tedseje ia Medsede tahimari icassiejeranijinecca mari mari dsanapomanajari.

Pablo pocca benehi dsotodecca

³⁶Nadsapa nahi Atioquiadsa madimana-dsanaporaha Pablopa Bernabedsa: –Jina, Dio Atti mari icanabaquiphohuihuaji icadapomana. Aja imecotedeni Jesodsa jehe quinajarideni ¿nejecoma quinahi? –najari Pablo.

³⁷Nanaja Bernabepa Huano pohnadsa Maraco quiquinanajari pohnadenidsa toccahijine tohuini najari.

³⁸Naraha Pablo attipa: –Najaripa pohna. Tahidena ibiji accode tojaraha dsama Pafiriahuaji ia tonebo-baqquide, denima Dio Atti maride iquejena-dsanaponijineraha –nade.

³⁹Nadsapa imahaha canaraha jehe canire-jaradsa pohnadeni queneboredsapa ahuaji toccade ahuaji toccade quinajari. Nadsapa Bernabe Maraco tedseje canoa imenidsa tohuedajari. Dsama bedeni passo imenidsa huittidsaccossani onini Siphrehuaji bacco toquinajari. ⁴⁰Naraha Pablopa: –Silana ohuadsa toccana –nadsapa tohuedahijine Jesodsa jehe quinajarideni Diodsa huati toquinajari: –Abi

Dio, ajararideni tecahuabaqquihissa tana. Ticca tohuati huanehema huedaridsahissa tahijine –quinajari. Nadsapa tohuedajari. ⁴¹Tohuedadsapa dsama Sirdadsa bacco toquinadsa maride toquejena, denimacca dsama Ciliciadsa bacco toquinadsa maride toquejena dsanapojari. Nahihuajicca Jesodsa jehe quinajarideni inahatidsebaqquija dsanapohui najari.

**Timoteopa Pablo Siladeni
huatimade tojajari**

16 ¹Nadsapa Pablo Sila tedseje odsa panani Derbedsa bacco toquinajari. Denima tohuedajaripa odsa panani Listaradsa bacco toquinajari. Nahidsapa Timoteo madijari. Pohna Jesodsa jehe napojari. Pohna imeni naqui Jesodsa jehe napojaro. Ponipi jodio, naraha imehipa dsama Cresiaccamadija. ²Nadsapa aja Listaracca Jesodsa jehe quinajarideni attideni, odsa panani Iconiocca Jesodsa jehe quinajarideni attideni naco: –Timoteopa dsabisso bicahi –quiquinanajari. ³Nadsapa Pablo attipa: –Timoteopa ia acco tocambaqquihijine iadsa toccana –najari. Naraha Timoteo imehipa jodio jaraha dsama Cresiaccamadijaha nadsapa huapima pohnadsa nahatoqquri najari. Cresiaccamadijapa jodiodenicca *huissinaja cappiramanadsapa Timoteo naco huissinaja cappirajari. Nadsapa Pablo attia: –Timoteo iadsa toccadsapa jodiodeni iadsa jiperaqquri nahitohui. Nadsapa huissinaja cajidsana toccahi bica tahi –nadsa Timoteo amadsati huissinaja cajijari.

⁴Nadsapa jai tojadsapa odsa panani onihidsa jai tojedsima, odsa panani

onihidsa jai tojedsimadsanapojari, aja Jesodsa jehe quinajarideni maride. Aja Jesocca dodosse tabaqqi Jerosarecca Jesodsa jehe quinajarideni cacahuadedeni quina-dsa ima teppe dsodo quinajaro-ccadsa mari icanabaqqi-ridsajari. ⁵Nama quinadsapa madija Jesodsa jehe quinajaridenipa poccadeni jeheniji todacorani najaro. Madija ohuahadeni naco huada huajijiradsa Jesodsa toquejena toquejena dsanapodsapa tohuapijari.

**Pablocca huadadsa
Masedoniacca madija
huati tajari**

⁶Nadsapa dsama Asiahuaji jai tojahijineraha nahihuaji mari quinahijine Dio Corime ecossadsa jai toja-jarajari. Nadsapa dsama Pirijiahuaji mari mari tosso-niqquimamana, dsama Carasiahuaji mari mari tosso-niqquimamana dsanapojari. ⁷Nadsapa dsama onih Misia inorinidsa bacco toquinajari. –Dsama Bitiniahuaji issoniqquimamana –quinaraha nahihuaji Jeso Corime ecossajaro. ⁸Nadsapa nahi Misiadsa tosso-niqquimamanadsapa passo imeni inidihuaji jai toje-dsippadsa odsa panani Troadehuaji bacco toquinajari. ⁹Nahi Troadedsa cahadijadsana Pablopa pina pocca huadassa naha cajijari. Diojine dsama Masedoniahuajicca madija nahi Masedoniadsa ahuatodsas huahi qqui tajari. Pohuadsa huahua najari: –Jari, icca dsamahuaji ticcajonaji, ia acco ticamabaqqinijine –najari Masedoniacca madija. ¹⁰Nadsapa pocca huadassa nadsa qqui tajarijine Masedoniahuaji jai tojahijine najoramanajari. Aji ohua Roca naqui

pohuadenidsa occanijine onajorajaro. Diocca dosseniji ibodidsa ahuato tadsapi pajissa nanihuaji Jeso tahimari icassiejeranijinecca mari icanabaqqihijine nahatoqquri inajarode.

**Pablo Sila tedsejapa
Piripodsa madimanajari**

¹¹Nadsapi odsa panani Troadedsa ijoppemadsapi canoa imenidsa jajajaro. Passo imeni nocconihuaji iaccajaro. Ojari iaccarini nadsapi dsama huittidsacossani onini Samotrasia-dsana huana icanade. Huada ssiaja iaccapomadsapi passo imeni inidicca odsa Neaporihuaji huana icanade. ¹²Nanidsa jajjemoradsa jajajaropi odsa panani Piripodsa bacco inade. Najaro odsa pananipi Romacca *colonia tojajaro. Dsama Masedonia arobenihuajicca odsa panani deni tojanicca, bica tanicca. Nanidsa huada pamema nehe imadijaro. ¹³Nadsapi jassinajacca huada bacco tadsa Dio Atti mamari odsa nohuera-dsapi odsa panani amossinihuaji jajjenajaro, hueni inidihuajina jajjedsippade. Nahihuaji Diodsa huatide totoqueriqqui najari itide inadsa. Nahihuaji bacco inadsapi amoneje ponidenira queriqquimanani qqui inabaqqidsapi ia naqui ponidenidsama nanidsa jassi inadsa Dio Atti mari icanabaqquijarode. ¹⁴Ponideni tassani ojariepi odsa panani Tiatirahuajicca. Oninipi Lidia. Ponipi etero dsojorani huatini ccara tanicca dadade. Najaro etero cocoro todsippapi pina amaidadassa najaro. Najaro amonejepi Dio Attidsa ibora tajaro. Ia Medsede Jeso poni bodini acco icamadsapi Pablocca marinaja ponidsa bica tadsa mittanissa tajaro. ¹⁵Nadsapi Lidia Jesodsa pajissa

nadsapi totopa cajijaro. Ponicca odsacca madija naco huapima totopa cajiridsamanajari. Nadsapi poni attini iadsa: –Aji ohuadsa tibodideni: “Ia Medsededsa pajissa nani” tiquina dsapi jina, occa odsahuaji timadimanaji –nade. Iadsa huatide dissera tadsapi ponicca odsadsa imadijarode.

**Dsohuatopi Pablodeni
natti toccamissajaro**

¹⁶Nadsapi huada onihidsa aja Diodsa huati huati totoquina nahihuaji jajedsippanipomadsapi dsohuato madija tedsejemadenicca ima nahato tajaro jahuidsa bacco ijidsade. Ponipi najaro odsapananica madijadenicca *medse. Poni bodinicca tocorimejine nahato tajaro. Najaria aja poni medse tonanadedeni ihidossemana nadsapi madija tedsejemadenicca ima huati huati tadsa dsiniro cacajimana najari. ¹⁷Najaro dsohuatopi Pablo,

ia inajaro inatti motta huahua cajamissaponi nade. Poni attinipi ajima nade: –¡Ajaridenipa Dio memehuaji madijari Attidsa iboraqquri nahi, nahi! ¡Ajaridenipa Dio tiadeni tonassijabaqquihijine tahimarini tiadeni mari tocana baquimanahitohui, mari tocana baquimanahitohui! –nanamissa najarode.

¹⁸Huajjiradsa inatti motta nema nema nanajona nadsapi poni attini mittade iadsa tocasserani nadsa Pablo pohua natti qqui tanidsa dsohuato bodinicca tocorimedsa huati tade: –Jesocristo onima huati onana: ¡Tiquenaji! onajaro –nade Pablo. Pohua atti nama nanaja tocorimepa amadsati qquenajaride.

¹⁹Nanaja aja dsohuato poni medse tonanadedeni poni bodinicca nahatobote amossi nahi qqui toquinadsapa: –¡Jaho! Nema nadsapi ¿dsiniro icappirapadseje?



Jidapapi poni bodinicca nahatobote cappirani –quinajari. Nadsapa Pablo dama, Sila dama quinadsa odsa panani nocconihuaji iacca-baqquimanajari, ima cacattemadedenidsa huati toquinahijine. ²⁰Ima cacattemadedenihuaji bacco toquinadsapa huati toquinajari: –¡Qqui, ajajari jodiodenipa icca odsa pananicca madijadsa mohua mohua naridsamanapaja! –quinajari. ²¹–Poccadeni ididenicca madie tahimarini mari mari quinajari. Naraha iapi romanodeni iquejenadsapi poccadeni ididenicca madie tahimarinidsa jehe inejerani. Najarodsa iboraqquri inejerani. Iadsa oppina tani –quinajari.

**Pablodeni toponi cocoro
todsimsadsa cororo
idsimamanaraha tappa
inabaqquimanajari**

²²Nadsapa madija huapima Pablo-denidsa huadimanadsa itabaromanahijineraha ima cacattemadedenipa soldadodenina icadossebaqqujari: –¡Jari, eterorideni ssiti taridsamanadsa titabaromanajo! –quinajari. ²³Nadsapa itabaromanajari, cacotabote nadsa toponi cocorodsa cororo idsimamanajari. Nadsapa toponi cocoro cacahuade-dsa huati toquinajari: –Ajajarideni tecahuabaqquihissa tajo, dsaja tajarahijine –quinajari. ²⁴Nadsapa toponi cocoro cacahuadepa ima cacattemadedeni attideni mittadsapa bodiccadsana iaqqedsimabaqqujari. Issodeni ahuadsa cabasso nadsa jore caniquimadsa pamidsadsa canajari.

²⁵Nadsapa Pablo Sila tedseje dsome nocconiraha Diodsa

huahuatiti dsajari, Diodsa huatidsemanadsa jijiriri dsadsapa toponi cocorocca madija mittamanajari.

²⁶Naneje nami jadsirema dsadsa najaro. Toponi cocoro todsimacca odsapi sibadsa canahatonije najaro dacoraraha poni cahittanicca nami dsadsa nadsapi najaro odsa naqui dsadsa canajaro. Nadsapi noccobiji naqui tohuabajaro, domo huedsajarideni issodenicca, bijidenicca cadena naco jeo huajaridsajari.

²⁷Nanaja toponi cocoro cacahuade nocco tojadsa qqui taneje noccobiji tohuabani qqui tadsapa: –¡Jaho domo toccahi! –najari pohua bodi. Nadsapa toponi cocorodsa domo huedsajarideni domo toccahi manaconipa pocca taminedeni pohua inanadsoqqe-manahi noppine cappinadsa pohua huajinahijine pocca toponi huahuajina equidi najaro. ²⁸Naraha Pablo pohuadsa huahua najari: –¡Paji! ¡Tia tejina tejeraji! Iapi huapima aji jassi idsani –najari.

²⁹Nadsapa toponi cocoro cacahuade jojororotohui huahua nadsa jojororo eccajonamanadsa piri todsimamanajari. Nadsapa toponi cocoro cacahuade bodihuaji joppa todsimanaja jabojo najarijine tacca-cca najari. Pablo Sila baccodenihuaji pohua pitodsa huitta najari. ³⁰Nadsapa toponi cocoro bodihuaji pahimidsaraha eqquena-baqquidsapa huapiccadsana pohuadenidsa huati tajari: –Jaho, ohua naqui ossiajanijinepi ¿nejecoma onanijine? –najari.

³¹Naraha manaco pohuadsa huati toquinajari: –Ia Medsede Jesodsa pajissa tadsapi tissiajanitohui. Ticca madija naco Jesodsa pajissa

quinadsapa tocassiejerahitohui
–quinajari Pablo Sila tedseje.

³²Nadsapa toponi cocoro cacahuade pocca madija jahijonadsa Pablodeni ia Medsede Jeso tahimari mari icanabaqquimanajari. Nadsapa huapima mittamanajari. ³³Nadsapa dsome nocconiraha toponi cocoro cacahuade passohuaji iaccabaquidsapa bejorideni ssahua inaridsajaro. Nadsapa najaro dsomedsa pocca madija huapima totopa cajimanajari. ³⁴Topade jicadsapa toponi cocoro cacahuade pocca odsahuaji Pablodeni najipabaquijari. Diodsa jehe nadsapa huatidseri najari. Pocca odsacca huapima naco Diodsa jehe quinadsapa huatidsemaneri najari.

³⁵Najaro ssiajadsa ima cacattemadedenipa Pablo Sila tedseje tappa inabaquimanahijine soldado pamaha toponi cocoro cacahuadedsa huatide dosse inabaquimanajari. Tohuedadsapa toponi cocoro cacahuadedsa huati toquinajari: –Aja ima cacattemadedeni attidenipa: “Pablo Sila tedseje tappa tinabaquina” quinapaja –quinajari. ³⁶Nadsapa toponi cocoro cacahuade Pablodsa huati tajari: –Jidapana ima cacattemadedeni attidenidsa tiadeni tappa onabaquiniijine. Tiadenidsa ima nohuerani. Mohuaradsa ticadenaji –najari.

³⁷Naraha Pabloda soldadodeni dsapa huati tajari: –¡Icadena-jerani! Ajina, iapi romanodeni iquejenaraha icca ima cattemerani ia huaccade soldadodsa ia tocadossebaquidsapa ia itabaromanajaro. Madija huapima naco ia qqui toquinade. Nadsapa ia

itabaromanadsapa ecotabote nadsa toponi cocorohuaji ia corotodsimabaquijaride. ¿Naraha jidapana naqui icca ima cattemajeraraha najimehedsa ia dosse tomani-baqquihijineco? ¡Poni, iapi najimehedsa icadena-jerani! Ima cacattemadedeni jahijonadsa pohuadenira ia tappa tabaqquimanahijine huati tinanimanana –najari Pablo.

³⁸Nadsapa soldado pamaha ima cacattemadedenihuaji tohuedanidsa Pablocca ima huati tanimanajari. Aja Pablo Siladenipa romanodeni quejenahi ima cacattemadedeni mittamanadsapa jabojo quinajari. ³⁹Nadsapa ima cacattemadedeni cappinamanadsa toponi cocorohuaji jai tojajari, bacco toquinadsapa Pablodenisapa huati toquinajari: –¡Jaho! Ijine tiadenidsa ima bica tejerani. Jidapapi icca ima nanidsa epejena –quinajari. Nadsapa Pablo Sila tedseje eqquenabaquidsapa mohuaradsa pohuadenidsa huati toquinajari: –Jidapapi aji icca odsa panandsapi timadimana tejerana. Ajicca odsa panani onihihuajina ticadana –quinajari. ⁴⁰Nadsapa toponi cocorohuaji huenedadsapa Lidia madinihuaji tohuedanijari. Nadsapa nahidsa Jesodsa jehe quinajari bodideni acco icamabaquidsapa huatidsemaneri najari. Nadsapa denima tohuedajari.

Tesaronicahuaji mohuaniji tojajaro

17 ¹Nadsapa Pablo Sila tedseje tohuedajari, odsa panani Apiporidsa tossoquimamana, odsa panani onihi Aporoniadsa

tossoniquimamana dsanapojari. Nadsapa odsa panani Tesaronicadsa bacco toquinajari. Nahicca jodiendenipa Dio Atti mamari cajimanageri. ²Aja Pablopa benehidsa ccaridsadsapa huajijiradsa jodiodenicca Dio Atti mamarihuaji toqquedsima toqquedsima naridsajari. Nama nanaridsa nadsapa nahi Tesaronicadsa naco jodiodenicca Dio Atti mamarihuaji totoqquedsima najari. Semana 3 naha madicadsapa jassinajacca huadadsa Dio Atti maride totoqquedsima najari. Nahidsa Pablo jodiideni tedseje imahaha canajari. Pablopa Dio Atti maittaccadsama dsodo napojarocadsa mari icanabaqqujari. ³*Cristo-Mesiacca ima pohuadenidsa ahuaato tanijine mari icanabaqqujari. Pohuadenipa Mesiatohui madimanajari. Mesiapa ocasserani ahuaadsa dsoqquehitohui, dsotode nahatonihitohui, quiquinanageri Dio Atti cacomeraququiri najarideni. Najaro ima Pablo mari icanabaqquidsapo pohua atti jodiodenidsa: –Aja Jeso tahimari tiadeni mari ocanabaqqujaropi aja icca Mesiapaja –najari.

⁴Nadsapa jodiideni mota Jesodsa jehe quinadsapa Pablo, Siladenidsa toquejenajari. Dsama Cresiaccamadija Diotohui quinajarideni huapitaha Jesodsa jehe quinajari. Nani Cresiahuajicca amonejedeni dsapanideni ssequiri najaro mota huapitehe naqui Jesodsa jehe quinajaro. ⁵Naraha jodiideni mota Jeso tahimaridsa jiperaququiri najaridenipa poccadeni madija Jesodsa toquejenajari acconedeni huadimanajari. Najaridenipa odsa pananiccamadija ibohuedsa tabaccoreheda

madiridsamanajarideni huahua inabaquimanajari. Nadsapa najarideni tedseje huapima domo ccaridsadsa mohua mohua naridsamanajari. Odsa pananiccamadija huapimapohuadenijine domo qquenadsapa ahuaaji johua ahuaaji johua quinajari. Aja domo ccaridsajaridenipa Pablo Siladenitohui Jasonacca odsahuaji bacco toquinadsapa mohua todsimamanajari. Pablo deni jocacaininebaquimanadsa madijadenidsa dahaha inabaquimanadsapa inajidso-baquimanahijineraha. ⁶Naraha Jasonacca odsadsa Pablo Sila tedseje nohue quiradsapa Jasonara dama, pohua tesse Jesodsa jehe quinajari pamaha damama quinadsa odsapananiccamaminehuajina iaccabaqqui-manajari. Bacco toquinadsapa momohuadenipa taminedenidsa poccadeni maidsehera huati toquinajari: –¡Icca dsamahuaji madija ohuaha bacco quinahi! ¡Pohuadenipa dsama onihidsa, dsama onihidsa ima inatabaccora-ridsamanadsa jidapapa aja idsamaridsa bacco quinajari! ⁷¡Aja Jasona joca idsimajaripa pocca odsadsa eahuabaqquihi! –quinajari, johuahua johuahua canadsa. –Aja madija ohuaha jahijonajaripa icca tamine deni tojahicca marinajadsa iboquiri najari. Icca madija mota naco pohuadeni attijine tohuibomanahitohui. “Jidapapa tamine ohuaha tojahi, pohua onipa Jeso” quinahi imittani –quinajari maidsamanadsa.

⁸Nadsapa najaro ima mittamandsapa nahicca queriquimanajarideni taminedeni tedseje huadimanajari. ⁹Naraha Jasona pohua tesse tedseje poccadeni ima

cattema-jeraccadsa taminedenipa pohuadenidsa huati toquinajari:
 –Dsaja tinajeranijine iadsa ticcadeni dsiniro da tiquinaccaji –quina-jari. –Nadsapi nidsa ticcadeni ima cattemehe jicadsana ticcadeni dsiniropi da inaninijine –quinajari. Nadsapa Jasona pohua tesse tedseje taminedenidsa dsiniro da quina-dsapi tappa inabaquidsa jai tojanijari.

Pablo Sila tedsejepa Bereahuaji

¹⁰Naraha najaro dsomedsa Tesaronicacca Jesodsas jehe quinajari-denipa huassinaja Pablo Sila tedseje dossesse quinajari, odsas panani Bereahuaji tohuedahijine. Tohuedadsapa Bereadsas bacco toquinadsa nahidsa madimanajari. Nadsapa jodiodenicca Dio Atti mamarihuaji tohuededsima najari, Jeso tahimari maride. ¹¹Jodiodeni Bereadsa madimanajaridenipa bicaquiqui najari, pina aja Tesaronicacca huadiquiqui najaridenissa quina-jarajari. Dio Atti mittamanedsatija najari tohuini quinajari. Nadsapa huajjiradsa *Dio Atti dsodo napojarocca huade toquejenajari. Pohuadeni bodipa: –¿Pablo attipa pajissaqui? ¿Pina aji ima dsodo napojaroccassa naqui? –quinajari. ¹²Nadsapa jodiodeni mota huapi taha pajissa quinajari. Cresiacca madija naco mota huapi taha pajissa quinajari. Aji amoneje dsapanideni ssequiqui najarodeni, maququideje naco huapi taha pajissa quinajari. ¹³Naraha aja Tesaronicacca jodiodeni mota Jeso tahimaridsa jiperarquiqui najaridenia ima mittamanajari: –Pablo Sila tedsejepa Bereacca madija naco Dio Atti mari icana-baquiqui –quinahi mittamanadsapa

huadimanapomajari. Nadsapa Bereahuaji jai tojajari. Bacco toquinadsa nahihuajicca madija Pablodenidsa huadimanahijine ima inanamanapomajaro. Mohua mohua naridsamanadsapa Bereacca madija ssamoni ahuamanajari. ¹⁴Naraha Jesodsas jehe quinajarideni ima mittamanadsapa Pablo huassinaja dsama onihihuaji dosse quinajari. Nahi Bereacca madija naco pohuadsa jai tojajari. Nadsapa Pablo Bereacca madija quinadsa passo imeni inidihuaji jai tojedsippajari, poni huapi jai tojabacossahijine. Naraha Sila Timoteo tedsejepa nahi Bereadsa madimanaccajari. ¹⁵Nadsapa Bereacca madija Pablo iaccamanadsapa odsas panani Atenahuaji bacco toquinadsa nahidsana Pablo inebomanajari. Jahinidsapa Pablocca ima huati nanimanajari: –Pablo attipa: “Sila Timoteo tedseje huassinaja huedajonana” napaja –quinajari.

Pablopa Atenahuaji


¹⁶⁻¹⁷Pablopa Sila Timoteodeni tohui odsas panani Atenadsa madijari. Nahidsa madidsapa jassinajacca huadadsa Dio Atti mamarihuaji totoququedsima najari, Jeso tahimari maride. Nahidsapa jodiodeni, jodio quejena-jarajari Diodsa jipaquiqui najarideni tedseje quequeriqui nadsa pohuadeni mari mari ihicanabaquiqui najari.

Naraha Pablo nahidsa madidsa najaro odsas panani siba nahatoni ijiridsani qqui taridsadsapa bodi nacassera tajari. Nama nadsapa huada huajjiradsa todsepetaji dadade madija caji tahihuaji aja nahidsa madija jahiridsajaridenima Jeso tahimaridsa imahaha canadsa

ahuaji huati ahuaji huati quinajari.
¹⁸Nadsapa madija mota *marinaja epicoriodsa jehe quinajarideni, *marinaja estoicodsa jehe quinajaridenipa Pablo tedseje ahuaji huati ahuaji huati quinajari. Nadsapa mota attidenia: –Ajajari attijide rabotepa ¿nejeco imara iadsa huati huati tajarinaja? –quinajari. Madija ohuaha attideni naco: –¡Dsama onihicca madijadeni cacahuade tahimari eccoraridsajaro raneje! –quinajari. Nama nama quiquinanajari. Pablopa ima bicani icassiejeranijinecca huati huati tajari, Jeso nahatonijari tahimari huati huati tajariraha pohuadenipa mittamana-jarajari.
¹⁹Nadsapa Pablodsa: –Jina, ajicca ssono Areopacohuaji ticca ima huati tinanissa tanijine iadsa tiqqemoraji –quinadsapa iaqqemoramanajari. Nahidsana huada huajijiradsa nahatoquiri najarideni totoqueriqui

najari, imahaha canahijine. Ssono bacco tomoramanadsapa pohuadsa huati toquinajari: –Jari, ticca ima imittana. ¿Nejeco imara huati huati tinajaroneje? –quinajari. ²⁰–Ticca marinaja imittapo-jerajaro, iadsa pina ima jidsa tanicassa najaro. Denima imittanijine jipapa inani –quinajari. ²¹Aja Atenacca madija, dsama onihicca nahidsa madimanajarideni naco Pablodsa nama nama quiquinanajari, aji ima dsati tohuinira quiquinanajari.

²²Nadsapa nahi Areopacodsa Pabloa totehemadsa pocca ima huati tajari: –Jehe Atenacca madija, tiadenidsa huati onana. Ticcadeni siba nahatoni jiquejerani qqui onaridsani. Ticcadeni daniji botta botta tahijinecca siba hua tamaroni naqui qqui onaridsani. Tiadenipi tiadeni cacahuadedeni tohuideni disseraqquri tiqinani



qqui onani –najari. ²³ –Jehe, ticcadeni odsadsa occaridsadsa ticcadeni nahatoniji tiadeni cacahuadedenidsa da tiquinahijinecca huahuanari qqui onaridsajaro. Huahuanari ojarie huapinidsa dsodo nanipi ajima najaro: “Dio ohuahapa oni ssamoqquri inaccani” titiquina najaro dsodo nanidsa qqui onajaro. Jehe, tettidenipi bica tani. Aja Dio ohuaha oni ssamoqquri tiquinaccajaripa pohuadsa tetetidsemana najaropaji. Najari pocca imaha tiadenidsa ohuacomerajaropaji –najari Pablo.

²⁴ –Ajijaro dsamapi Dio inahatorajaro. Aja huapima caji taridsajari naco Dio inahatoridsajari. Pohua inahatoridsajaripa Dio Pohuana huapima ecahuajaro. Meme ecahua, nami ecahua najaro. Diopa madijacca nahatonijidsa madiridsa-jarahi. Pina odsadsa, siba nahatonidsa, Diopa nama nahidsa madiridsa-jarahi. ²⁵Diopa cappiraha madijarahi. Pohua biji accode tohui najarajari. Pohua ehuerahi nahatojide rahi. Pohuana camittehe jinede. Pohuajinena jappopponi icajidsapi jassi jassi ihinanajaro. Pohuana icappira-jeranijine huapima iadsa da da ihinaridsa najaropaji –najari Pablo.

²⁶ –Diopa madija ojarie inahatorajari. Najaria aja icca idi tahideccapaja. Dio Pohuajine madija huapimapa najari potemahi toquejenaripaja. Najari pohua potemahia madija dsama onihidsa toquejena, dsama onihidsa toquejena, dsama onihidsa toquejena naridsajaria dsama huapimadsa madiridsamanajaripaja. Diopa nahato tapods madija icattejidsa-baqqujari: “Ajajaridenipa

ajijaro dsamadsa madimanahijine, dsama onihidsa madimana-jarana. Ajaccajaridenina ajicajaro dsamadsa madimanahijine, dsama onihidsa madimana-jarana” naridsapojari. Diopa Pohua jipa tadsa dsama onihideni inana tani. Dsama onihinaqui ajimani inana tani. Nama naridsajari. ²⁷Dio madija inahatorajari Diopa Pohua tohui quinahijine. Dio Pohua tohui quinadsa qqui naridsamanajaridenipa Dio Pohuadsa bacco toquinahijine itide. Naraha Diopa madija huapimadsa huaji tajarahi. Iadsa huajira tahi. Tiadenidsa huajira tahi. Ohuadsa naco huajira tahi. ²⁸Abi Dio Pohuajinena aji imadijaropaji. Pohuajine jajajaridsa najaropaji. Pohuajine iquejenaridsajaropaji. Najaroa aji ticcadeni ajie nahatobotedeni jiri icanamanapodsapi: “Dio Pohua potemahi iquejenajaro” quinapojari. ²⁹Nadsama aji iapi Dio ia tonahatorajari. Dio Pohua potemahi iquejenani. Nadsapa ibodidsa: “Diopa pina madijacca nahatonajassa nahi” inejerana. Diopa pina huatini ccara tanicca oro nahatonissa najarahi. Pina dsibehi tanicca plata nahatonissa najarahi. Pina ccara taniicca siba nahatonissa najarahi. Nema naniccapi madija pohua bodidsa: “Ohua cacahuade corime onahatona. Ajima onanana” nadsa inahatorajari. ³⁰Madijapa Diodsa ssamoqquri naporaha Dio pohuadeni inajidsobaqquija najonapohui najarajari. Dio Pohuana madijacca imasiri inahanajonaporaha jidapapi dsama huapimacca madijadsa Pohua Attia: “Ticcadeni imasiridsa epeje tiquinaji, tibodideni tecajiquimeraridsamanaji” najaripaja Dio. ³¹Diopa madija huapimacca ima

icattemanitohui. Nidsa Dio Pohua jipa tahicca huada bacco tadsapi dsama huapimacca madijadenicca ima pocca pajissehdsa nattome inanitohui. Madija huapimacca ima cattermadepa Dio icattejidsapojari. Najaria aja Pohua Bedi dsoqqueraha Dio Pohuajine nahatonijari. Madija huapima pohuadsa: “Pajissa, najaripa madija Tonassijade tojahijine Dio icattejidsapojari” quinahijine –najari Pablo atti.

³²Naraha Atenacca madija aja jicajarideni nahatonimanahicca ima mittamanadsapa motapa jaja quinajari. Naraha madija motapa: –Huada onihidsa ticca ima imittapomana –quinajari Pablodsa.

³³Nadsapa Pablo madija quequeriqquimana nahidsa apaja nadsapa odsahuaji qqedsippanijari.

³⁴Naraha nahicca quequeriqquimana najari motapa Pablocca imadsa pajissa quinadsa pohuadsa toquejenajari. Madija ojaria onipa: Dionisio. Pohuapa nahato tajari. Ssono Areopacohuaji quequeriqqui najari. Amoneje ojarie naqui oninipi Damarisa. Madija mota naco Jeso tahimaridsa pajissa quinajari.

Pabloa Corintohuaji

18 ¹Dsotodepa Atenadsa Pablo joppemadsapa odsapanani onihi Corintohuaji toccajari. ²Najaro odsapananihuaji Pablo bacco tadsapa jodio madija bacco inabaquijari. Onidenipa Aquira, bedimeni oninipi Prisira quinajari. Aquirapa dsama arobeni Pontohuajicca madijaraha dsama Itariadsa madipojari. Naraha dsama Itariacca tamine Claudio jodiodenedi jipera tadsapa nanicca odsa

panani deni tojanicca onini Romadsa madimana-jarahijine jodiodeni huapima dosse ininebaquijari. Nadsapa Aquira bedimeni tadsajanipa Itariahuaji nebomandsa Corintohuaji bacco toquidsati madimanajari. Nahidsa Aquira bedimeni tadsajani madimanadsana pohuadeni qquide Pablo toccajari.

³Nadsapa Pablo Aquiradenicca tarabaisa nahato tadsapa pohuadenidsa madicajari. Puhuadenipa etero siba tanicca odsajine ssequide dsepedeni ijimanajari. ⁴Nadsapa Pablo jassinajacca huadadsa jodiodenica Dio Atti mamarihuaji jodiodeni, jodio quejena-jarajarideni tedseje quequeriqquimana nadsa Jeso tahimaridsa jehe quinahijine mari mari ihicanabaquui najari.

⁵Nanaja Sila Timoteo tedsejepa dsama Masedoniahuaji huedajonadsa bacco najonamanajari. Nadsapa Pablo dsepe ijiraha nebdsa Dio Attira majidsama mari mari ihicanabaquui najari. Jodiodeni mittamanahijine pocca marinajapi: –Madija Tonassijade aja Cristo-Mesia quiquinanajaripa Jesopaja –najari. ⁶Naraha Jeso tahimaridsa jiperaquui nadsapa Pablo itamassoquimanajari. Nadsapa Pablo pohuadenidsa apaja nahi ahuato tahijine pocca etero ppoto ppoto nadsa huati tajari: –¡Epeje! Nema tiquinadsapi tijinedenina imasiri tiadenidsa tinassonarimanagero. Dio tiadeni tonajidsobaquuidsapo ojne jerani. Jidapapa jodio quejena-jarajarira mari ocana-baquina –najari Pablo.

⁷Nadsapa Pablo Dio Atti mamarihuaji qquenadsa pohua tesse Tisio-Justocca odsadsa toqqedsimajari.

Pohua naco Diodsa huatidse-dsanapojari, Dio Atti mamari inorinidsa madijari. ⁸Jodiodenicca Dio Atti mamarihuajicca tamine onipa Crispo, pocca amoneje, pocca ejedeni huapima naco ia Medsede Jesodsa pajissa quinajari. Nahi Corintocca madija mota huapi taha naco Pablocca marinaja mittamandasa Jesodsa pajissa quinadsapa totopa cajiridsamanajari.

⁹Nadsapa najaro dsomedsa Pablopa pina pocca huadassa naha cajijari. Diojine ia Medsede Jeso pohuadsa ahuatodsapa huati tajari: –Pablo, ticappina-jeraji. Ohuatti teccoraridsaji. Ohuatti tecoma tejeraji –najari. ¹⁰ –Ohuapi tia ohuacahuaridsanitohui. Ajijaro odsa pananidsapa ohuadsa toque-jenajarideni huapi tahi. Nadsapi madija tia inajidsomana-jezanitohui, onajaropaji –najari Jeso. ¹¹Nadsapa Pablo Corintocca madija Dio Atti mittamanahijine mari mari ihicana-baqqi nadsapa huajano ojaria najica, denima huajano arobe madijari.

¹²Naraha tamine Carionapa dsama arobeni onini Acaia ecahuadsa Pablo odsa panani Corintodsa madiccadsapa jodiodeni mota pohuadsa huadimanajari. Dama quinadsa tamine Carionadsa iaccamanajari, ima cacattemahuaji idsahuamanahijine. ¹³Nadsapa tamine Carionadsa huati toquina-jari: –Ajajari madijapa icca madija mari icanabaqquidsapa: “Diodsa tiquejenaji” nanaridsa nadsapa icca madija mota pohua attidsa jehe quinahi. Naraha pocca marinajapi jidsa tani. Pina icca marinajassa nejerani. Pina romanodenicca

marinajassa nejeradsa naqui oppina tani –quinajari Carionadsa. ¹⁴Nadsapa manaco Pablo pocca ima huati tabote naraha tamine Cariona pohuana jodiodenidsa huati tajari: –¡Epejena! Pina botiecca ima huatide, pina toponi nanajidsodecca ima huatide ohuadsa jai tijedsimadsapi ticcadeni ima mittade jipa onanitohuiraha ticcadeni imapi najarossa nejerani. ¹⁵Tiadenina ajarajicca marinajadsa jiperarquiri tiquinajaro. “Icca marinajassa nejerani” tiquinadsapi tiadeni ehuerani ticattemamanaji. Occa cacahuehepi onihi. Ticcadeni ima cattemade jipera onani –najari tamine Cariona jodiodenidsa. ¹⁶Nadsapa ima cacattemahuaji mohua ininebaqqujari.

¹⁷Nadsapa boronidsa jodiodeni motapa poccadeni Dio Atti mamarihuajicca tamine dama quinadsa idaqquimanajari. Pohua onipa Sostene. Ima cacattemacca boronidsa idaqquimanaraha Carionapa qqui taraha najaro imadsa jipera tadsapa pina qqui torahi najari.

**Pablo Atioquiahuaji toccanijari,
dsotode naco benehi onihidsa
tojoppemapomajari**

¹⁸Nadsapa odsa panani Corintodsa Pablo huada huapi tehe madidsanapojari. Dsotode naco odsa panani Atioquiahuaji toccanihijine: –Occanini –nadsa Jesodsa jehe quinajaridenipa: –Jehe ticcaniji –quinadsapa Pablo dsama Siriahuaji toccanijari. Aquira, pohua bedimeni Prisira tadsajani naco pohuadsa tohuedajari. Nadsama jai tojanidsapa odsa panani Secreahuaji bacco toquinajari. Nahidsana

Pablopa pocca huatinaja Diodsa inapajiranissa tanijine pohua tati ccohua tahijine tati ssa cananissa tajaro. Pohua tati ssa canehe cajica dsapi jai tojedsippanidsa jai tojanijari. ¹⁹Nadsapa jai tojanijari, odsa panani Epeso bacco toquinajari. Nahidsa Aquira bedimeni tadsajani madimanahijine inebobaquidsapa Dio Atti mamarihuaji toqquedsimajari, jodiodenidsa Dio Atti maride. ²⁰Nadsapa jodiodeni Pablodsapa: —Iadsa timadiccaji —quinaraha pohuapa jipera tajari. ²¹Pohuadenidsa huati tajari: —Occanini. Naraha nidsaranibote Dio jipa tadsa tiadeni qquide occanipomanitohui —najari. Nadsapa: —Jehe ticcaniji —quinajari. Nadsapa canoa imenidsa toqquedsanidsapa Epesohuaji nebotsa tojoppemapomajari. ²²Nadsapa odsa panani Sesareadsa bacco tanidsapa odsa panani Jerosarehuaji toqqemoranihari, Jesodsapa jehe quinajaridenidsa nija naridsahijine. Nahi dsotodepa Atioquiahuaji toccanijari.

²³Nadsapa Atioquiadsa bacco tanidsa nahidsa madijari. Madihi pohua idi nadsapa tobenehipomajari. Dsama arobeni Carasiahuajicca odsa pananidsa, odsa capamema najarodsapa naco, dsama arobeni Pirijiahuajicca odsa pananidsa, aji odsa cajari cajari najarodsapa naco qquide ccaridsapomajari. Jesodsapa jehe quinajarideni huapima inahatidsebaquidsapa poccadeni jeheniji todacorani najaro.

Apolo Dio Atti maride tojajari

²⁴Nadsapa Aquira bedimeni tadsajani Epesodsapa madimanadsapa jodio madija onipa Apolo Epesodsapa

bacco najonajari. Pohuapa dsama Ejitocca odsa panani Arejadriadsa napijari. Pohuapa ima huatide nahato, Dio Atticca naco nahato tajari. ²⁵Aja Arejadriadsa madi dsapa Jeso tahimari tohuattajari. Nadsapa Apolo huatidseri nadsa Jeso tahimari mari mari naridsajari. Epesocca madija naco mari icanabaquihissa taraha pohuapa Jeso tahimari nemanehe ssamo tajari. Aja Huano mari mari napojaricca nahato, madija poccadeni imasiri nebomanadsa totopa cajimanajari nahato tajari. Najarora nahato tahi ojari najari. ²⁶Nadsapa Apolo cappina-jaradsa jodiodenidsa Dio Atti mamarihuaji Jeso tahimari maride tojajari. Naraha Aquira bedimeni Prisira tadsajani Apolocca marinaja dsori tani mittamanadsapa poccadeni odsahuaji jina inanimanadsa Jeso tahimari denima mari icanamanajari.

²⁷Apolopa dsama arobeni Acaiahuajicca madija mari icanabaquihijine tohuini nadsa Epesocca Jesodsapa jehe quinajarideni pohua toccahijine acco icamamanajari. Aja odsa panani Corintocca Jesodsapa jehe quinajarideni pohuadsa bicaqqiri nahijine naco poccadeni ima dsodo quinadsa dosse quinajaro. Nadsapa Apolo Corintohuaji bacco tadsa Diocca tohuati huanehejine Jesodsapa pajissa quinajarideni acco icamabaquijari, poccadeni jeheniji todacorani nanijine. ²⁸Aja Apolopa madija huapima mittamanadsa jodiodeni mota Jesodsapa jiperaqquri najarideni tedseje ahuaji huati ahuaji huati quinajari. Pohuapa Dio Atti nahato tadsa pocca marinaja dacoradsapa najarideni attideni

ajamani tojadsa pohanu ima ecomera ecomera dsanapojaro. Dio Atti maittaccadsama dsodo napojarocadsa mari mari nadsapa pohanu ajijaro ima ahuato tajaro: –*Cristo-Mesia quiquinanajaripa Jesopaja –najari.

Pablopa Epesohuaji

19¹Nadsapa Apolo nahi Corintodsama madiccadsa Pablo tobenehipomajari. Ssono huapi tani toporimojaja dsanapohui nadsapa tabodihuaji toqquedsippajari, odsa panani Epesodsama bacco tajari. Nahidsapa Jesodsama jehe quinajaridenidsama bacco tajari.²Nadsapa Pablo pohanuadsama huati tajari: –¿Tiadenipi Jesodsama jehe tiquineje Dio Corime tiadenidsama tojaridsama nattaco? –najari. Naraha pohanuadsama cacomeramanajari: –Ssamoquiquiri inani. Dio Corimecca ima iadsama huatide nohuerade –quinajari.³Naraha Pablo pohanuadsama huati tajari: –¿Nejecojari-cca imadsama totopa ticajiridsamanajarotte? –naraha pohanuadsama attipa: –Iapi pina Huano Baotistacca marinajassa inanadsama totopa icajiridsajarode –quinajari.⁴Nadsapa Pablo: –Jehe, aja Huanocca topaniji cajiridsamanajaridenipa poccadeni imasiri nebomanapodsama totopa cajiridsamanajari. Huano huati tapohui naco atti ajama napojari: “Nidsa, dsotode bacco najonajaridsama naco pohanuadsama jehe quinahitohui” napohui nade. Nadsama aja dsotode bacco najonajari onipa Jeso –najari Pablo.

⁵Nadsapa najaro ima mittamandadsama attideni: –Jehe, totopa icajipomana. Ia Medsede Jeso onima ia

topa todsanabaquihijine –quinadsama totopa cajiridsamanapomajari.⁶Nadsapa Pablo Diodsama huati taja nadsama Jesocristodsama toquejenajarideni pohua dsopedsa bara inebo, bara inebo naridsanaja Dio Corime pohanuadsama tojaridsahissa tajari. Nadsapa Dio Corimejeine *tohuatti jidsama tojarodsama huati huati toquinajari. Dio Atti naqui bodidenidsama ahuatodsama *huati iquimamanajaro.⁷Nadsapa pohanuadsama Dio Corime tojaridsajaridenipa 12 quinajari.

⁸Nadsapa Pablo abadsico 3 canaha jodiodenicca Dio Atti mamarihuaji maride toqquedsima toqquedsima dsanapojari. Pablopa cappinera tadsama Diocca cacahuehecca ima mari mari ihicanabaquijnajari. Madija pajissa quinahijine pocca marinajaja bica tadsama mari mari najari.⁹Naraha madija motapa Jeso tahimaridsama huaribodeni sibaquiquiri nadsama madija huapimamittamanahijine jadsirema Jeso tahimaridsama tatamasso quinajari. Nadsapa Pablo, Jesodsama jehe quinajarideni tedseje: –Jina, odsama onihihuajina iqueriqquina –quinajari. Nadsapa jodiodenicca Dio Atti mamarihuaji nebomanadsama madija oni Tiranocca odsama ima huahuatihuajina jai tojajari. Nahidsama huada huajiradsama Pablo Dio Atti mari mari ihicanabaquijnajari.¹⁰Nadsapa maride nama dsanapojari huajano pamaha. Najaria aja dsama Asiacca madija huapima ia Medsede tahimari mittaridsamanajari. Jodiodeni, jodio quejena-jarjarideni naco.¹¹Diojine Pablopa *canahatori canehe deni tojanicca ahuato inanaridsama madija qqui qqui toquinajari.¹²Madijapa

aji etero pohuadeni dsepe ssesse, pohuadeni pano ssesse naqui Pablo huapi tajojaro comaquiri najari-denihuaji dsojo inaniridsamanajaro. Comaquiri najaridenidsa ibarimanadsapi totocanomireridsa najari. Nama quinadsapa Satana-cca dodosse tabaqui tocorimedeni naco jahinineridsajari.

¹³Nadsapa jodio toponi totonanomidedeni naco madija bodidenidsa Satanacca dodosse tabaqui tocorimedeni madimanageri dosse ininebaquimanahijine jajahiridsa najari. Ia Medsede Jeso onidsa nama quinahijine tohuini quinadsapa tocorimedsa attidenia: –Jari, aja Pablo mari mari najaricca Jeso onima huati inadsa tiqqenaji, injaro –nana-ridsamana najari. ¹⁴Nama naridsamanajarideni motapa Esqueba bedi 7 quinajarideni. Esquebapa jodio. Pohuapa dada toqqimade tamine. ¹⁵Nadsapa huada onihidsa Esqueba bedi madija pohua bodidsa tocorime madijaridsa nama quinapomaraaha aja pohua bodicca tocorime huati tajari: –Jehe, Jeso attipa nahato onani, Pablo atti naco nahato onani. Naraha tiadenipi ¿nejecojari madija tiquejenani? –najari. ¹⁶Nadsapa pohua bodidsa tocorime madijaripa toponi totonanomidedenihuaji joppa tadsa jadsirema itabaroridsajari. Aja 7 quinajari huapimadsa deni tojajari. Eterorideni ssoja inaridsehe jica, inabiquerabaqquidsapa ccorojedeni domo toqqenajari. ¹⁷Nadsapa odsa panani Epesocca madija huapima najaro ima mittamandsapa jodiodeni cappinamana, jodio quejena-jarajarideni cappinamana

naraha attidenipa: –Ia Medsede Jesocristona bica tahi, deni tojahi –quinajari.

¹⁸Nadsapa Jesodsa jehe quinarideni naco cappinamandsapa poccadeni imasiri ecomeraridsamananijine jahijonana canajari. Madija huapima mittamanagerihijine madija ojaria pocca imasiri ecomerajaro, madija ohuahadeni naco nama naridsamanajari.

¹⁹Aja dsoppinejedeni naco Jesodsa jehe quinadsapa poccadeni papeo aji dsoppinejicca ima tocatherahijinecca eccajonamandsa madija huapima cattomama canadsa amossinidsa botta quinajaro. Nadsapi najaro papeo manaconipi hua quinadsa pina dsiniro ccarara 50 mil tojajaro. ²⁰Diocca dacorehe nema nadsa aji Jeso tahimari madija huapimadsa ssaja taridsadsapi Jesodsa toquejenahi tohuapijaripaja.

²¹Nadsama najaro ima jicadsapa Pablo bodi huatomadsa huati tajari: –Odsa panani Jerosarehuaji occapomana –najari. –Naraha tahidepi Masedoniahuaji occa, Acaiahuaji occa napona. Nadsana Jerosarehuaji occapomanijine. Dsotode naqui Romahuaji occanijine –najari.

²²Pablo atti nama naraha najaro dsama arobeni Asiadsa madiccejari. Naraha pohua biji accode pamaha Timoteo Erasto tedseje Masedoniahuaji tahide tohuedahijine dosse inabaqqipojari.

Epeshuajaji mohuaniji tojajaro

²³Aja odsa panani Epesocca madijapa Jeso tahimari mittamandsanaporaha motapa jiperaqquri nadsa mohua mohua quinadsapa

pohuadenijine ima toppinajaro. ²⁴Tahidepa madija oni Demetrio huadidsapa pohua tessedenidsa huati tajari. Aja Demetriopa dsibehi tanicca plata dsepe ihiji najari. Nadsama Epesocca madija motapa siba nahatoni onini Artemisadsa: –Ia cacahuade –quiquinanajari. Najaro corimani, ponicca huihuittidsa odsa corimani naqui plata dsibehi taniccadsa Demetrio ihinahato najaro, dadajine. Najaro tarabaidadsa pohua biji accodedeni tedseje dsiniro cacajimana najari. Ssequiri najaripaja. ²⁵Demetriopa siba nahatoni corimani nanahatode-deni queriqquihijine huahua inabaquijari. Queriquimanadsapa pohuadenidsa huati tajari: –Jehe, aji icca nahatonijidsa dsiniro ihicaji naraha nidsa najaro da da inejersapi dsiniro icappiranitohui –najari. ²⁶–Tiadenipi aja Pablo mari mari naridsajaricca imapi ¿samomo tinajarorane? Pablocca marinajapi ajima najaro: “Madijajine siba nahatonipi Dio jarahi” nanaja najari. Najaria aja Pablo attidsa madija ibobora tadsapa ia cacahuade Artemisadsa tojipermanajaripaja. Najaria aja imadini Epesocca madija mota naco Pablodsa toquejenajari, icca dsama Asiacca madija mota naco Pablodsatoquejenaridsajaripaja. ²⁷Pohuadenijine ima nema nadsapi iadsa tabaccora tani. Aji icca dadajine idsepe ihiji najaro naqui jicanitohui. Nidsa ia cacahuade Artemisadsa madija apaja quinahitohui. Nidsa icca dsama Asiahuaji madiridsamanajarideni, aja dsama onihihuaji madiridsamanajarideni naco ponidsa jiperaquiri nadsapa ponicca

ima ajimani tojanitohui. Ponicca huihuittidsa odsa naqui paji inebomanarini nanitohui, onajaro –najari Demetrio.

²⁸Nadsapa Demetrio atti mittamanadsapa huadimanadsa johua johua quinajari: –¡Epesocca madija cacahuade Artemisa deni tojani, tojani! –quinajari. ²⁹Nadsapa odsapananica madija huapima mohua mohua quinahi mittamanadsapa pohuadeni naco huadimanajari. Domodeni ccaridsadsa mohua mohua naridsamanajari. Nadsapa Pablo huatimade Masedoniacca madija pamaha onideni Caio Aristaco tedseje damama quinadsa ima huahuatihuaji iaccabaquimanajari. ³⁰Nadsapa Pablo madija mohua mohua camahihuaji huatide toccahijineraha Jesodsa jehe quinaridenia: –¡Poni, ticca tejeraji! –quinajari. ³¹Asiacca taminedeni mota naco Pablods huatideni huanaquiri nadsapa madija ojaria huassinaja dosse inajonamandsa joppa najonajari, Pablods: –¡Poni! ¡Nanihuajipi ticca tejeraji! –nahijine. ³²Nadsapa huapima queriquimanahidsa ima onihi, ima onihidsa pohuadenira ahujaji johua, ahujaji johua naridsamanajari. Naraha madija queriquimanagerideni motapa ssamoquiri nadsa: –¿Nejeco imatohuira iqueriquijaro? –quinajari.

³³Nadsapa jodiodeni poccadeni madija Arejadro huapimadsa huati tahijine aja mohua mohua camajari baccodenihuaji cco ininemanajari. Pohuapa: –Aji ia jodiodeni iapi ima inana-jerani –nahijine pohua dsepe memehuaji da icanadsa huadsa huadsa naraha tocadidire najarajari.

³⁴Aja Arejadro pohua naco jodio-
denija najari pohua qqui toquinadsa
pohuadsa noccodeni jidseraquiri
nadsapa attideni: –A, najari naco
*jodiodeni, ia cacahuade Artemisa-
dsa huahuatidse najarahi –quina-
dsapa paja mohua toquinarihi
najari. –¡Epesocca madija
cacahuade Artemisapi deni tojani,
tojani! –quinajari. Pahuadeni atti
pina ojariquijarossa nadsa johua
johua quinajari. Nama namara hora
pamaha tossoniquimaraha nama
dsanapomanajari.

³⁵Naraha odsa pananicca madija
deni tojahicca ima dsodsodode cca-
jonadsa madija joma inanabaquid-
sa huati tajari: –Jehe Epesocca
madijadeni, icca imapi dsama
huapimacca madija nahatoquiri
nahi: Iapi ia cacahuade Artemisa-
cca huihuittidsa odsa ecahuanissa
tajaro. Ia cacahuade Artemisapi
memehuaji madiraha poni corimani
iahuaji ssonajarode. Najaro tahi-
marini naqui huapima nahato-
quiri nahi. ³⁶Nadsama ¿najaro
imadsa nejecojari “Maidsaniji”
nahi? Maidsehe huade nohuerahi.
Nadsapi ticadidireji. Ponima mohua
mohuapi epeje tiquinaji –najari.
³⁷–Nadsama ajararideni pamaha
teccajona-baqquimanaraha ia
cacahuade Artemisacca huihuitti-
dsahuaji inatabaccoramana-jerani.
Ponidsa naco tatamasso quiquina-
najarahi. ³⁸Aja siba nahatoni
corimani nanahatodedeni Demetrio
pohua tessedeni tedseje madija
ohuahadsa huadimanadsa naco ima
cacattemahuajira poccadeni ima
huatide jai tojedsimana, onajaro.
Nahidsa ima cacattemadedeni
huajijiradsa jassi jassi dsadsadsa

najari. Nahidsana madija huapima
poccadeni ima huatide jajahi toje-
dsima najari. ³⁹Nadsama tiadeni
mota naqui ima onihi ticajimana-
dsapi ima cacattemadedeni najaro
ima ecahuamana-jeradsapi nidsa
icca odsa pananicca taminedeni
madija huapima queriquimana-
hijine huahua quinadsana ticca-
deni ima huati huati titiquina
naji –najari. ⁴⁰–Nadsama ajjaro
mohuaniji ponimaccapi oppina tani.
Icca tamine romanodeni attidenipa:
“Iadsa jara jara quinajari itidija”
quinapadsaja, onajaro. Ticcadeni
mohuaniji nema dsanapodsapi
¿nejecoma onapadseje pohuadeni-
dsa? –najari odsa pananicca ima
dsodsodode. ⁴¹Pocca ima huati taha
jicadsapa: –Jai tijaniji –nadsa
madija huapima jai tojaniridsajari.

**Pablopa dsama Masedoniadsa
bacco, dsama Cresiadsa
bacco tapomajari**

20 ¹Odsa panani Epesodeni-
cca mohuaniji jicadsa
Pablopa Jesodsa jehe quinajari-
deni queriquimanahijine huahua
inabaquijari. Nadsapa atti bica
tadsa pohuadenidsa huati tajari,
bodideni huatidsemanahijine. Nahi
dsotodepa pohua attia: –Jidapapi
Masedoniahuaji occapomana
–nadsapa: –Jehe, ticcaji –quina-
dsa toccajari. ²Nahi Masedonia-
huajicca Jesodsa jehe quinapo-
jaridenidsa baccho taridsapomadsa
mari icanabaquiquipomajari. Atti
bica tadsa inahatidse-baqquridsa-
jari. Dsotodepa Cresiahuaji baccho
tapomajari. ³Nahidsapa abadsico
3 canaha madicajari. Dsotodepa
dsama Siriahuaji canoa imenidsa

toccanihijineraha Pablo pohua inajidsomanahijine jodiodeni najoramanahi quinahi mittajari. Nadsapa: –Dsamana occaninijine –nadsa pohua natti Masedoniahuaji todsodonijari. ⁴Nadsama Pablodsa jai tojajaridenipa Bereahuaji madijari Piro bedi Sopatero tocca, Tesaronicacca pamaha Aristaco tocca, Secondo tocca, Derbehuajicca Caio tocca, Timoteo tocca, Asiahuajicca Tiquico, Trofimo tedseje tohueda, aji ohua Roca naqui Pablodsa occajarode. ⁵Nadsapa motadenia tahide odsa panani Troadehuaji jai tojapojari. Troadedsa bacco toquina-podsapa itohui madimanajaride. ⁶Naraha iapi jodiodenicca ejete imenibote *Pan ssaja tajarahicca jicadsana aji odsa panani Piripodsa ijoppemajaro. Canoa imenidsa iaccadsapi icca huada 5 nadsana Troadedsa itessedeni bacco inabaquide. Nanidsapi huada 7 nehe imadjarode.

**Pablopa odsa panani
Troadehuaji**

⁷Nadsapi jassinajacca huada jicadsapi najaro dsomedsa aja Jeso dsoqquehi tahimari ibodi huatomanijine, pan dside narihi ijipanijine iqueriqquijarode. Pablo attipa: –Dsemassapi denima jaijanijine –nadsa Jesodsa jehe quinajarideni mari icanabaquidsapa dsome nocconi tojade. ⁸Nadsama iapi odsa capamacossajaro tetepihuajicca coba canahuajaninidsa iqueriqquijarode. Nahidsapa jojororo caji tajari, cajororori naridsajaride. ⁹Nahidsana dsabisso oni Eotico noccobiji terere tanihuaji huittari canajaride. Naraha Pablocca

marinaja dequeradsapi dsabisso huadajari. Odsa tetepihuajicca coba canahuajanini huaji taraha huatiajo nadsapa namihuaji ssonajaride. Idimamanaraha huatiahira idimamanajari. ¹⁰Naraha Pablo joppa taronajari, dsabisso huatiajari huapidsa pori, icahuajocossa, totehema nanaja dsabisso camittemanijaride. Nadsapa Pablo pohuadenidsa huati tade: –Oji oji tiquinejeraji, camittemanihi –nade.

¹¹Nadsapa Pablo ccamaronipomadsa pan dside inaridsa iadsa da inaridsadsapa apa inade. Nadsapa Pablo denima maride tojadsapa icassajade. Nadsapa maride jicadsa toccajari. ¹²Nanaja dsabisso camittemanihipa pocca odsahuaji iaccanimanadsa huatidsemaneri tanimanade.

**Troadedsa
tojoppemamanapomadsa odsa
Miretohuaji bacco toquinajari**

¹³Nadsapa Pabloa: –Ohuapi jahui occana. Tiadenipi canoa imenidsa jai tijaji. Odsa pamema najaro onini Asaodsa otohui timadimanaccana –najari. Nadsapa Pablo jahui toccadsa iapi canoa imenidsa iaccajaro... Asaodsa bacco inade. ¹⁴Nahi Asaodsa Pablo bacco nadsa canoa imenidsa qquedsadsapa iaccapomade. Iaccadsapi odsa pamema najaro onini Mitirenedsa huana icanade. ¹⁵Huada ssajaja ijoppemapomadsapi dsama huittidsacossani Quiodsa huana icanade. Nanidsa ijoppemapomadsapi odsa panani Epesodsapi issoniqquimade. Dsama huittidsacossani Samosodsana huana icanade. Nanidsa ijoppemapomadsapi odsa panani huajira tanicca

odsa pamema najaro onini Mireto-
 dsa huana icanapomade. ¹⁶ Pablopa
 aji jodiodenicca ejete *Pentecostes
 bacco tabote nadsa najaro qquide
 tohuini nadsa: –Dsama Asia-
 huaji inajo-jeraccana, huassinaja
 odsa panani Jerosarehuaji jaijana
 –nade. Najarojine Epesodsapi
 huana icana-jerajarode.

**Epesocca Jesodsa
 jehe quinajarideni
 cacahuadedenidsa
 Pablo huati tajari**

¹⁷ Nadsama Miretodsa imadidsapi
 Pablo Epesohuajicca Jesodsa jehe
 quinajarideni cacahuadedenitohui
 madija dosse inade: –Ohua qquide
 jahijonana –nadsa. ¹⁸ Bacco najona-
 manadsapa Pablo pohuadenidsa
 huati tade: –Maittaccadsama ticca-
 deni dsama Asiahuaji bacco onapo-
 dsapi ohua qqui tiquinade. Tiadeni-
 dsa omadidsa naqui omainissa
 tani nahatoto tinani. ¹⁹ Ia Medsede
 Jesocristocca medse ojadisapi pohua
 tahimaridsa odsepe ijiridsade.
 Obodipi deni ojani ohonana-jerade.
 Ocasserehejine oji oji onaraha
 nema nehe odsepe ihiji nade. Ajina
 odsoqquenijine jodiodeni occa
 madijaraha ohua dama quinabote
 nadsa naqui ocasserani ohua-
 ridsade. ²⁰ Naraha ohuapi ocappina-
 jeradsa nema nehe timadimana-
 nissa tanijinecca tiadeni maride
 dissera onajaro. Madija quequeri-
 qqumana nahihuaji huapima
 mittamanahijine naqui mari mari
 ohocanabaquui nade. Odsa cajari
 cajaridsa naqui tiadeni mari mari
 ohocanabaquuiridsa nade. ²¹ Aji
 jodiodeni, jodio quejena-jarajari-
 denidsa naqui Jesocristo tahimari

mari mari onaridsadsapi ohuatti
 ajima ohonanajarode: “Ticcadeni
 imasiripi tinebomanadsa Diodsara
 iboraquiri tiquinaji. Ia Medsede
 Jesocristodsa pajissa tiquinaji”
 ohonanajarode.

²² –Naraha jidapapi Jerosarehuaji
 occana. Dio Corime ohuadsa huati
 tapode: “Odsa panani Jerosarehuaji
 ticcana” nadsapa Pohua Attidsa
 ibora onajaro. Naraha ohuadsa
 ima tojanitohui. ¿Nejeco imara
 inanamananijine? Ssamo onaccani.
²³ Naraha ima ojariepi nahato
 onani. Jerosarehuajipi ocasserehe
 imeni onahananitohui. Dio Corime
 ohuadsa huati tajari: “Cadenadsa
 tia jore quinadsa tia coro idsima-
 mananijine titohui najoramanahi”
 napode. Odsa huapima occaridsa-
 dsa naqui najaro ima Dio Corime
 ohuadsa huati huati tataja napode.
²⁴ Naraha ohuapi najaro imadsa
 ocappina-jerani. Ohua inana-
 dsoqqe-manadsa naqui epeje,
 bica tani. Ohua Medsede Jesocristo
 ohua cadossejaricca imadsa ohuati-
 dsedsapi ojine pajiranissa tanijine,
 onajaro. Aja ohua cadossejaripa Dio
 madijadsa huati cahanari canahicca
 ima bicani mari mari ohonanajaro-
 pajide.

²⁵ –Nadsama ima onihi obodidsa
 nahato onajaro naqui. Aji tiadeni
 occa mamari tabaqqui Diocca
 cacahuehe tahimarini tiadeni mari
 mari ohocanabaquui najaropi ohua
 qqui timanimanapoma-jeranitohui.
²⁶⁻²⁷ Najarojine aji jidapana tiadeni-
 dsa huati onajaropaji. Aji Dio Pohua-
 jine madijadsa inananijinicca ima
 nemanehe mari mari onajaro motapi
 ohuacoma nejerajaro. Naraha madija
 motadeni ohuatti mittamanaraha

pajissa quina-jaradsapa pohuadeni-jine Diocca huadie pohuadenidsa ssonarinitohui. Pohuadeni emene toccajaropi ojine jerani, onajaro.

²⁸ –Nadsama ohuattipi tiadenidsa ajima onajaro: Diodsa timadimananissa tanijinepi tiadeni tecahuamanaji. Jesodsa jehe quinajarideni, aja tiadenidsa quequeriqqui najarideni naco tecahuabaqqui-manahissatajo. Dio Corimejine pohuadeni cacahuade tiquejenajaro. Diocca madija pohuadeni manaconepa Dio Pohua Bedi dsoqquedsa pohua emene toccajaro. Najarojine pohuadeni tecahuabaqqui-manahissatajo, onajaro. ²⁹Nidsa ohua nohue ojiradsapi madija ohuahadeni tiadenidsa bacco quinadsapa poccadeni marinaja maidsehecca mari icanabaqqui-ridsahitohui. Pohuadeni pina dsohuadsohua huadibote bani bedi itaccaridsadsa jicajarissa quinahitohui. Tiadenidsa ssonarimanadsa Jesodsa jehe tidsanapomana-jerani-jine disseraquiri nahitohui. ³⁰Aji tiadeni titiqueriquimana najaro motadeni naco maidsehedsa toquejenahitohui. Poccadeni maidsehera mari mari quinadsapa aja Jesodsa jehe quinajari pohuadenidsa toquejenahijine tohuini quinajari.

³¹ –Nema nadsapi tiadeni huapimadsa ohuattipi: ¡Paji! Poccadeni maidsehedsa pajissa tiquina tejeraji. Tibodideni huatomamanaji. Ohuapi tiadenidsa omadidsapi tiadeni ohuacahuabaqquini-sa tade. Huajano 3 naha tiadeni maride ojadsapu dsoemema mamari, ssajama mamari onade. Timadimananissa tanijine onadsa occa ojiema tiadenidsa huati huati onajarode.

³² –Ohuemecotedeni, jidapapi Diodsa timadimanana, tiadeni onebobaquini. Dio tiadeni tohuacahua-baqquihissa tahijine Pohuadsa huati huati ohonanajaro. Diopa madijadsa huati cahanari canahi tahimari tiadenidsa huati onajarode. Pocca tohuati huanehe tahimarinijine ticcadeni jeheniji todacorani nanitohui. Dio Pohua huati tapojaricca ima bicani tiadenidsa da inanitohui. Najaropi aja pocca madija toquejenahijine icatteljidsa-baqquijari huapimadsa da inaridsanitohui. Pina pohua huati tapojarissa najari –najari Pablo.

³³ Nadsapa denima huati tajari: –Ohuapi ticcadeni dsiniro tohui, ticcadeni etero tohui onejerade. ³⁴ Tiadenipi occa madie nahatoto tinade. Ohuapi ohua odsepedsa tarabadsa onadsapi dsiniro ohocaji najaro. Najaro dsinirodsa otapari mitta, ohua accodedenidsa mitta ohonaridsa najarode. ³⁵ Nema onadsapi occa madie ahuato onandsa qqui tiquinajaro. Odsepe ijidsa ohocaji najaro. Nadsapi ocajidsa madija cappiramanajaridenidsa naqui da da odsanapojine opajirani. Tiadeni naqui nema tiquinani bica tani. Nadsapi pina ia Medsede Jesocristo attissa tinamananijine: “Madija iadsa manaconi jirehe da quinadsapa etidse tani. Naraha ia naqui madija ohuahadsa manaconi jirehe da inadsana denima etidsejaro” –najari Pablo.

³⁶ Pablo pocca ima huati taha jicadsapa aja Epesohuajicca Jesodsa jehe quinajarideni cacahuadenima Diodsa huati toquina-hijine pohuadeni pitodsa jassi tajari. ³⁷ Nadsapa huapima Pablo

oji icanaquimanadsa icahuajo-cossamana, pano mose quinajari.
³⁸Nadsapa Pablo attia: –Ohua qqui timanimana-jeranitohui –napodsa pohuatohui bodideni huatomamanadsa bodideni huanacossajari. Nadsapa Pablo canoa imenidsa toccahijine qquide jahidsippade.

Pablocca benehi odsa panani Jerosarehuaji

21 ¹Nadsapa imecotedeni inebo-baqqidsa canoa imenidsa jajedsadsa paji iaccarijaropi dsama bedeni huittidsacossani Cosodsa huana icanade. Huada ssiaja jaijapomadsapi dsama bedeni huittidsacossani Rodadsa huana icanapomade. Nanidsa ijoppemapomadsapi odsa panani Pataradsa huana icanade. ²Nanidsa canoa imeni onihi dsama arobeni Penisiahuaji tohuaccanijine canajorani qqui icanade. Nadsapi najarodsana jajedsadsapi jippehuaji iaqqeujidsade. ³Nadsapi passo imeni nocconi iquejensadsa dsama onihi huittidsacossani qqui inade, oninipi Sipre. Naraha najaro dsamadsapi issoniqquimade. Denima iaccajaropi dsama Siriadsa bacco inade. Nanicca odsa panani Tirodsana huana icanadsapi canoa imenicca todsepetaji inebomananijine najomanadsa jajemoraccade. ⁴Nani Tirodsa Jesodsa jehe quinarideni bacco inabaqquijaride. Nadsapa: –Iadsa timadimanaccaji –quinadsapa pohuadenidsa huada 7 nehe imadide. Nadsapa Dio Corimejine Jesodsa jehe quinaridenidsa Pablo tedsejemacca ima ahuato inanadsa Pablodsa huati toquinajari: –Jerosarehuaji tiqqejerana. Ticcadsapi ocasserani tenitohui

–quinade. ⁵Naraha nanidsa icca huada 7 nadsapi Jerosarehuaji jajianijine ijoppemapomade. Canoa imenihuaji jajedsippanidsapi pohuadeni naco maqquideje, amoneje, ejedeni huapima ia qquide jahidsippade. Nadsapi nani ssiquidsa ipitodsa jassi inadsa Diodsa huatide iquejenade. ⁶Diodsa huatide jicadsa: –Jaijani –inadsapi: –Jehe, jai tijaji –quinade. Canoa imenidsa jajedsanidsapi pohuadenipa poccadani odsahuaji jai tojemorani.

⁷Nadsapi odsa panani Tirodsa iaccajaropi odsa capamema najaro onini Toremaidadsa huana icanade. Nanidsa jajemoradsa naqui Jesodsa jehe quinarideni qqui inabaqquide. Nanidsa naqui pohuadenidsa huada ojarie imadide. ⁸Huada ssiaja iaccapomadsapi odsa panani Sesareadsa bacco inade. Nanidsapi Feripecca odsahuaji jajjade. Pahuapa totapari dadade 7 quinajari ojaria. Pohua naco madija Jesodsa jehe quinahijine mari mari naridsajari. Iapi pocca odsadsa imadijarode. ⁹Feripecca ejedenipi tabira 4 quinaro. Ponidenipi Dio Atti huahuati toqquimadedeni. ¹⁰Nanidsa icca huada tohuapinidsa dsama Jodeacca madija Dio Atti huahuati toqquimade Acabo bacco najonajaride. ¹¹Nadsapa iadsa bacco najonadsa Pablocca ssitora dicca inadsa Acabo pohua biji pohuajine jore, pohua isso jore nadsa Pablo tedsejemacca ima iadsa huati huati tajaride: –Dio Corimejine huati tajari ajama nahi: “Nidsa Jerosarehuaji bacco tiquinadsapi ajijaro ssitora jinedepa jodidenedi dama quinadsa biji jore, isso jore quinadsa jodio quejena-jarajaridenidsa da quinadsapa todsepe tojahitohui”

najari. Aji, ohua jore onajaropi
ssitora jinede nama inanamana-
hitohui –nade Acabo atti.

¹²Nadsapi najaro ima ia, Sesarea-
cca Jesodsa jehe quinajaridenima
imittadsapi oji inabote nadsa Pablo-
dsa huati huati inade: –¿Jerosare-
huaji tiqqejeraji! –inade. ¹³Naraha
Pablo attipa iadsa ajama nade:
–¿Nejecotohui oji oji tiquinajaro?
Nema tiquinadsapi tijinedeni ohua
naqui titohuideni obodi oji onani.
Naraha ohuapi nema nehe Jerosare-
huaji occanitohui. Ia Medsede Jeso-
cca ojadspapi epeje, nema nehe ohua
jore quinadsa naqui ohuadi-gerani-
tohui. Ohua inanadsoqqe-maneje
ohua inanadsoqqe-manejereje
nanitide. Nema nehe onajorani. Jeso
oni deni tojanijinepi ohua nema
inanamanana, onajaro –nade Pablo.

¹⁴Nadsapa Pablo ettidsa jehe
najaradsapa denima huati inejerade.
Nadsama ettipi: –Abi Dio, Pahuana
nahato tahi. Ia Medsede Pohua jipa
tahiccana bica tani –inade.

¹⁵Dsotode huada onihidsapi
idsepetaji inajorehe jicadsa Jerosare-
huaji jajjade. ¹⁶Imecotedeni Sesarea-
cca mota naco iadsa jai tojajaride.
Jerosarehuaji bacco inadsapi
pohuadenina Masonacca odsahuaji
ia tonequebaqqi-manajaride. Aja
Masonapa dsama huittidsacossani
Siprehuajicca madija. Tahidedsama
Jesodsa jehe napojari. Najaricca
odsadsa imadijarode.

**Pablopa Jerosarecca
Jesodsa jehe quinajarideni
cacahuadedenidsa
qquide toccajari**

¹⁷Odsa panani Jerosaredsa
bacco inadsapi imecotedeni nahi

Jerosarecca huatidsemanadsapa
iadsa: –¿Nija, bacco tajonamana-
jaroqui? –quinade. ¹⁸Huada
ssiajapi Pablo inadsa Jerosare-
cca Jesodsa jehe quinajaridenicca
tamine Satiacodsa qquide jajjade.
Nahidsa Jesodsa jehe quinajarideni
cacahuadedeni huapima queri-
qquimanajaride. ¹⁹Nanidsa bacco
inadsapi Pablo pohuadenidsa nija
nadsapa pocca benehicca ima
nemaneha pohuadenidsa huati huati
tade: –Diocca dacorehe ohuadsa
tojadsapi jodio quejena-jarajari-
deni naco Jesodsa jehe naridsamana-
jari –nade Pablo. ²⁰Nanaja Pablo-
cca ima mittamanadsapa Diodsa
huatidsemanadsa: –¿Diocca imana
bica tani, bica tani! –quinade.

Nadsapa Satiacodeni Pablodsa
huati toquinade: –Jehe imecote,
tiapi nahato tinani: Ajadsa naco
jodiodeni Jesodsa toquejena-
jari jica-jarahi. Naraha pohua-
denipa Moisesicca marinajadsa
disseraqquri nahi paja naccahi.
²¹Titahimari mittamanajari, aja
icca madija jodiodeni dsama huaji
tanihuaji jodio quejena-jarajari-
denicca dsamadsa madiridsamana-
jarideni mari ticanabaqquridsa-
jari. Naraha titahimari pohuama
huati huati quinajaridenipa ajama
quinajari: “Pablo mari mari nana-
ridsa najaripa Moisesicca marinaja
ecahuamana-geranijine, ejedeni
maqquideje huissinaja cajimana-
jarahijine, jodiodenicca madie
inebomananijine naqui mari
mari nanaridsa najari” quina-
jari. ²²Nadsapi ¿nejecoma ina-
nijine? inajaro. Pohuadenipa bacco
tajanani mittamanadsapa tiadsa
ima inanamanarana –quinade

Satiaco, Jesodsa jehe quinajarideni cacahuadedeni tedseje. ²³ –Nema nadsapi pina ettissa tinanani bica tani. Aja iadsapa maqquideje 4 quinaha poccadeni huatinaja Diodsa huati toquinapojari inapajiramananissa tanijine najoramanahi. ²⁴ Tia naqui pahuadenidsa tiquejemana. Diodsa dada toqqumahuaji pahuadeni tiaquedsimabaquina. Tia naqui pahuadenidsama pina aji jodiodenicca marinajassa tinanaji. Nadsama poccadeni huatinaja inapajiramananissa tadsa poccadeni danijijine edede bedi manaco tiana da tinaji, inajaro. Najaro jicadsapi dada toqqumadena tatideni ssa inaridsahitohui, tatideni ccohuaququiri nahijine, aji poccadeni ima madija huapimadsa ahuato tanijine. Jehe Pablo, pahuadenidsa tiquejemadsapi jodiodeni mota tia qqui toquina dsapa ajama quinahitohui: “Jaho, ima imittapojaropi maidsaniji ttaraneje. Pablopa Moisesicca marinajapi ecahuani, nebo-jarahi” quina-hijine –quinade Satiaco, Jesodsa jehe quinajarideni cacahuadedeni tedseje.

²⁵ –Naraha etti onihipi aja jodio quejena-jarajari Jesodsa jehe quinajaridenidsa icca ima teppedsa dsodo inapodsapi ajima inapode: “Aji icca imara ticahatteraji. Aja madija icca Diodsa toquejenajarajideni poccadeni siba nahatonidsa bani da da quiquinanajaripa mitta tiquina tajarajo, tijipamananijine *oppina tahi. Bani ssipori niqni nadsa dsoqquedsa emene toccajarajari naco tijipamana tejeraji. Bani emene naco tijipamananijine oppina tani. Huananehe naqui tinebomanaji. Pina maqquideje amoneje

cajiraha amoneje onihipi aja ajapi poni. Amoneje maqquideje cajiraha maqquideje ohuaha naja najapi poni. Tabiradeni naco pahuama aja aja canaridsera-jarana” inade dsodo inadsa –quinajari Satiaco, Jesodsa jehe quinajarideni cacahuadedeni tedseje.

Pablo todsepe tojjari

²⁶ Nadsapa pahuadeni attissa inananijine Pablopa maqquideje 4 quinaha Diodsa dada toqqumahuaji iaccabaquijari. Huada ssiajapa Diodsa dada toqquma huapihuaji pina jodiodenicca marinajassa inamanajaro. Naraha Pablopa dsotode pohua motta Diodsa dada toqquma bodihuaji toqquedsimajari, poccadeni ima huati tahijine. Nadsapa dada toqqumadedsa pohua attia: –Nidsa huada 7 nehe jicadsapi jajedsimapanitohui. Nadsana icca da naqquinaja da onadsapi icca ima Diodsa huati inapojarocca jicahijine –najari.

²⁷ Nadsapa huada 7 nehe bacco tabote nadsa Pablopa pohua motta Diodsa dada toqqumahuaji toqquedsimapomajari. Naraha dsama Asiahuajicca jodiodeni nahi bodihuaji jai tojedsimadsa Pablo qqui toquinadsapa pahuadsa huadimanajari. Pahuadenipa Pablods noccodeni jidsera najari. Poccadeni dsamahuaji maride ccaridsadsa tahide pahuadsa huadimanapojari. Nadsapa najarideni huadimanapomadsapa Pablods ima inamanajaro. Johua johua quinadsa Pablo dama quinajari. Madija huapima pahuadsa huadimanhijine attidenipa ajama quinajari: ²⁸ –¡Jari, icca madija Isaraerideni,

ibiji acco ticamamanaji! –quina-jari. –Ajajari madijapa dsama onihihuaji ccaridsadsa madija huapimadsa mari mari naridsa-raha pocca marinajapi tabaccora tani. Ia Isaraeridenidsa madija tojiperamanahijine mari mari najari. Moisesicca marinaja nebo-manahijine mari mari najari. Diodsa dada toquima naqui madija ettajomananijine mari mari najari. Jidapana pohuaha icca Diodsa dada toquimahuaji jodio quejenajara-jarideni eqquedsimabaquijapa. ¡Najaropi oppina taraha! ¡Pohua-denijinea Diocca odsa toppinani, toppinani! –quinajari.

²⁹Aja nama quinajaripa tahide amossinihuaji Pablo pohua tesse Trofimo tedseje huehuedaridsa nadsa qqui toquinapojari. Trofimopa odsa panani Epesohuajicca madija. Pohuapa jodio jara-dsapa pohuadsa noccodeni jidsera-qquiri najari. Pablopa Diodsa dada toquimahuaji Trofimo eqquedsimajararaha pohuama attideni: –Jodio quejena-jarajarideni eqquedsimabaquijari –quinajari.

³⁰Nadsapa johua johua quinahi mittamanadsapa madija huapima domo ccajonajari. Pablo dama quinadsapa Diodsa dada toquima amossinihuaji joca ininemanadsa toqquedsimani-jarahijine noccobiji huassinaja icahacossamanajaro. ³¹Nadsapa Pablo inanadsoqqe-manahitohuiraha ramanodenicca soldadodenicca tamine deni tojahiccadsa ima bacco tajaro: –¡Jero-sarecca madija mohua mohua quinapaja! –quinajari. ³²Nadsapa soldadodenicca taminepa pocca soldado dossededeni, poccadeni

dodosse tabaqquma huahua inabaquidsapa mohua mohua quina-hihuaji domo toccajari. Bacco toquinadsapa huadimanajarideni Pablo idaqquimanaraha soldadodenicca tamine, pocca soldadodenima jahijonahi qqui toquinadsa inebomanajari. ³³Nadsapa soldadodeni bacco najonamanadsapa poccadeni tamine attidsa Pablo dama quinadsa cadena pama-dsa jore quinajari. Nadsapa Pablo najidsodedenidsa soldadodenicca tamine huati tajari: –¿Ajajaripa nejeco madijanaja? ¿Nejeco imara inanajaroneje? –najari. ³⁴Naraha aja johua johua quinajarideni ima onihidsa, ima onihidsa ahuaji johua ahuaji johua naridsamanadsapa soldadodenicca tamine ima mittahissa tajarajari. Nadsapa taminea: –¡Jari, icca odsahuaji tiaccanimanajo! –najari. ³⁵Naraha poccadeni totoccamaro bacco tanimanabote naraha madija Pablo inajidsomanahijine disseraquiri nadsapa pohua-denijine oppina tajaro. Nadsapa soldadodeni Pablo idimamana, meme da quinadsa iaccanimanajari. ³⁶Naraha nattidenihuaji jahijonajaria: –¡Dsoqquena! ¡Dsoqquena! –quinajari.

Pablo jodiodenidsa huati tajari

³⁷Nadsapa noccobiji memehuajiccadsa bacco tamaronimanadsapa Pabloa soldadodenicca tamine-dsa huati tajari: –¡Nidsa padseje! tiadsa huati onaccana ¿jehe taqui? –najari. Naraha Pablo *Cresiacca madija attidsa huati tadsa tamine mittadsapa pohuadsa huati tajari: –A ¿dsama Cresiacca madija atti nahato tinaqui? –najari. –Jehe,

nahato onani –najari Pablo.

³⁸Nadsapa tamine attia: –Naraha jodiodeni tiadsa huadimana nadsa ohua: ¿Tiapi dsama Ejitocca madija tijajaroqui? onapa. Aja huajano tahideccadsa toponi huahuajina dsodsojodedeni 4 mil quinaha madija madide nohuerahihuaji queriquimanajari, romanodenidsa jadsire inanamananijine. ¿Najari-deni tamineridenibote tijajaroqui? onaraha –najari romanodenicca soldadodenicca tamine deni tojahicca.

³⁹Naraha Pablo attipa: –Ohuapi najari ojajerani. Ohuapi jodio madija, dsama Ciliciahuaji ossonajarode. Occa odsa pananipi Tarso. Najaropi odsa panani imeni. Madija huapima nahatoqquri nahi. ¿Ohuattidsa jehe taqui? Occa madijadsa huati onaccana, onajaro –najari.

⁴⁰Nadsapa tamine jehe nadsa Pablopa noccobijidsa huaridsa pohua dsepe memehuaji da icanajaro, tocadidirehijine. Tocadidire nadsapa jodiodenidsa huati tajari. Pohuadeni atti *ebreodsa huati huati tajari.

22 ¹Nadsapa Pablo huati tajari: –Jehe ohuemecotedeni, ime jochuideni, tiadenidsa occa ima huati onana, titaharibobo canaji. Ohuadsa: “Tabaccora tinani” tiquinaraha ohuapi ima ocappirani, nohuerani –najari. ²Nadsapa Pablo pohua attidsa huati huati tadsapa jodiodeni pohuadeni atti ebreo mittamanadsapa denima tocadidire najari. Nadsapa Pablo attia: ³ –Ohuapi jodio madija ojani, dsama Ciliciacca odsa panani Tarsodsa ossonajaro –najari.

–Naraha aji odsa panani Jerosare-dsana onapijarode. Nadsama ohua maridepa Camarieopaja. Madija huapima pohua oni nahatoqquri nahi. Pohuapa icca ididenicca marinaja maride bica tajari. Icca ididenicca marinaja ohua mari canahissa tade. Ohuapi najaro imadsa ibora onade. Nadsama Diotohui naqui dissera onade. Pina jidapana tiadeni Diodsa disseraqquri tiquinajarossa onajarode. ⁴Nadsama ohuapi aja Jesodsa jehe quinajari-deni onajidsobaqquihijine tohuideni occaridsadsa otadamadsapa ohuattidsa toponi cocorohuaji coro coro ihidsimabaqquimana nade. Maqquideje, amonejedenima jicahijine ohonanaccade. ⁵Aji occa imapi dada toqquimadedenicca tamine deni tojajari, ime jochuideni tedseje nahatoqquri nahi. Pohuadenidsa: “¿Pajissaqi?” tiquinadsapi: “Jehe, pajissa, nama naridsaccade” quinahitohui. Pohuadenidsa naqui huati onadsapi pohuadeni atti ima teppe-dsa dsodo nani ohuadsa da quina-dsapi odsa panani Damascohuaji poccadeni ima ohuaccajarode. Nahi Damascocca jodiodenicca taminedenidsa nohue onaridsanijine dsojo onajarode. Najaro imadsa Damasco-cca Jesodsa jehe quinajarideni qqiu onabaqquidsa otadamadsa aji Jerosarehuaji ohuaccani-baqquidsapa inajidso-baqquimanahijine onadsa occajarode.

**Pablo Jesodsa tojajaricca
ima huati tajari**

⁶ –Nadsapi Damasco jahui occajaro... maji itetepidsa Damasco bacco onabote naraha memehuajicca ssiajani dacorehe amadsati

ohuadsa bacco naronadsapi ohuinori nemanehdsas siaja-huajani nade. ⁷Nadsapi ohuedima, namidsa opona nadsa ohuadsa huahua nahi omittade: “Saoro, Saoro ¿nejecotohui occa madija nanajidso taridsajaro? Aja occa madija nanajidso taridsajaropi pina ohua nanajidso taridsajarossa najaro” nade ohuadsa. ⁸Naraha manaco pohuadsa huati onade: “¿Tiapi nejecojari?” onade. Nadsapa: “Ohuapi Nasarethiajicca Jeso ojani, tiapi ohua tinajidsojaro” nade ohuadsa. ⁹Nadsama aja ohuadsa jai tojajarideni naco ssiajani qqui toquinadsa huajo canireraha Jeso ohuadsa huati tahi mohuini mittamanaraha pocca ima mittamanajarade. ¹⁰Nadsapi pohuadsa huati onade: “Ohua Medsede ¿nejecoma onapadseje?” onade. Naraha ohuadsa huati tade: “Titehemadsa odsa panani Damascohuaji ticcaji. Nanidsana occa ima, aji ohuadsa tidsepe ijinijinecca ima timittanijine” nade ohuadsa. ¹¹Nadsama ohuapi ssiajani dsibehibotejine onocco siri tojadsapi ohuatimadedeni odsepedsa ohua joca quinasana Damascohuaji bacco onade.

¹² –Naraha nahi Damascodsapa madija oni Anania madijari. Pahuapa Moisesicca mari najadsa ibora tajari. Damascocca jodiodeni pohuadsa: “Madija bicahi” quiquinanajari. ¹³Nadsapa Anania ohua qquide ccajonajari, bacco nadsa ohuadsa huati tade: “Ohuemecote Saoro, tinoccopi ssire tana” nanaja onocco ssire-re, Anania paja qqui onarihi nade. ¹⁴Nadsapa Anania denima ohuadsa huati tade: “Abi Diopa icca

ididenicca Dio, najaria aji Dio pocca dossenijissa tinananijine tia tocattejidsajari. Pocca Ejedeni Bicabote qqui tinahijine naqui tia tocattejidsajari. Pohua atti huati tahi naqui timittanijine Dio tia tocattejidsajari” nade ohuadsa. ¹⁵“Nadsama Dio Puhajine qqui tinajaro, timittajaro naqui madija huapimadsa tecomeraridsanijine. ¹⁶Jari, jidapapi totopa ticajiji. Denima tinajo-gerana. Ia Medsede pohuadsa huati tinaji, tia tonassiajahijine, ticca imasiri epeje inananijine” nade Anania atti ohuadsa –najari Pablo.

Pablo Jeso pohua dosse inajaricca ima huati tajari

¹⁷Nadsapa Pablo denima huati huati tajari: –Nadsapi odsa panani Jerosarehuaji bacco onanidsa Diodsa dada toquimahuaji oquedsimadsa Diodsa huatide ojadssapi Djine ohuadsa pina occa huadassa naraha pajissa qqui onade. ¹⁸Ohua Medsede Jeso ohuadsa ahuatodsapa ohuadsa huati tade: “Aji Jerosarehuajipi tinebodsas huassinaja ticcaji. Aja Jerosarecca madijapa otahimari mari ticanabaqqui tajarajo. Occa imadsa huaribodeni sibaqquri nahi” nade. ¹⁹Naraha ohuapi Jerosaredsa pohua tahimari mari ocanabaqquhijine tohuini onadsa pohuadsa huati onade: “Ohua Medsede, ajajari madijadenipa occa madiicca ima nahatoqquri nahi. Aja jodiodenicca Dio Atti mamari onihi onihihuaji ohoccaridsa nadsapi tiadsa jehe quinajarideni ohotadama naccade. Ohonajidsobaqqui nadsapa aja toponi cocorodsas coros coros ohodsima-baqqui nahi naco nahatoqquri nahi. ²⁰Aja ticca medse, tetti huahuati

naridsade Esteba iquinaquimanadsa emene toccadsa naco nani dsaboradsa cattade ohua nade. ‘Dsoqquena, dsoqquena’ quinadsapa jehe onade. Aja Esteba quinade ppahuaquiqui nahijine naco eteroridendi motarannicca ssiti quinadsa eteroridendi ohuacahuade occa ima naco nahatoqqiqui nahi” onade ohua Medsededsa. ²¹Naraha manaco ohua Medsede ohuadsa huati tade: “Epeje, ticcaji. Jidapapi dsama huaji tanicca madija jodio quejena-jarajaridendi mari ticanabaquihijine tia dosse onajaro” nade ohuadsa –najari Pablo.

Pablo cossi quinahijineraha:

–Romano madija ojani –najari

²²Nadsapa jodiodeni mohuara-dsa taharibobo canaraha Pablo: –Jodio quejena-jarajaridendi maride occanijine –nahi mittamanadsapa denima mittade jiperaquiqui nadsa paja mohua toquinarihi najari. –Jari ¡dsoqquena, dsoqquena! ¡Atti nama nahipa madi-jarana! –quinade. ²³Huadimanadsa johuahua johuahua cananaja poccadendi etero motarannicca ssiti quinadsa ppoto ppoto quina-dsapa Pablohuaji ssiqui naqui quina quina quinajari. ²⁴Nanaja romanodenicca soldadodenicca tamine deni tojahicca pocca soldadodenidsa huati tajari: –¡Ajaripa odsa bodihuaji joca tidsimamanajo! –najari. Nadsapa odsa bodidsa Pablo cossi inaquimanahijine icadossebaquiqui-jari: –Jari, cossi taquimanajo. ¿Nejecotohui jodiodeni pohuadsa johuahua johuahua canajari? Cossi taquimanadsana iadsa pocca ima ecomeranjine –najari. ²⁵Nadsapa Pablo cossi quina-hijine biji jore, isso jore quinaraha

Pablo soldadodeni dossedsa huati tajari: –Tiapi ohuadsa nahato tinejerajaro nitide. Ohuapi romano madija ojaha. Ima cacattemadehuaji ohua tiacamana-jeraraha ohua cossi tadsapi ¿oppinera taqui? Oppina taraha –najari. ²⁶Nadsapa aja Pablo atti mittadsapa soldadodeni dossede pocca tamednsa huati tahijine joppa tanidsa huati tanijari: –Tetti ¿nejecoma tani? Ajaccajari madijapa: “Romano madija ojani” napa –najari pocca tamednsa. ²⁷Nadsapa romanodenicca soldadodenicca tamine deni tojahicca Pablodsahuatide toccajari: –¿Pajissaqui? ¿Tiapi romano madija tijaqui? –najari. Nadsapa: –Jehe, ohuapi pajissa romano madija ojani –najari Pablo. ²⁸Nadsapa soldadodenicca tamine atti: –Ohuapi romanodeni ojanijine manaconsiniro huemani da onadsana romanodeni ojarode –najari. Naraha Pablo attipa: –Ohuapi romano madija ojadssapi dsiniro da onejerade. Ossonaponidsama romano ojani –najari Pablo. ²⁹Nadsapa soldadodeni Pablo cossi quinabote najaridenipa Pablo atti mittamanadsapa tohuajibaquiqui nade. Poccadendi tamine naco cappinajari. Pohua attidsa romano madija cadenadsa jore quinajari, cossi inaquimanadsapa pohuadsana ima ssonarinitohuiraha. Pohuadsa oppina tadsa apaja najari.

**Pablopa jodiodenicca
ima cacattemedenednsa
toqquedsimajari**

³⁰Huada ssiajapa romanodeni-cca soldadodenicca tamine atti:

–¿Nejecotohui jodiodenipa Pablo-dsa huadiquiri najari? –nadsapa Pablocca cadena dicca inadsa pohuadsa huati tajari: –Nidsa, huahua onabaquidsa queriqui-manadsana ticca ima icattemananijine –najari. Nadsapa dada toquimade taminedeni, jodiodenicca *ima cacattemededeni deni toquejenarideni tedseje queriquimanadsa romanodenicca soldadodenicca tamine Pablo iaquedsimsadsapa taminedeni baccodenihuaji huajari.

23 ¹Nadsapa Pablo jodiodenicca ima cacattemededenihuaji tocatta nadsa huati tajari: –Ohuemecotedeni, ohuapi obodi bica tadsa omadinissa tajaroa aji jidapana omadjaropaji. Diodsa naqui occa madie ahuato tajaro –najari Pablo.

²Naraha dada toquimadedenicca tamine deni tojajari Ananiapa nahi Pablo inoridsa madija domo huarideni icadossebaquijari: –¡Ajari ppa tidsimamanajo! –najari.

³Naraha Pablo pohuadsa huati tajari: –¡A, tiapi mamaisade! ¡Nidsa manaco Diopa tia ppa tacossahitohui! Ima cacattemade tijaraha ima oppina tani titinana najaro. Moisesicca marinaja nahato tinadsapi pina occa imara ticattemanitohuiraha. Ohuajari ppa idsimamananijine ticadossebaquidsapa Moisesicca marinaja dsori tinanajaro –najari.

⁴Naraha nahi Pablo inoridsa madija domo huajari attidenia: –¿Nejecotohui Diodsa dada toquimadedenicca tamine deni tojajaridsa tetti tabaccora tadsa huati tinajaro? –quinajari.

⁵Nanaja Pablo pohuadenidsa huati tajari: –Ohuemecotedeni, pohuapa dada toquimadedenicca tamine deni tojajari ssamo onadsa pohuadsa atti atti onajaropa. Aji Dio Atti dsodo nanidsapi: “Madijadenicca taminedsa tamassomana tejeraji” nani. Najaro ima nahato onaraha –najari Pablo.

⁶Nadsapa Pablo bodi nahato tajaria aja jodiodeni motaha aja *marinaja onini pariseodsa jehe quinajaridenipaja. Poccadeni marinajapi onih ecahuamanajaro. Jodiodeni motaha aja *marinaja onini sadoseodsa jehe quinajaridenipaja. Poccadeni marinajapi onih ecahuamanajaro. Nadsapa pariseodeni pohuadsa huatideni huanaquiri nahijine Pablopa jadsirema huati tajari: –Ohuemecotedeni, ohuapi marinaja pariseodsa jehe onani, occa abi naco jehe najari. Nadsama ohuapi aja jicajaridenipa nahatonimanahitohui ohonanajaro. Najaro occa imajinea ohuadsa huadiquiri najaridenipa ohua inajidsomananijine tohuini quiquinanajari –najari Pablo.

⁷Pablocca ima nema nani mitta-manadsapa pariseodeni, sadoseodeni tedseje pohuadenira huadimanadsa dsahua dsahua canajari. Nadsapa ima cacattemededeni ima inapamamanadsapa jehe canire-jarajari. ⁸Aja marinaja sadoseoccapi: –Idsoquedsapi inahatoninira tani, Diocca dodosse tabaqqi memehujicca naco nohuerahi, icorime naqui nohuerani –quiquinanajari. Naraha marinaja pariseoccapi: –Idsoquedsapi inahatoni tani, Diocca dodosse tabaqqi memehujicca

naco madimanahi, icorime naqui icajini – quiquinajari. ⁹Nadsapa sadoseodeni pariseodeni tedseje poccadeni marinaja acconi cahadiredsapa jadsirema dsahua dsahua canajari. Nadsapa jodiodenicca marinaja maridedeni mota aja marinaja pariseodsa jehe quina-jaridenina Pablo atti acco icamanahijine toتهمamana najari. Nadsapa huati toquinajari: – Ajajari madijapa imasiri cappirahi. ¿Nejecotohui tinajidsomanahijine? Tocatorime itide, Diocca dodosse memehujicca itide pohuadsa huati tajari – quinajari.

¹⁰Naraha huadimanadsa denima paja mohua toquinarihi nadsapa soldadodenicca tamine cappinajari. Pablo ahuaji joca ahuaji joca quinahi qqui tadsa pohua bodipa: – A, inatajorimanadsa dsoqquerana – nadsa pocca soldadodeni jahijonahijine huahua najari: – ¡Pablo inaadsoqqe-manabote nahi! ¡Qqui tiquinajo! Dama tiquinadsa icca odsahuaji tiaccanimanajo – najari. Nadsapa poccadeni odsadsa huedsapomajari Pablo.

¹¹Najaro dsomepi ia Medsede ahuatodsa Pablo inoridsa hua najari. Pohuadsa huati tajari: – ¡Pablo, daco tijirana! Aji ojine qqui tinajaro, timittajaro naqui aji Jerosaredsa tecomeraridsa-jaropi nidsa odsa panani *Roma-huaji naqui tecomerapomanitohui – najari.

Pablo dsoqqehijine najoramanajari

¹²Huada ssiajapa jodiodeni mota queriqquipomadsa pohuadenira Pablo inaadsoqqe-manahijine

*jehe canirejari. Nadsapa attidenia: – Pablo inaadsoqqe-jaraccadsama ijipa-jeraccana, dse inejeraccana – quinajari. – Aji ettissa inana-jeradsapi Dio ia tonajidso-baqquidsa bica tani, inajaro – quinajari. ¹³Nadsama aja – Pablo inaadsoqqe – quinajaridenipa madija 40 denima queriqquimanajari. ¹⁴Nadsapa dada toqqumade taminedeni, ime jocohuideni tedseje pohuadenidsa huatide jai tojajari: – Iapi ima inajorajaro, Pablo inaadsoqqehijine. Inaadsoqqe-jaraccadsama ijipa-jeraccana, inajaro. Ettissa inana-jeradsapi Dio ia tonajidso-baqquidsa bica tani, inajaro – quinajari. ¹⁵Nadsapa: – Jari, ajima inana: Tiadenipi ima cacattemadedeni tedseje aja romanodenicca soldadodenicca taminedsa timaidsamanana. Ajima tiquinaji: “Pablocca ima icattemanissa tanijine pohua atti denima imittana, inadsa Pablo ahuaji teccajonapomana” tiquinadsa eccajonamanapomahijine. Nadsama iapi aji jahuidsa inajoradsa iaqqequimanadsapa Pablo inaadsoqqehijine – quinajari.

¹⁶Naraha Pablo pohua jidobadipa bijedi jodiodeni jara quinahicca ima mittadsapa soldadodenicca odsahuaji bijedidsa huatide toccajari. Bacco tadsa toqqedsimadsapa Pablodsa pohua jara quinahicca ima huati tajari. ¹⁷Nadsama Pablopa romanodenicca soldadodeni dossede ojariadsa huahua nadsapa pohuadsa huati tajari: – Jari, ajajari dsabisso ticca taminedsa tiaccanijo, pocca ima huati tahijine – najari.

¹⁸Nadsapa pocca taminehuaji dsabisso iaccanidsapa pocca

tamedsa huati tajari: –Aja Pablo toponi cocorodsa huedsajaripa ohuadsa huahua nadsa atti ajama najari: “Ajajari dsabissopa ticca tamedsa tiaccanijo, pocca ima huati tahijine” nadsa ohuaccajonajaripaja –najari.

¹⁹Nadsama romanodenicca soldadodenicca tamine deni tojahiccapa dsabisso biji dama, madija ohuaha mittamana-jarahijine madija nohuerahihuaji iacca-cca nadsa huati tajari: –Nija ¿nejeco imara ohuadsa huati tinanijine? –najari.

²⁰Nadsapa dsabisso attipa: –Jehe, jodiodeni occa coco inanadsoque-manahijine jehe canirehi omittadsa huatide occajonajaro. Dsemassapa poccadeni ima cacattemedenedisda Pablo tiaqqedsimapomahijine tiadsa huati toquinahitohui: “Pablo-cca ima icattemanissa tanijine pohua atti denima imittaccana” quinahitohui. ²¹Naraha pohuadeni attidsa jehe tejerana –najari. –Madija 40 quinahitide, denima itide, jahui inididsa pohuadeni tonajimamanadsa occa coco tossoqqimadsapa inanadsoque-manahitohui. Nadsama attidenipa ajama quinahi omittapa: “Inanadsoque-jaraccadsama ijipa-jeraccana, dse inejeraccana. Ettissa inajeradsapi Dio ia tonajidso-baqquidsa bica tani” quinapaja –najari. –Najaro ima najoramanajari. Jehe tanitohui madimanacchahi –najari Pablo jidobadi.

²²Naraha soldadodenicca taminea: –Jehe, epeje, omittani. Ticcanina. Naraha: “Soldadodenicca tamedsa huati onapa” tejerana. Tecomana, onajaro –najari.

Pablo inanadsoquemana-jarahijine dsama cacahuade Ferishuaji iaccamanajari

²³⁻²⁴Nadsapa soldadodenicca tamine aja dsama arobeni Jodea cacahuade Feridsa Pablo dosse inahijine soldadodeni dossede pamaha huahua inabaqqujari. Huedajonadsapa pohuadenidsa huati tajari: –Ticcadeni soldadodeni tinanajoraridsa-baqquimanajo. Nidsa dsome 9’dsa odsa panani Sesareahuaji jai tijaji –najari. –Soldado 200 quinaha pohuadeni amoridsa jai tojana. Bojo idenidsa naco 70 quinaha jai tojana. Huahuajinama jai tojahijine naco 200 quinaha jai tojana. Bojo ojariedsana Pablo toccahijine. Pablo tecahuamanahissa tadsa dsama cacahuade Ferishuaji bacco tahijine –najari. ²⁵Nadsama soldadodenicca taminepa dsama cacahuade Feridsa ima teppe dsodo inajaro.

²⁶–Nija dsama cacahuade bicahi Feris. ¿Bica tinaqui? Ohuapi Claodio Risia tiadsa occa ima dsodo onajaro. ²⁷Ajajari madija tiadsa dosse onajaripa jodiodeni dama quinadsa inandsoque-manahijineraha pohua attipa: “Romano madija ojani” nahi omittadsa ohua occa soldadodenima pohua ecahuajari. ²⁸Nadsama obodipi: ¿Nejeco ima cajidsa jodiodenipa pohua onajidsohuijine tohuini quinajari? onadsa poccadeni ima cacattemedenedisda ohuaqqedsimajari. ²⁹Nahihuaji imarideni omittajaropi Pablo pocca imapi jodiodenicca marinajassa nejersa pohuadsa huadiquiri najari.

Pohuapa huadie cappiraraha “Dsoqquena” quinajari. Naraha ima tabaccora tani cappiradsa dsoqquehijine bica tejerani, onajaro. “Coro todsimana” quinaraha ima cappiradsapa coro todsimahijine ssamo tani.

³⁰Naraha jodiodeni motapa: “Pablo inanadsqquena” quinahi ima omittadsapi huassinaja tiahuaji dosse onajari. Nadsapi jodiodenidsa huati onajaro: “Pablodsahuadiquiri tiquinadsapi dsama cacahuadehuaji jai tijaji, pohuadsana ticcadeni huadie teceramananijine” onajaro. Jehe, epejeni, occa ima. Ohua onipi: Claudio Risia –najari pocca ima teppedsa.

³¹Nadsapa soldadodeni dsome Pablo iaccamanadsapa odsa panani Atipatridsa bacco toquinajari. Pina poccadeni tamine pohuadeni dosse inabaquipohui attissa inanamanajaro. ³²Huada ssaijapa soldado pohuadeni amoridsa jai tojajaridenipa pohuadeni tadsarihuaji dsodonimanajari. Naraha bojodsa jai tojajaripa Pablodsajai tojaccahi. ³³Nadsapa odsa panani Sesareadsa bacco toquinadsapa dsama cacahuade Ferishuaji jai tojedsimadsa ima teppe da quinarajo. Pablo naco pohuadsa inebo-manajari. ³⁴⁻³⁵Nadsapa Ferispa ima teppe hua inehe jicadsapa Pablodsahuati tajari: –¿Nejeco dsamahuajicca tijani? –nadsa Pabloa: –Dsama Ciliciahuajicca ojani –najari. Nadsapa: –Nidsa tia jaradedeni bacco najonamanadsana ticca ima omittanijine –najari Feris. Nadsapa pocca dodosse tabaqquicadossebaquijari, tamine Herode

tadsaribotedsa Pablo ecahuamana-hissa tahijine.

Dsama cacahuade Ferispa Pablocca ima mittajari

24 ¹Nadsapa Ferisdsa Pablo madihicca huada 5 nadsapa tamine Ananiapa odsa panani Sesareadsa bacco najonajari. Pohuapa odsa panani Jerosarehuajicca dada toquimadedenicca tamine deni tojajari. Pohuadsa jahijonahipa ime jocohuideni mota, ima huahuati toquimade nahatobote ojari najonamanajari. Ima huahuati toquimade onipa Teotoro. Nadsama najaridenipa dsama cacahuade Ferishuaji jai tojedsimajari, Pablodsajai inassonari-mananijine.

²Nadsapa Pablo naco huahua quinadsa qqedsimadsapa Teotoro poccadeni huadie huati tajari Ferisdsa: –Nija tamine Feris. Tiapi bica tinadsa tijine jonehedsa imadinissa dsanapojarode. Nahato tinadsapi icca dsama Jodea huapimanaqui tijine tobicaridsajaro. ³Jehe tamine bicahi Feris, tijine iadsa bica tadsapi “Bica tinani, deni tijani” inajaro. ⁴Aji tiadsa huatide naqui jaijajona-jeraraha iadsa ima tojadsa tiadsa jaijajonajaro. Tiadsa icca ima najo tejeranijine ima badsira tehe huati onana. Bica tinadsapi titaharibo canaji –najari Teotoro. ⁵–Ajajari madijapa ima ponima inaridsajaro. Pohuajine dsama huapimacca jodiodeni huadimandasa mohua mohua naridsamanajari. Pohuapa Nasaretihuajicca Jesodsa toquejenarideni aja Nasareno quiquinanajaridenicca tamine tojajari. ⁶Pohuajine Diodsa

dada toqqimahuaji oppina tehe tojabote naraha pohuapa dama inade. [Nadsapi iqueriqquidsa aji ia jodiodeni icca marinaja hua inadsa najarods pocca ima icattemana inajarode. ⁷Naraha romanodeni-cca soldadodenicca tamine Risia ccajonadsa pocca soldadodeni dacorehema jahidsimadsapa Pablo dama quinadsa iaccanimanade. ⁸Nadsapa Risia attipa iadsa: “Nahidsama cacahuade Ferisdsana Pablo tidsahuamanajo” nadsa tiadsa ia dosse najonabaquijaride.] Jari, tiana pohuadsa huati tinaji. Pohua atti timittadsa attidenidsa pajissa tanitohui –najari Teotoropa. ⁹Nahidsa jodiodeni toqueriqquijarideni attideni naco: –Teotoro attipa pajissa, Pablocca imapi tabaccora tani –quinajari.

¹⁰Nadsapa manaco Pablo huati tahijine Feris pohua dsepe Pablohuaji da icanadsa Pablo huati tajari: –Jehe tamine Feris, tiana occa ima timittanijine jipa onajaro, tiapi huajano huapi taha ajijaro dsamadsa madimanajaridenicca ima titicattema najaro. ¹¹Maittadsama onihima nadsa Jerosarehuaji bacco onanijaro. Jidapapi huada 12 bacco tani. Nanidsa bacco onanipodsapi Diodsa ohuatidsenijine dada toqqimahuaji oqquedsimade. Jipa tinadsapi nahidsa madimanajaridenidsa huati tinadsa “Pajissa pohua qqui inade” quinahitohui. ¹²Naraha aja jahijonajaridenipa ima ponima onanaridsani qqui toquina-jararaha ohuadsa huadimanajaride. Ohuapi madija tedseje ahuaji atti ahuaji atti inejerade. Diodsa dada toqqimahuaji naqui madijadsa mohua mohua onejerade. Jodiodenicca Dio Atti

mamarihuaji naqui mohua mohua onejerade. Aji odsadsa, amossinihuaji naqui mohua mohua onaridsajerade. ¹³Nema nadsapi pohuadeni atti tossamojaro, ojine ima nohuersa. Pina pohuadeni huati toquinajarissa najaro ahuatomanijine ssamo tani –najari Pablo.

¹⁴–Naraha ohuapi ima ojarie ocajijaropi ajima onajarode: Abi Diopa, aja icca ididenicca Dio, Pohuadsara ibora onajaro. Naraha Diocca dosseniji dsatidsa pajissa onadsapi ajajari jodiodeni mota najarods: “Jidsa tani, tabaccora tani” quinaraha. Ohuapi Moisesicca marinaja huapimadsa naqui pajissa onajaro. Dio Atti cacomeraquiri najaridenicca dsodonijidsa naqui pajissa onajaro. ¹⁵Ohuapi aji tohuini omadijaropi pina ohuemecote jodiodeni tohuini madimanajarissa najaro. Najaro aji jicajaridenipa Diojine nidsa nahatonimanahitohui, ihinanajaropaji. Bicaquiri najarideni jicajari naco nahatonimanahitohui. Tabaccoraquiri najarideni jicajari naco nahatonimanahitohui, ihinanajaropaji. ¹⁶Najaro tohuini onadsapi obodi huire tehe omadinijine dissera onajaro. Dio ohua qqui, madijadeni naco ohua qqui toquinadsapa ocappina-jerajaro –najari Pablo.

¹⁷–Jehe, nadsapi huajano huapi taha dsama onihihuaji occaridsade. Nadsama nahihuajicca madijadeni ohuadsa dsiniro da quinadsa ohuaccanijaro, ohuemecote Jerosarecca jodiodeni cappiramajaridenidsa da onaridsanijine. Ohua naqui Diodsa da onanijine occanijarode. ¹⁸Nema onadsapi Diodsa dada toqqimahuaji

oqquedsimajaropajide. Pina ia jodiideni icca marinajassa ihinana najaro onanajarode. Najaro jica-dsapi occa daniji Diodsa dade oqquedsimadsa ohua qqui toquina-jari. Madija huapi taha ohuadsa jai tojedsima-jarajari. Ojine naco madija mohua mohua cama-jarajari. ¹⁹Naraha dsama Asiahuajicca jodiideni nahidsa ohua qqui toquindsapa ohuadsa huadimanajaride. Najaridenina tiahuaji jahijonadsa poccadeni huadie tiadsa huati toquinahijine bica taraha, onajaro. ²⁰Naraha Asiahuajicca jodiideni nohue quiradsapa ajadsa domo huajaridenina jidapana tiadsa huati toquinana, onajaro. Nahi jodiidenicca ima cacattemededeni deni toquejenajaridenidsa oqquedsimadsa tabaccora tanicca onanajaro qqui toquinajari huati toquinana, onajaro. ²¹Aji ima ojarie huati onajarora huati toquinahitide. Aja pohuadeni baccohuaji ohuadsa jadsirema ohuatti ajima onajarode: “Jicajaridenipa nahatonimannahitohui ohonanajarojinea ohua inajidsomananijine tohuini quina-jari” onajarode. Najaro tiadsa huati toquinahijine itide –najari Pablo.

²²Nadsapa dsama cacahuade Feris najaro mittadsapa: –Epejeccani, denimapi huada onihidsana –najari. Jesocristodsa jehe quinarideni tahimari aji –Diocca dosseniji dsati –quiquinanajari pohuadsa jidsera tajaro. Nadsapa Pablodsa huati tajari: –Nidsa, soldadodeni-cca tamine Risia ahuaji bacco nadsa ticca ima ocattemanijine –najari. ²³Nadsama soldado dossededsa huati tajari: –Pablopa toponi cocorohuaji cadena jiraha tecahuahissa

taccana –najari. –Pohua tessedeni naco pohuadsa qquide jahijonahijine oppinera tani. Pohua cappirahicca eccajonamanahijine naco oppinera tani. Dosse tinanibaqqui tajarana –najari Feris atti.

²⁴Nadsapa huada onihidsa Ferispa Sesareahuaji bacco nanijari, pocca amoneje Drosira tadsajani. Ponipi jodio madija. Ferispa Pablotohui huahua nadsa pohuadenihuaji eccanimanajari. Nadsapa Pablo Jesocristodsa jehe inani tahimarini mari icanabaqquidsapa taharibobo canajari. ²⁵Nadsama Pablo mari icanabaqquidsapa ima 3 nehe huati tajari: –Madija imari borocco tanina bica tajaro –najari. –Madija imasiri inana-jeranijine pohua pohua cacahuade nahato tajarina bica tajari –najari. –Nidsaranibote Diohuaji huapima idomo huadsa Diona icatteljidsa-baqquihitohui –najari Pablo maride tojadsa. Naraha Feris mittadsa cappinadsapa Pablodsa: –Epejena, ticcanina. Nidsa odsepe jirapomadsapi titohui huahua onapomanitohui –najari. ²⁶Feris pohua bodipa: –Pohua tappa onahijine ohuadsa dsiniro da inanitide –nadsapa huajjiradsa Pablodsa huati tahijine pohuatohui huahua huahua naraha dsiniro da inejera-jaro. ²⁷Nama dsanapodsapa huajano pamaha tossoniqqumajari. Nadsapa tamine Feris dsama cacahuade nebdsapo Porsio-Festona dsama cacahuade tojajari. Naraha Feris pohuadsa jodiideni huatidsemana-dsanapohuijinepa Pablo tappa inajarajari.

Dsama cacahuade dsati Festopa Pablocca ima mittajari

25 ¹Nadsapa Festo dsama cacahuade tojahijine odsapanani Sesareahuaji bacco najari.

Nahi Sesareadsa madiraha huada 3 nadsa odsa panani Jerosarehuaji toccajari. ²Nahidsa bacco tadsa dada toqqimade taminedeni, *jodiodeni ime jocohuideni tedsejepa dsama cacahuade dsatidsa jai tojedsimajari, Pablo tahimari huati toquinahijine. –Pablocca imapi tabaccora tani –quinadsa huati huati toquinajari. ³Pohuadeni attipa: –Jari tamine Festo ¿tettidsa jehe taqui? Pablocca ima huassinaja ticattemanijine Jerosarehuaji eccanimanahijine huahua tana. Denima inajo-jerana –quinajari. Nama quinaraha jahui inididsa madija pohuadeni tonajimamandasa Pablo inanadsoqqe-manahijine najoramanapojaripa ecomamanageri. ⁴Naraha Festopa pohuadeni attidsa jehe najarajari. Pohua attipa: –Pablopa Sesareahuaji toponi cocorodsa huedsahi. Ohua naquijari Jerosareadsa occa huada huapi tejerani. Nani Sesareahuaji occanibote nani –najari. ⁵ –Najarojine tiadenidsa ajima onajaro: Ticcadeni taminedeni mota Sesareahuaji ohuadsa jai tojanina, onajaro. Pablopa imasiri cajija caji-jaraja nahitide. Nani Sesareadsana ticcadeni ima aji “Pablocca imapi tabaccora tani” tiquinajaro ohuadsa huati nimanimana-pomahijine, onajaro –najari Festo. ⁶Nadsapa nahi Jerosareadsa Festo pocca huada 8 nitide, 10 nitide, nadsana Sesareahuaji toccanijari. Bacco tanidsapa huada ssiajana ima cacattemahuaji toqqedsimadsa nahidsa ima icattemanijine huittarajari. Nadsapa Pablo eccajonamanahijine huahua najari. ⁷Nadsa Pablo bacco dsimadsapa Jerosarehuajicca

jodiodeni jahijonajaridenia Pablo icahuahuajanimanadsa tamine Festodsa huati toquinajari. Imasiri onihi, onihi huati huati toquinaraaha attidenipa pajissa jerani. Pina pohuadeni huati toquinajarissa najaro Festo qqui tahijine nohuera-dsapi ssamo tani.

⁸Nadsapa Pablo manaco huati tajari: –Ohuapi jodiodenicca marinaja onajidso nejerade. Jerosarehuajicca Diodsa dada toqqimahuaji naquijari onajidso nejerade. Romanodenicca tamine deni tojahicca pohuadsa naquijari ima onana nejerade –najari.

⁹Nadsapa tamine Festo jodiodeni inahatidsebaqquihijine Pablodsa huati tajari: –Jerosarehuaji ticcanidsa nanidsana ticca ima ocattemanijine ¿jipa tinaqui? –najari.

¹⁰Naraha Pablo attipa: –Ohuapi romanodenicca ima cacattemahuaji ohuedsajaroa. Ajidsana occa ima cattemanijine bica tani, onajaro. ¡Jerosareadsapi poni! Occa madija jodiodeni naco ohonajidsobaqqui najaradija. Najaro imapi nahato tinani –najari. ¹¹ –Tabaccorehe onanadsapi occa tabaccorehe manaconi odsoqquenijine bica tani. Naraha attideni pajissa jeradsapi pohuadenidsa ohua teccoramani-nijine bica tejerani, onajaro. Ohuapi *romanodenicca tamine deni tojahiccana occa ima icattemanijine tohuini onani –najari Pablo.

¹²Nadsapa Festo pohua biji acco camadedeni tedseje imahaha canajari. Nadsana Pablodsa: –Jehe, tiapi romanodenicca tamine deni tojahiccana ticca ima icattemanijine tohuini tadsapi najaridsa ticcanitohui –najari Festo atti.

**Festopa tamine Aquiripadsa
Pablocca ima huati tajari**

¹³Nadsama huada onihidsapa romanodenicca dsama arobeni onihihuajicca tamine onipa Aquiripa pohua caripene Berenise tadsajani odsa panani Sesareahuaji huedajonajari, dsama cacahuade Festodsa qquide. ¹⁴Nahidsa poccadeni huada huapi tadsa Festopa tamine Aquiripadsa Pablo tahimari huati tajari ¿pohua atti nejecoma napadsaja? nadsa. Festo attipa: –Dsama cacahuade ojaponipi toponi cocorodsa madija ojaria bacco onapode. Dsama cacahuade Feris inebodsapa manaco ohuana ohuacahuajaride –najari. ¹⁵–Naraha dsama cacahuade ojapodsapi Jerosarehuaji occadsa jodiodeni dada toqqumade taminedeni, poccadeni ime jocohuidenima Pablodsa huadiquiri nahi paja nadsapa ohuadsa huati toquinade: “Pablocca imapi tabaccora tani. Ticca dodosse tabaqqi ticadossebaqqijo, Pablo inandsoqqe-manahijine” quinajari. ¹⁶Naraha pohuadenidsa ohuattipi: Iapi romanodeni iquejenadsapi madija pohuama ihinanadsoqqe najarajari. Ima cacatemahuaji huapima queriquimanadsa tahide pohua huadidedeni poccadeni ima huati toquinapodsapa manaco pohua pocca ima ecomerajaro. Nadsana ima cacatemade: “Jehe, dsoqquena” nadsapa dsoqquehi bica tahi. Naraha: “Dsoqqe-jarana” nadsapa dsoqquehijine ssamo tani, ihinanajaro, onade pohuadenidsa. ¹⁷Nema onajarojinea Jerosarehuajicca jodiodeni ahuaji jahijonadsapa

huada ssiaja ima cacatemahuaji oqquedsimajaro, inajo-jeranijine onadsa. Ima cacatemacca huihuittaridsa ohuittaridsapi Pablotohui huahua onajarode. ¹⁸Obodipi: Imasiri oppina tanicca inanajaro nitide, onaraha pohua huadidedeni huati toquinadsapa nema nanicca huati toquina-jarade. ¹⁹Pohuadeni attidenipa: “Pablopa icca ididenicca marinajassa nejerajaro mari mari naridsajari. Pohuapa aja jodio madija onipa Jeso najaricca imadsa pajissa naraha najari Jesopa dsoqqejari” quinajari. Naraha Pablo attipa: “Jesopa camittemanidsa madihi paja nahi” najari. ²⁰Najaro ima ohuadsa ssamo tadsapi epeje onade. Nadsapi Pablodsa huati onade: “Jerosarehuaji ticcanidsa nanidsana ticca ima ocattemanijine ¿jipa tinaqui?” onade. ²¹Naraha Pablo: “Ohuapi romanodenicca tamine deni tojahiccana occa ima icattemanijine tohuini onani” nade. Nadsapa: “Jehe, toponi cocorodsa timadiccana. Nidsa icca taminedsa tia dosse onanitohui” onade –najari Festo, Aquiripadsa huati tadsa. ²²Nadsapa tamine Aquiripa attia: –Jari Festo, ohua naqui Pablo atti omittana –najari. Nadsapa: –Jehe, dsemassana pohua atti timittanitohui –najari Festo. ²³Nadsapa huada ssiaja tamine Aquiripa, Berenise tadsajani madija huapima: –A... tamine deni tojahicca –quinahijine taminedenicca etero huatini ccara tanicca huedsamanadsapa ima cacatemahuaji huadedsimajari. Pohuadeni tedseje romanodenicca soldadodenicca taminedeni, odsa pananicca deni toquejenajarideni jahidsimadsa

ima cacattema bodihuaji queri-qquimanajari. Nadsapa Festo Pablo eccajonamanahijine huahua najari. ²⁴ Pablo qquedsimadsapa Festo atti: –Jehe tamine Aquiripa, aji iadsa tiqueriqquimanajaro naqui jidapana timittamananijine tiadeni-dsa huati onana. Aja qqui tiquina-jaripa jodiodeni huapima pohuadsa huahudimana najari. Odsa panani Jerosarehuaji occadsa naco pocca ima ohuadsa huati toquinajari. Aji odsa panani Sesareadsa naco ohuadsa huati toquinajari. Huatide disseraqquri nadsa johua johua quinadsapa pohuadsa: “Dsoqquena, dsoqquena” quiquina-najari. ²⁵ Pohua huadidedeni attideni omittaraha pohuapa imasiri cappirahi. Pohua ima inanjera-dsapi inajidsomanadsa inana-dsoqqe-manahijinepa oppina tani. Pohua atti naco: “Romanodenicca tamine deni tojahiccana occa ima icattemanijine” nadsapa ohuapi jehe onade. Nadsapa nahihuaji dosse onahitohui, onajaro –najari Festo. ²⁶ –Naraha icca tamednsa pohua dosse onadsapa ima teppema dosse onahitohuiraha pocca imasiri tahimarini ssamo onadsapi ꞥnejeco imara occa tamednsa dsodo onapadseje? onajaro. Najarojine Pablotohui huahua onajaropa. Jari, jidapana pocca ima timittamanaji. Tamine Aquiripa, tia naqui pocca ima timittadsapi pocca imasiri tiadsa ahuato tanitide. Nema nadsapi pocca imasiri tahimarini nahato onadsa occa ima teppedsa dsodo onanijine. ²⁷ Madija toponi cocorodsa huedsadsapa pocca imasiri tahimarini ssamo onadsapi ꞥicca tamine deni tojahicca

pohuahuaaji dosse onahi bica taco? Bica tajarahi. Imasiri tahimarini dsodo onejeradsapi pina pohuama dosse onajarissa nahitohui –najari Festo.

Tamine Aquiripadsa Pablo pocca ima huati tajari

26 ¹ Nadsapa tamine Aquiripa Pablodsapa huati tajari: –Jari, manaco ticca ima huati tinaji, imittana –najari.

Nadsapa Pablo huati tahijine pohua dsepe meme da icana-dsa huati tajari: ² –Jehe tamine Aquiripa, tiadsa occa ima huati onadsa timittanijinepi ohuatidsejaro. Jodiodeni occa ima tabaccorata ni quinadsa ohua idsahuamanaraha tiadsa occa ima huati onadsapi ima onana-jerani nahato tinanitohui –najari. ³ –Jehe, tiapi jodiodeni tahimari nahatojide tijirani. Tiadsa naqui icca madija jodiodenicca madie jidsera tani. Iapi jodiodeni icca imadsa jehe icanirenissa tejerani. Jodio arobedenipa ima onihidsa jehe quinajari, jodio arobedeni ohuahapa ima onihidsa jehe quinajari. Ima nema nani nahato tinadsapi occa ima mohuaradsa titaharibo canaji –najari Pablo.

Pablopa Jesodsa toja-jaraccadsa pocca ima huati nimanijari

⁴ –Aja jodiodeni huapimapa occa madiicca ima nahatoqquri najari. Ohuapi ejedeni ojadsama pohuadenidsa omadiridsajarode. Tahidepi occa dsama Ciliciahuaji ossonadsa ohua qqui toquinapojari. Dsotode dsabisso ojadsapo odsa panani Jerosarehuaji omadidsa naqui ohua qqui najonamanajaria ajjaropaji. ⁵ Jehe,

pohuadenipa tahidedsama ohuadsa nahatoqquri najonahi. Marinaja onini pariseodsa jehe onapojaro-cca ima naqui nahatoqquri naraha tiadsa huati toquina-jarajari. Iapi marinaja pariseodsa jehe inajaropi pina jodio motadenissa inejerani. Iapi jodiodeni icca marinajadsa denima disseraqquri inajaro.

⁶Naraha jidapana tibaccodenihuaji ohuajaro, occa ima ticattemamana-nijine ohuadsa huahua tiquinajaro. Ohua ohuattipi: Jicajaridenipa nahatonimanahitohui, pina Dio icca ididenidsa huati tapojarissa najaro. Najaro tojanijine tohuini omadijaro. Nema onadsapi ohuadsa huahuadimana najari. ⁷ICca madija jodiodeni aja icca idi Isaraeri pohua bedi 12 quinajarideni potemahi huapima jicajarideni Djojine nahatonimanahi qqui inabaqquihijine tohuini imadi-dsanapojaro. Pina Dio huati tapojarissa najaro tohuini imadijaro. Najarojinea jodiodeni Diodsa iboraqquri nadsa dsome ssiaja, dsome ssiaja dsepedeni ihijimana najari. Naraha tamine Aquiripa, ohua naqui najarotohui onajorajarojine jodiodeni motaha ohuadsa huahuadimana nadsa odsoqque-nijine tohuini quiquinanajari.

⁸Naraha ¿nejecotohui tiadenia jicajaridenipa Djojine nahatonimanahijinecca imadsa pajissa tiquinejajaro? –najari Pablo.

**Pablo Jesodsa
jehe quinajarideni
inajidsobaqquijaricca
ima huati nimanijari**

⁹ –Nadsama ohua naqui tahidepi Nasarethiujicca Jeso tahimari-dsa pajissa onejeraccade. Jesocca

ima jicanijine naqui dissera onade. Ohuapi Jesodsa jehe quinajarideni ohonajidsobaqqui nadsapa: Bica tani, ohonanaccade. ¹⁰Ohuapi Jerosaredsa nema onaridsade. Dada toqqumade taminedeni ohua icadossemanadsa naqui Jesodsa jehe quinajarideni huapi taha otadamadsapa toponi cocorodsa coro coro ohodsimabaqqui naccade. Jesodsa jehe quinajarideni inajicamanadsa naco: Jehe, bica tani, ohonanaccade. ¹¹Nema onaridsajaroa jodiodenicca Dio Atti mamari-huaji huapima quequeriquimana najarideni onajidsobaqquihijine tohuideni ohoccaridsa naccade. Jesodsa jehe quinajari nebomanahijine tohuini onadsa pohuadeni ohonajidsobaqqui najaride. Pohuadenidsa huadi onadsa nacassera onadsapi odsa panani huaji tanicca onihi onihihuaji naqui tohuideni ohoccaridsa naccade –najari Pablo.

**Pabloa Jeso pohuadsa
ahuatopohuicca ima
huati nimanijari**

¹² –Nadsapi Jesodsa jehe quinajarideni damade nema onaridsadsapi odsa panani Damascohuaji occajarode, otadamahijine. Dada toqqumade taminedeni ohuadsa: “Jehe, titadamahijine ticcaji” quina-dsapa pohuadeni atti ima teppe-dsa dsodo quinadsapi poccadeni ima teppema occajarode. ¹³Jehe, nadsama tamine Aquiripa, najaro ima tiadsa huati onana. Ohuapi jahui occajaro... maji itetepidsa Damasco bacco onabote naraha memehujicca ssiajani dacorehe amadsati ohuadsa bacco narona-dsapi ohuinori nemanehedsa, aja

ohuadsa jai tojajarideni inorideni nemanehedsa naqui ssiajahuajani-ridsa nade. Majipa dsibehe taraha ajamani. Aji ohua qqui onajarona denima dacorajaro. ¹⁴Iapi huapima iedimaridsade. Nadsama ohuapi etti ebreodsa omittade: “Saoro, Saoro ¿nejecotohui occa madija nanajidso taridsajaro? Aja occa madija nanajidso taridsajaropi pina ohua nanajidso taridsajaro-ssa najaro” nade. “Nema tadsapitia tinatabaccorajaro. Pina bohui pohua momohua bono ssacarajaridsa ttai nanidsa bohui pohua pohuajine biquerajarissa tajaro” nade. ¹⁵Naraha manaco pohuadsa huati onade: “¿Tiapi nejecojari?” onade. Naraha: “Ohuapi Jeso. Tiapi ohua tinajidsojaro” nade ohuadsa. ¹⁶Nadsapa ohuadsa: “Titehemaji, aji tiadsa ohuatomajaropi ohuadsa tidsepe ijiniijine. Occa ima naqui tecomeraridsanijine onadsa titohui huahua onajaro. Aji jidapana ohua qqui tinajaropi najaro occa ima tecomeraridsanijine. Nidsa tiadsa ohuatopomadsa ohua qqui tinapomajaro naqui tecomeraridsanijine. ¹⁷Aja jodiodenidsa timadiridsadsapi tia ohuacahuaridsanitohui. Jodio quejena-jararidenidsa timadiridsadsa naqui tia ohuacahuaridsanitohui, madija tia inaadsoqquemana-jeranijine. Jidapapi jodio quejena-jararidenidsa tia dosse onanijine. ¹⁸Pohuadenipa pina dsidsinidsa jahiridsaraha tia dosse onajaropi noccodeni ssire tinanabaqquihijine. Nahi dsidsini nebomanadsapa Dio ssiejenedsana madimanahijine. Imasiri totonanade Satanacca dossehedsa toquejenaraha nebomanadsapa

Diodsara toquejenahijine. Ohuadsa pajissa quinadsapa poccadeni imasiri onanamossinijine. Bodi-deni onahirebaqquidsaco nidsa memehuaij Diodsa toquejenadsapa pocca medse bicaqquiriri najarideni tedseje pocca biquehe cajimana-hitohui” nade Jeso ohuadsa –najari Pablo.

**Pablopa Jesocca
dossenijidsa ibora tajari**

¹⁹Nadsapa Pablo attia: –Tamine Aquiripa, aji huati onajaropi Diodsapa ocajijaro Jeso ohuadsa ahuatodsapa pohua attidsa ibo onejarajaropaji. ²⁰Tahidepa odsa panani Damascotohuai Diodsa toquejenahijine huati onabaqquijoparide. Dsotode odsa panani Jerosarecca naco huati onabaqquijaride. Ajijarodsama Jodea huapimacca naco huati onabaqqui-ridsajaride. Jodio quejena-jararideni naco huati onabaqqui-ridsajaride. “Tibodideni tecajiqquimeramanadsa ticcadeni imasiri tinebomanaji. Diodsara tiquejenaji” ohonanade. “Ticcadeni jeheniji, tibodideni cacajiqquimera-manani ahuato tanijinepi Dio Attidsara iboraqquiriri tiquinaji. Ima bicanira tinanaridsamanaji” onadsa mari mari ohocanabaqqui najaride. ²¹Nema onaridsajaroa aji Diodsa dada toqquimadsa jodiodeni ohua dama quinadsa ohua inaadsoqque-mananijine disseraqquiriri najaride. ²²Naraha Dio ohua acco camadsapa maride dissera onajaroo aji dissera onanipaji najaropaji. Najaroo aji Dio Pohuajine ajidsa ohuajaropaji. Aji huati onajaropi pajissara huati onajaro madija huapima ajamani

toquejenarideni, deni toquejena-jarideni naco mittamanahijine, onajaro. Occa marinajapi jidsera tani. Maittaccadsama Moisesi, aja Dio Atti cacomeraquuri najarideni naco najarossa najaro huati toquinapojari. Pohuadeni tedsejemacca imapi aji imadidsama pajissa toजारopaji. ²³ Najaro imapi ajima najaro: “Mesiapa najidsohue imeni tonahanadsa huatiahitohui. Ppa idsamanaraha nahatoni-hitohui. Jicapojarideni huapimapa nidsa dsotodena nahatonimana-hitohui. Naraha Mesiapa tahide nahatonipohuitohui. Nahatonidsapa pina dsidsinidsa ssiajani tossiaja-baqquijarossa nadsa pohuana icassiejeranijine tahimarini ahuato inanadsapa jodiodeni, jodio quejena-jarajarideni noccodeni ssire inanabaqquihitohui” quinapojari Dio Atti cacomeraquuri najarideni attidenipa –najari Pablo.

Tamine Aquiripa Jesodsa jehe nahijine Pablo pohuadsa huati huati taraha jehe najarajari

²⁴ Pablopa ima cappirahi huati huati taraha Festo jadsirema atti atti najari: –¡Pablo, tiapi tissamojaro! ¡Papeo huajide tijiradsa tibodi tossamojaro! –najari.

²⁵ Naraha Pablo attipa: –Nohue ojirani, tamine Festo, obodi tossamo-jerani. Pajissara tiadsa huati onajaro. Occa ima borocco tani, ssamo tejerani –najari Pablo. ²⁶ –Aja tamine Aquiripa ajadsa huittarihi, pohuadsapi occa huatinaja jidsera tani. Najaroa aji ocappina-jeradsa pohua mitta-hijine huati huati onajaropaji. Jehe tamine Aquiripadsapi Jeso tahimari

huapima pohuadsa jidsera tani ohuapi nahato onani. Aji Jesodsa ima inanamanajaropi ahuatorehe-dsa ima inanaridsamana-jerajaro. Huapima qqui toquinaridsa-jaride –najari Pablo. ²⁷ Nadsapa: –¿Nija tamine Aquiripa, Dio Atti cacomeraquuri najarideni dsodo quinapojarodsapa pajissa tejeraqui? Pajissa tani nahato onani –najari Pablo.

²⁸ Naraha tamine Aquiripa: –A, tetti: “Amadsati Cristodsa tojana” ¿tajarorane? –najari.

²⁹ Nadsapa Pablo attia: –Jehe, epejena amadsati naqui bica tani. Dsotode naqui bica tani. Tiadeni huapimapi pina ohua Jesodsa jehe onajarossa tiquinanijine Diodsa huati huati ohonanajaro. Naraha cadena jirehe, onajaro –najari Pablo.

³⁰ Nadsapa Pablo pohua atti jicadsapa tamine Aquiripa, Berenise, dsama cacahuade Festo, aja pohuadenidsa queriquimanajarideni quina-dsa totehemamanajari. ³¹ Nadsapa tohuajimanahi nadsa pohuadeni ehuerahi imahaha canajari: –Aja Pablopa madija ihinajidsobaqqui najaradsapa dsoqquehijine ssamo tahi. Toponi cocorodsa huesdahiijine naco huesdahiijinepa nohuerahi –quinajari.

³² Nadsapa Aquiripaha Festodsa: –Pablopa tappa inahi bica taraha pohua attipi: “Romanodenicca tamine deni tojahicca pohuana occa ima icattemanijine” nadsapa tappa inahijine ssamo tani –najari.

Odsa panani Romahuaji Pablo dosse quinajari

27 ¹ Nadsapa: –Dsama Itariahuaji Pablo dosse inana, nahidsapa icca tamine deni

tojahiccana pocca ima icattema-nijine –quinadsapa romanodeni-cca soldado dossede Joriodsa huati toquinajari. Aja Jorio pocca dodosse tabaquipa 100 quinajari. Najaridenipa soldado 600 quina-jari mota. Pohuadenidsa: –Tamine deni tojajari *Acostocca soldadodeni –quiquinanajari. Nadsapa najari-dsa huati toquinajari: –Jari Jorio, toponi cocorodsa domo huedsajari-deni, Pablo quinadsa Itariahuaji tiaccabaquimanajo –quinadsapa aji ohua Roca naqui pohuadenidsa occajarode. ² Itesse Aristaco naco iadsa toccade. Pohuapa dsama Masedoniacca odsa panani Tesaronicahuajicca madija. Nadsama nani odsa panani Sesareacca jahui-dsa ia huapima jajedsippadsa odsa panani Adaramitiohuajicca *canoa imeni etero ssoque caniquimani cajinicca dsama Asia jippehuaji tohuaccabote nani qqui icanade. Nadsapi najaro canoa imenidsa jajedsadsa iaccajarode. ³ Huada ssiajapi odsa panani Sidohuaji huana icanade. Nadsapa Pablo cacahuade Joriopa pohuadsa huati huana tadsa: –Titessedeni qquide tiqqemorani bica tani –nade. Nadsapa pohua tessedenidsa Pablo toqqemoradsapa inajipamanade. Pohua cappirahicca naco pohuadsa da quinajari. ⁴ Nadsapi huada ssiaja Sidodsa ijoppemapomade. Naraha jojode dacorehe iahuaji jo najonadsapi canoa paji tohuaccarini nanijine ssamo tade. Nadsapi dsama bedeni passo imenidsa huittidsacossani Sipre inidihuajina tohuaccajaro. Najaro dsama bedeni huittidsacossajaro-jine jojode ojidsama nadsapi canoa

imeni tohuaccanissa tade. ⁵ Nadsapi Sipredsa iaqqeéquimadsapi passo imenihuajina iaqqeéjidsade. Dsama Ciliciadsa issoniéquima, dsama arobeni Pafiriadsa issoni-équima, dsotodepi dsama Risiahuaji bacco inade. Nanicca odsa panani Miradsana huana icanade.

⁶ Nadsapa nahidsa romano-denicca soldado dossede canoa imeni onihitohui qqui naridsa-dsapa odsa panani Arejadriacca canoa imeni Itariahuaji tohuaccanijine qqui icanade. Pohuapa najarodsa ia tohuacquedsabaquidsapa iaccapomade. ⁷ Nadsapi canoa imeni tohuaccaraha jojode jadsirema iahuaji jo najonapomadsapi canoa imeni tohuaccaraha najo tocanajaro. Huada huapi tani inajo-dsanapodsapi odsa panani Quinido huajira tanidsa bacco inade. Nadsapi jojodejine denima paji tohuaccarini nanijine ssamo tani. Nadsapi passo nocconidsa dsama huittidsacossani onini Cretahuajina acca icanamanadsa jojode ia cco tocajidsabaquide. Nadsapi nanicca odsa panani Saomonadsapi icassoniéquimade. ⁸ Denima Creta inidihuaji iaccadsa naqui najo taraha iacca... iacca... canoa imeni huahuana tocana oninipi Bueno Puertohuaji bacco inajarode, aji odsa bedeni Rasea huajira tanidsa. (Bueno Puerto ettidsapi: Huahuana tocana bicani, inajaro.)

⁹ Nadsapa huada huapi tani inajojonadsa dsadsajadecca abadsico bacco tocanade. Dsadsajade-dsapi passo imenidsa canoa imeni tohuaccani oppina tajarojine Pablo nahato tadsa canoa imeni ahaccadedenidsa huati tade:

¹⁰ – Jehe otessedeni, denima jaijadsapi oppinabote bacco inanitohui. Icca canoa imenipi cobara tocananitohui. Nadsapi todsepetaji naco amossihuajahitohui. Ia naqui ijicarana –nade Pablo. ¹¹ Naraha romanodenicca soldado dossede Pablo attidsa huaribo siba tajari. Pohuapa canoa imeni jinede atti, ahaccade attidenira mittajaride. ¹² Nani huahuana tocana Bueno Puertopi dsadsajadedsa bica tejerani nahatoquiri najari. Jojode passo, jojode passo dsanapojaro noppineni cappinamanadsa: –Jina, denima iaccana –quinade. Huapimapa Creta inidihuaji tohuaccamanadsa odsa Fenisedsa bacco toquinahijine tohuini quinajari. –Nani Fenisedsa bacco inadsapi nanidsana imadiccana, dsadsajade jicadsana jaijapomanijine –quinade.

Jojode dacorehe ccajonajaro

¹³ Nadsama jojode jadsirema iahuaji jo najonajaro cacajiquimeradsapi ojidsama inattihuaji ccajonajaro. Nadsapi: –Jehe, jidapapi bica tani –quinadsa ppejo ccanajabote idimoranimanadsapi icca canoa imeni tohuaccapomade. Nadsapi Creta inidima nani iaccapomade. ¹⁴ Iaccaraha dsotodepi dsamahuajicca jojode dacorabote ccajonapomadsa canoa imenidsa ssonari ssonari nade. Najaro jojode oninipi: Norodeste, icanacanimanajaro. Cnoa arobenihuaji ssonarijaro. ¹⁵ Jojodepi iadsa dacoradsa passo nocconihuajina iaccade, nanihuajipi jipepera inaraha. Nadsapi jojode poni ccajonanihuaji acca icanaraha jojode dacoradsapi epeje inade. Nadsapi

jojode poni toccanihuajina johuidso icadsanapode.

¹⁶ Nadsapi dsama bedeni huittidsa-cossani Caoda icassoniqquimadsa jojodepi ojidsama nade, dsama huacosseje najaro. Nadsapi nanidsa canoa bedenipi canoa imeni inorinidsa ssoque cadsanani je tocanani noppineni cappinamanadsa: –Joca icanamacossanina –quinade. Passo ijijarohne najo taraha nema nehe joca icanamacossanimanade.

¹⁷ Nadsapi canoa imeni tetepinidsa jore icadsanamanade. Cotanihuaji soca coro idsippamanadsa canoa dopanihuaji joca inajonamanadsapi daco cajiranijine nocconidsa ssoque idsanamanade. Dsotodepa ssiqui quehemama canajaro onini Siretedsa doi canadsa cabararini noppineni cappinamanadsa ahua jore canani tappa icanamanade. Cnoa nattinidsa tabo tocanadsapi ojidsama tohuaccajaro. Jojode toccanihuajira tohuacca-dsanapojaro. ¹⁸ Jojode dacorajaro nebo-jeradsapi icca canoa imeni jadsirema ahuaji pati ahuaji pati canade. Huada ssiajadsa naqui nema cadsanapodsapi todsepetaji mota, dsamatapa mota naco hua idsippamanade. Nadsapi: –Cnoa imeni tocappahuani nana –quinaraha nema cadsanaponi paji nade. ¹⁹ Ssiajapomadsa naqui nema cadsanaponi paji nadsapi canoa imeni totohuaccarinicca mota dicca quinadsapi hua idsippamanade. ²⁰ Nadsapi huada huapi taraha maji qqui inajarade. Dsome naqui abadsico bedi qqui inajarade. Tahidepi: –Icassiejeranitohui –inaporaha passo jojode dacorehema tabaccora dsanapodsapi: –Ajidsa ijicanitohui –inade.

²¹Huada huapi taraha ijipa-
jerade. Nadsapa Pablo totehema-
dsa huati tade: –Jehe otesedeni,
tahide Cretadsa tiadenidsa huati
onapode: “Denima jaijadsapi
oppinabote bacco inanitohui”
onaporaha ohuattidsa jehe tiquine-
jeradsapi oppinabote bacco inani
taji. Nassa ohuattidsa jehe tiquina-
dsapi tidsepedenitaji pohuama hua
tidsippamana-jaranaja. Tiadeni
naqui ocasserani temana-jerani-
tohuiraha. ²²Naraha jidapapi
tiadenidsa huati onana: Ticappina-
mana-jeraji. ¡Dacoco tijiraji! Icca
canao imeni cabararidsa amossi
canaraha ijica-jeranitohui. Huapima
icassiejeranitohui –nade Pablo.
²³ –Aja Dio ohua dosse naridsa-
jaripa ohua Medsede. Najaria
aja dsome Pohua Atti ccacca-
ronade ohuadsa dosse inaronadsa
ahuatopa. ²⁴Ohuadsa huati tadsapa:
“Pablo ticappina-jeraji” napa. “Tiapi
odsa panani Romahuaji bacco
tinanitohui, tamine deni tojahicca
baccouhaji tedsa: Ohuapi aji ohuani,
tanitohui” napa ohuadsa. “Nema
tadsapi Diojine aja tiadsa jahijona-
jarideni naco tocassiejerahitohui”
napa –nade Pablo. ²⁵ –Jehe otesse-
deni, tibodideni pina tetidsemanaji.
Ohuattipi: Diopa maidsera tahi,
onajaro. Nadsama aja Pohua huati
huati tahi omittajaropi Dio Pohua-
jine nema nanitohui. Pocca dodosse
memehujicca attissa inananitohui.
²⁶Naraha passo nocconidsa dsama
bedeni huittidsacossanidsa cobara
icananitohui –napode Pablo.
²⁷Nadsapi passo imeni onini
Adriatico nocconihuaji jojode-
jine ahuaji iacca, ahuaji iacca
nadsapi icca huada 14 nadsa dsome

nocconiraha canoa imeni ahaccade-
deni attipa: –A, dsama tohuajira-
jonanitide –quinade. ²⁸Nadsapa:
–Todsejerajonanitide –quinadsa
ssiquitohui nattome quinade. Siba
socadsa ssoque dsanani tappa
idsippamanade. Nadsapi passo
36 metro cajide. Denima nattome
quinapomadsapi ajimani tojajaro:
27 metro tojajonade. ²⁹Nadsapa
passo bodicca sibadsa canoa imeni
huacca canani noppineni cappina-
manadsa ahaccadedeni canoa
imeni dsotonihuaji ppejo 4 nehe
hua idsippamanade. Ppejopi soca
imenedsa ssoque toppidsa passo-
dsa hua idsippamanadsa poni inoni
ssiquidsa jaro nadsapi canoa imeni
ahuaji tohuacca, ahuaji tohuacca
nejeranijine. Nadsapa: –Jaho,
ssiaja naccaraho –quinadsa maji-
tohui madimana-dsanapode.
³⁰Naraha ssiaja-jeraccadsama
canao imeni ahaccadedeni atti-
denia: –Ppejo onihi canoa imeni
cotanihuaji hua idsippana –quina-
raha pohuadenipa maidsamanade.
Pohuadenipa: –Idomo toccana
–quinadsapa canoa bedenira tappa
icanaronamanade. ³¹Naraha Pablo
qqi tadsapa pohua cacahuade
romanodenicca soldado dossede-
dsa, aja pocca soldadodenidsa
naco huati tajari: –Jaho, canoa
imeni ahaccadedeni ajadsa madi-
mana-jaradsapa tiadeni ehueranipi
ticassiejera-jeranitohui –nade
Pablo. ³²Nadsapa canoa ahaccade-
deni domo tocca-jarahijine sol-
dadodedia canoa bedeni madoni ca
ippimanade. Canoa bedeni passodsa
cassonipadsapi tocatabode.
³³Nadsapi ssiajabote nadsa
jipamanahijine Pablo huati

inabaquide: –Jehe, jidapana huada 14 nehe tossoniquimara oppina tadsapi ticattomama canajarojine tijipamananissa tejerani. ³⁴ ¡Jari, jidapapi tijipamanaji! Tidacoramanani nadsapi ticassiejeranitohui. Ticappinamanajeraji. Tibejoje cama-geranitohui. ¡Nohuerani! Bacco tiquinanissa tanitohui –nade Pablo. ³⁵ Nadsama atti jicadsapa pan bobo idi nadsa huapima mittamanahijine Diodsa: –Jehe, epejeni bica tani –nade. Nadsapa pan dside, jai, apa nade. ³⁶ Pablo nama nahi qqui toquinadsapa bodideni badsira tehe tobicahi nadsa pohuadeni naco jipamanade. ³⁷ Ia huapima canoa imeni bodinidsa imadinipi 276 inade. ³⁸ Nadsapa ajarideni jicadsapa dsamatapa mota, aroso jidsadsa trigo sacocca hua idsippamanade: –Canoa imeni tocappahuani nana –quinadsa. ³⁹ Ssiajaponi ahaccadedenipa dsama qqui toquinaraha nocco-deni jidsa tajari. Naraha ahuaji qqui, ahuaji qqui quinadsapa toqquidohujanica ssiqui bicani qqui toquinadsa: –Jina, nanihuaji iaqquedsimadsa huana icanana –quinade. ⁴⁰ Nadsapi ppejo madonica ippimanadsapi passo bodidsa inebomanade. Canoa imeni dsotoni huahuacossa naqui acca acca quina-pomahijine ssoque dsanani dicca quinade. Cotanihuajicca ahuadsa etero imeni ssoque dsanani dicca quinadsa joca inamacossanimanadsapi jojodejine tohuaccapomade. Nadsapi toqquidohujanihuaji iaqquedsimade. ⁴¹ Naraha passo bodicca quequehemeri najarodsa cassonari cassonari dsanapode.

Denimacca ssiquidsapi canoa imeni cobara canade. Cotanipi toquehemora nade. Naraha dsotonihuajipi passo jibabani dacorajaro ssonari ssonari nadsapi cabararijarode.

⁴² Nadsapa soldadodeni: –Toponi cocorodsa hua todsimajarideni cona cona toquinadsa domo toccarana –quinadsa: –Jari, tojicana –quinade. ⁴³ Naraha romano-denicca soldado dossedepa Pablo dsoqquehijine jipera tadsapa jehe najarade. Nadsapa dicca inabaquidsa dosse inabaquide: –Jari, conade nahatoqqiri tiquinadsapi tahide passodsa joppa tidsippamanapoji, ssiquihuaji cona cona tiquinanijine –nade. ⁴⁴ –Naraha conade ssamoqquri tiquinadsapi tabla qqui tiquinaji. Aji canoa imeni arobenidsa naqui titiporimaneri nadsa tibijidenidsa cona cona tiquinaji, ssiquihuaji bacco tiquinanijine –nade romanodenicca soldado dossede atti. Nema inadsapi ia huapima dsama bacco inadsa icassiejerade.

**Dsama huittidsacossajaro
oninipi Maotadsa
madimanajari**

28 ¹ Paso imenidsa huapima icassiejeradsapi aji ssiquihuaji bacco bacco inajaro. Ssiquihuaji bacco bacco inanicca dsama oninipi Maota. ² Nahihuajicca madija madimanajaridenipa iadsa huatideni huanaqquri nade. Nanidsa bacco idsatiraha passo cca, ssirini toja nadsapi dsippo imeni inadsamanadsa iadsa huahuquinade: –Nija, aji dsippodsa jia tiquinaji –quinade. ³ Nadsapa Pablo ahua tabi eccaniquidsa hua



idsanade. Naraha maccapa dsippo ppoconi noppineni qquenadsa Pablo dsepedsa cca todsadsapa dsepedsa que tade. ⁴Naraha nahidsa madija madimanajarideni Pablo dsepedsa macca que tahi qqii toquinadsapa pohuadenira imahaha canade: –A, pohuapa madija inanadsoqqe-
 dsada itide. Passodsapa je tajararaha jidapapa ia cacahuade Dique-
 jine dsoqqehitohui –quinade. (Dique ettidsapi: imasiri manaconi totonanade.) ⁵Naraha Pabloa pohua dsepe dissa nadsapa macca dsippodsa ssonidsanade. Naraha Pabloa macca comene ahua najarade. ⁶Pohuadeni bodidenidsa attidenipa: –Jite tojahitide, amadsati huatiadsa tohuedimahijine-
 rana –quinajari. Naraha pohua cattade madimana, madimana naraha Pablo huatia-jaradsapa bodideni cacajiquimera-manade. Pohuadenipa dio huapi taha cajimanajarijine Pablodsa: –Ajaripa dio ohuaha –naridsamanade.

⁷Nadsama aji dsippo jia inani huajira tanidsapa najaro dsamaccata tamine madijari. Pohua onipa

Pablo. Najaripa iadsa: –Jina, occa odsahuaji jaijana –nade. Nadsapi huada 3 nehe pohuadsa imadide. Pohuapa iadsa accora, bica tade. ⁸Naraha Pablo imehipa coma taha porijari. Huapi ppocoraja, miji miji taja najaride. Najari qquide Pablo toqquedsimadsapa Diodsa huati tajari. Pohua dsepedsa bara inadsapa tonomide. ⁹Nama nahi mittamanadsapa najaro dsamacca comaquiri najarideni huapima jahijonadsa Diojine tocanomire-
 ridsade. ¹⁰Nadsama iadsa bica-
 qqiri nadsapa poccadeni daniji huapi tehe iadsa da inaquimanade. Dsotode benehidsa jaijapomanijine naqui icappira nejeranijine huema nehe iadsa da quinapomade.

Romahuaji jai tojahijine Maotadsa joppemamanajari

¹¹Nani dsama bedeni Maotadsa abadsico 3 canaha imadidsapi ijoppemapanijine odsa panani Arejadriacca canoa imenidsa jaijedsade. Najaro canoa imeni jinededeni naco dsadsajade jicanijine nahi Maotadsa najomanaccaja najaride. Poccadeni canoa imeni cotanidsapa pohuadeni cacahuade corime pamaha barijari, onideni Casto, Poro quinajari. Canoa ahaccadedeni attidenipa: –Ia cacahuade papamade –quinajari. Najaro canoa imenidsa jaijedsadsapi iaccapomade. ¹²Nadsapi dsama bedeni passo imenidsa huittidsacossani onihicca odsa panani Siracosadsa bacco inade. Nanidsa icca huada 3 nade. ¹³Nadsapi najaro dsamadsa denima issoniquimadsapi passo imeni inidima nani iaccabacossade. Dsama Itariacca odsa panani

Rejio bacco inade. Huada ssiajapi inattihuaji jojode ccajonadsapi iaccapomade. Dsome ssiajapomadsapi najaro jojodejine huassinaja odsa panani Poteori bacco inade. Nanidsapi canoa imeni icanebodsa jaijemorade. ¹⁴Nadsapi najaro odsa pananidsa Jesodsa jehe quinajarideni bacco inabaqquide. Pohuadeni attipa: –Jari, iadsa semana ojarie timadimanaccaji –quinadsa pohuadenidsa huada 7 nehe imadide. Dsotodepi odsa panani Roma jahini jaijapomade. ¹⁵Jaijanaja Romahuajicca Jesodsa jehe quinajarideni tahimari mittamanadsa bacco ijidsabaquihijine itohui jahijonajari. Motadenipa odsa capamema najaro onini Foro de Apiodsa bacco ijidsabaqquide. Motadeni ohuahapa odsa capamema najaro onini Tres Taberna quinahidsa bacco ijidsabaqquide. Nadsapa Pablo qqui inabaqquidsapa bodi huatidsede. Diodsa naco: –Jehe Abi Dio, epejeni. Tiapi bica tinani –nade. ¹⁶Nadsapi odsa panani *Romahuaji bacco idsimadsapi Pablopa pohuara madihijine taminedeni jehe quinajari. Pablo pohua cacahuade soldado ojari ojari dsanapomanadsa madijaride.

Pablopa Romahuaji

¹⁷Nadsapa nahidsa Pablo huada 3 nehe madidsapa jodiodenicca taminedeni madimanajari huahua inabaqquide. Queriquimanadsapa pohuadenidsa huati tajari: –Jehe ohuemecotedeni, ohuapi jodiodeni ohonajidsobaqqui najarade. Icca ididenicca madie tahimarinidsa naqui nanacassera onejerade. Nohue ojiraraha odsa panani Jerosaredsa

jodiodeni occa madijaraha ohuadsa huadiquiri nadsa ohua dama quinadsapi romano dsepedenidsa ohua inanamanajarode. ¹⁸Nadsapa nahi Jerosaredsa romanodeni ohua huati icanamanade. Ohuadsa huati toquinaha jicadsa attidenipa ajama quinade: “Pohuapa ima cappirahi, madija nanajidso najarahi. ¿Nejecotohui dsoqquehijine?” quinade. Attideni nama quinadsapa “Pablo tappa inana” quinade. ¹⁹Naraha jodiodeni ohuadsa huadiquiri nadsapa romanodeni: “Pablopa ima cappirahi” quinahi ima mittamanadsapa pajissa quina-jarajari. Nadsapa romanodenicca dsama cacahuade tedseje jehe canirejarajarijine romanodenicca tamine deni tojahiccana occa ima icattemanijine onadsa huati onajarode. Aja occa madija jodiodenidsa naqui occa huadie nohuereje najaro. ²⁰Najaro timittamananijine onadsa titohuideni huahua onajarode. Jaho, pohuadeni qqui onabaqquidsapa pohuadenidsa huati onanijine, onade. Aji tiadenipi jidapanana cadenadsa ohua jore quinani qqui tiquinajaro. Ia Isaraeridenipi ia Idinide tohui inajorani. Najaridsa jehe onadsapi ohua dama quinajarode –nade Pablo.

²¹Nadsapa Pablodsa huati toquinajari: –Naraha Jerosarecca madijapa titahimari ima teppe naqui iadsa dosse inajonamanajerade. Imecote jodiodeni ahuaji bacco najonamanajarideni naco “Pablocca ima tabaccora tani” quina-jarade. ²²Naraha aji ima dsati mari mari tajaropi dsama huapimadsa: “Bica tejerani” nanaridsamana nahi ihimitta najaro.

Nama quinadsapa: Ticca ima imittaccarah, ihinanajarode – quinajari jodiodenicca taminedeni.

²³Nadsapa pocca marinaja mittamanahijine huada ojarie icattejidsamanade. Najaro huada bacco tadsa dsidsidsamassa Pablocca odsahuaji huapima queriquimanade. Nadsapa Pablo Diocca cacahuehe tahimarini, Jeso tahimari naco mari icanabaquijari. Jeso tahimaridsa pajissa quinahijine dissera tajari. Moisesicca marinajadsa, Dio Atti cacomeraquiri najaridenicca dsodonijidsa naqui mari icanabaquijari. Najaro maridepi majidsamaraha dsomedzana apaja quinade. ²⁴Nadsama jodiodeni mota Pablo attidsa huatidsemanadsa pajissa quinade. Naraha motapa pajissa quina-jarade. ²⁵Nadsama huapima jehe canire-jaradsa motapa: –Jina jaijanina –quinaraha Pablo pohua atti jicanicca pohuadenidsa ajama nade: –Jaho, tiadenipi pina ticcadeni ididenissa tiquinajaro. Maittaccadsama Dio Corime icca ididenidsa huati tajari. Pohua Atti cacomerabote Isahia dsodo inapojaro tijinedeni pajissa tojajaro. ²⁶Aja Dio Attipa:

“Occa madijadsa Ohuatti tecomeraridsaji. Pohuadenidsa ajima onajaro: Teribodeni ticajimanaraha pina timittamanerani nanitohui. Tinocodeni ticajimanaraha pina qqui tiquirani nanitohui.

²⁷Ajajari madija bodideni tossamoridsadsapa paja tossamomanarihi nahitohui. Huaribodeni moda nahi nadsapa pina mittamanerahi nahitohui.

Noccodeni naco modsi quina-dsapa pina noccodeni cappiramanajarissa nahitohui.

Nama quinadsapa qqui toquinahijine ssamoquiri, mittamanahijine ssamoquiri, bodideni tocahatterahijine ssamoquiri nadsapa bodideni cacajiquimera-manahijine ssamoquiri nahi. Nassa bodideni cacajiquimera-manadsa ohuadsa toquejenadsapa onabicabaquihitohui-raha” nahi nade Dio –nade Pablo.

²⁸ –Jehe occa madijadeni, nahatoquiri tiquinanijine tiadenidsa huati onajaro. Jidapapa jodio quejena-jarajaridenidsana Dio ia tonassajabaquihijinecca ima tojaridsanitohui. Najaridenina mittamanahissa tahitohui –nade. [²⁹Nadsapa Pablo atti jicadsa jodiodenipa pohuadenira ahuaji atti ahuaji atti quinadsapa jai tojanide.]

³⁰Nadsapa huajano pamaha tossoniqqumaraha Pablo odsapanani Romadsa madihipaja naccade. Pohua madihicca odsa manaconi naqui jinededsa da da dsadsanapo nahipaja naccade. Pohua qquide jajahijona nadsa naco madija ihinahatidsebaqqi nade.

³¹Pohua qquide jajahijona nadsa naco Diocca cacahuehe tahimarini, ia Medsede Jesocristo tahimari naco mari mari ihicanabaqqi nade. Pabloppa cappina-jaradsa pohua attidsa naco ssonacossade nohueradsa mari mari ihicana-baqqi najaride.